

მე. გიორგი თედორაძე

# სუთი წილი უზავ-სევსურეთში

წიგნი მეორე

გვარი, ოჯახი, სარწმუნოებრივი კულტი,  
ტანისამოსი, მკურნალობა



# სუთი წელი უზავ-სევსურეთში

წიგნი მეორე

469

გვარი, ოჯახი სარწმუნოებრივი კულტი,  
ტანისამოხი, მკურნალობა



რედაქტორი—ა. უსტიაშვილი  
კორექტორი—ტატიშვილი  
გადაეცა წარმოებას 27/I-39  
ხელმოწერილია დასაბეჭდათ 8/VIII—39 წ.  
ტირაჟი—3000  
მთავლიტის რწმუნ. № 2773.

---

სტამბა „ზარია ვოსტოკა“. რუსთაველის პროსპექტი № 36

## წინასიტყვაობა

ჩვენი პირველი შრომა „ხუთი წელი ფშავ-ხევსურეთში“ გამოვიდა 1930 წელს. იგი შეიცავს ფშავლებისა და ხევსურების ყოფა-ცხოვრების აღწერას. ეს წინამდებარე წიგნი მეორე შრომაა იმავე თემაზე დაწერილი და წარმოადგენს პირველის შეესებებასა და გაგრძელებას.

როცა პირველი წიგნი იბეჭდებოდა, ავტორი ჯერ ისევ ფშავ-ხევსურეთში მუშაობდა და მასზე დამოუკიდებელ მიზეზთა გამო წიგნს ბევრი მასალა დააკლდა. ამასთან ერთად პირველ წიგნს ტექსტისა და თავების დალაგების მხრივაც აქვს ნაკლი.

ეს, მეორე, წიგნი შეიცავს პირველი წიგნისათვის გამზადებულ მასალას, რომელიც ვერ შევიდა პირველ წიგნში, როგორც ვთქვით, ჩვენზე დამოუკიდებელი მიზეზების მასალა, ეს გამოგვირეოთ გვაროვნული წყობა, რომელიც შედარებით უფრო ყურადღებით არის დამუშავებული ამ წიგნში. ამ რთული საკითხის დამუშავებაში, ალბათ, ნაკლიც გვექნება, მაგრამ იმდენად დიდი კი არა, რომ შრომას მნიშვნელობა დაუკარგოს. ამ ნაკლის გამოსწორებას შესძლებს ჩვენს შემდეგ სხვა მკვლევარი, რომლისთვისაც ჩვენ უკვე შეგროვილი და დამუშავებული გვაქვს ძირითადი მასალა.

შემდეგ, ამ შრომაში ვეხებით ოჯახურ წყობას, რადგანაც ოჯახი შეადგენს გვარის ძირითად წარმომშობს.

აქვე ვიხილავთ სარწმუნოებრივ კულტს, ურომლისოდაც წარმოუდგენელია ძველი ფშავ-ხევსურეთის ცხოვრება. ეს საკითხი ჩვენ საყვარელით ვერ ამოვწურეთ, რადგანაც ამისათვის ასეთი ერთი პატარა წიგნისა კი არა, მრავალი ტომის დაწერაა საჭირო. მას აქ ვეხებით მხოლოდ იმდენად, რომ დაინტერესებულმა მკითხველმა ზოგადი წარმოდგენა იქონიოს.

ამ წიგნში აგრეთვე აღწერილია ხევსურული ტანისამოსი. დიდი ყურადღებითაა აღწერილი ადვილობრივი მკურნალობა, სამკურნალო ბალახები და ხერხები. წიგნის ეს ნაწილი შეადგენს პირველ წიგნში მოცემული იმავე საკითხის მასალის განვითარებასა და დამატებას.

დასასრულ დიდ მადლობას ვუძღვნი ბელეტრისტ ლადო ბალიურს, ალექსი ოჩიაურს, ელიზბარ ელიზბარაშვილს, რომლებიც დამეხმარნენ ამ წიგნის მასალის შეკრებაში.

## ხ ე ვ ს უ რ ე თ ი

ხევსურეთს, წარსულს და არა ახლანდელს, ჰქონდა ბევრი ისეთი მხარე, რომელიც ჩვენი, თანამედროვე, თვალსაზრისით, დასავლობია და მიუღებელი. ყოფა-ცხოვრების წესები, ზნე-ჩვეულებანი, კულტი, სამართალი, მკაცრი წესები სისხლისაღებისა და სხვ. იმდენად ცუდ შთაბეჭდილებას სტოვებდა ყოველ, თუნდაც ცოტაოდნად კულტურულ ადამიანზე, რომ ყველა, ვისაც კი მოუხდებოდა ხევსურეთში ყოფნა და ცხოვრება, გაკვირვებული და, შეიძლება, სასოწარკვეთილიც კი, წამოიძახებდა: ნეტავი რა დამიფარავს ამათვანო! მაგრამ ყოველივე ამის მიუხედავად, ხევსურები ფრიად საინტერესონი არიან სწორედ ამ თავიანთი ძველებურობით, გვარ-ტომური წყობილებით.

ლუი მორგანმა იროკეზების საზოგადოებრივი წყობილება ძველი წესწყობილების იდეალად მიიჩნია. ხევსურებიც იროკეზებში ბევრით არ განსხვავდებიან. მხოლოდ კი, იროკეზების რიცხვი და ტერიტორია მეტი იყო ხევსურებისაზე.

ფრ. ენგელსი, როცა იროკეზებს ეხება, ამბობს: „რა სუცხოვო მოვლენაა ეს გვაროვნული წესწყობილება თავისი უშუალობისა და სიმარტივის მიუხედავად. აქ არც ჯარისკაცებია, არც ჟანდარმები და პოლიციელები, არც თავად-აზნაურობა, მეფეები, მეფის მოადგილეები, პრეფექტები ან მსაჯულები, არც ციხეებია და არც პროცესები, მაგრამ ყოველივე წესიერად მიმდინარეობს. ყოველივე უთანხმოებას და ჩხუბს სწყვეტს იმ პირთა ერთეული, რომელთაც ეს ეხება: გვარი, ტომი ან გვარების გაერთიანება; სისხლისაღება მხოლოდ უკიდურეს, იშვიათ შემთხვევაში იხმარება. ამ სისხლისაღების ცივილიზაციამწინილი ფორმა სიკვდილით დასჯაა. იგი ცივილიზაციის უპირატესობითა და ნაკლითაა დატვირთული. თუმცა გვაროვნულ წყობილებაში მეტი საზოგადო. საქმეებია გასარჩევი, ვიდრე დღეს,

თუმცა რამდენიმე ოჯახს საერთო შინაური მეურნეობა აქვს კომუნისტურად მოწყობილი, თუმცა იქ მიწა ტომის სამფლობელოს წარმოადგენს, მხოლოდ ბაღებიღა მიკუთვნებული შინაურ მეურნეობისადმი, მაგრამ მაინც იქ საჭირო არაა ჩვენი ფართო და დახლართული მმართველობის აპარატი. საქმეებს მონაწილეები სწყვეტენ და უმრავლეს შემთხვევაში, ყველაფერი საუკუნოებრივი ადათის წყალობით წესრიგდება“. (ფრ. ენგელსი, ოჯახის, კერძო საკუთრებისა და სახელმწიფოს წარმოშობა“, თარგ. გერმანულიდან ვერ. ქიქოძისა გვ. 111).

სწორედ ამ თვალსაზრისით არის ჩვენთვის საინტერესო ხევსურეთი, ხევსურეთი, როგორც ნიმუში საზოგადოებრივი ცხოვრების ისტორიის შესასწავლად, თორემ დღევანდელმა ხევსურეთმა, საბჭოთა ხელისუფლების დაუღალავი მზრუნველობით, უკვე დასტოვა თავისი პრიმიტიულობა და ახალი, სოციალისტური ცხოვრების გზას დაადგა. ამიტომ ამ ჩვენს წიგნში ლაპარაკი გვაქვს, როგორც უკვე ვთქვით, წარსულ ხევსურეთზე. ეს გარემოება მკითხველმა ერთი წუთითაც არ უნდა დაივიწყოს. მართალია, ხევსურეთის ცხოვრების ყველაფერი ძველი რეაქციონური, ჯერ მთლად არ არის აღმოფხვრილი. ეს აღმოფხვრა ერთბაშით, რასაკვირველია, შეუძლებელი იყო, მაგრამ ხევსურეთი, ვიმეორებთ, უკვე შედგა იმ გზაზე, რომელზედაც ლენინ-სტალინის პარტიამ მსოფლიო პროლეტარიატის დიდი ბელადის სტალინის ხელმძღვანელობით დააყენა დედამიწის ერთი მეექვსედი.

ამგვარად, ჩვენ ვილაპარაკებთ ხევსურეთის ძველ საზოგადოებრივ წყობილებაზე და მკითხველმა არამცდაარამც არ უნდა იგულისხმოს, რომ ყველაფერი, რაც ამ წიგნშია მოთხრობილი, ამჟამად ძალაშია და მოქმედობს.

## გვარები სავსურეთში

ხევსურეთის საზოგადოებრივი წყობილების ძირითად ერთეულს გვარი წარმოადგენს. არის სამი მთავარი გვარი: არაბული, კინჭარაული და გოგოჭური. ხევსურების თქმით, ეს სამი გვარი წარმოშობილა სამი ძმისაგან: არაბას, კინჭარასა და გოგოჭასაგან. არაბა არაბივით შავი ყოფილა, გოგოჭა კი ტანად პატარა ყოფილა. ამ ნიშნების გამო დაურქმევიათ ეს სახელები. მესამე ძმა მცირეწლოვანი და კოჭლი ყოფილა. ძმები დასახლებულან სოფ-

გუდანში. შემდეგ გაყრილან. გაყრისას, ჩხუბი მოსვლიათ. არაბას ხელი უკრავს უმცროსი ძმისათვის და ჭინჭრებში გადაუგორებია. ამის შემდეგ დარქმევია მას ჭინჭარა. გაყრისას, წილისყრით, არაბას რგებია ადგილი ბაცალიგო, გოგოქას—ჭორმეშა, ჭინჭარას კი —გუდანო. ასეთია გადმოცემა.

ეს სამი გვარი რიცხვით მეტია ვიდრე დანარჩენი გვარები. მათ ჰყავდათ საერთო საგვარეულო ჯგარი—გუდანის ჯგარი. წელიწადში ერთხელ ეს სამი გვარი თავს იყრიდა ამ ჯვარის გალავანში საერთოდ სალოცავადა და გვარული ნათესაობის გასამტკიცებლად. ასეთი შეკრება, ზოგჯერ, წელიწადში რამდენჯერმეც ხდებოდა. მათი ნათესაური კავშირი იმდენად მტკიცედ იყო დაცული, რომ ურთიერთში ქალის გათხოვება აკრძალული იყო იმ დრომდე, ვიდრე ჩამომავლობა ოცი-ოცდაათი თაობით არ დაშორდნენ ერთმანეთს.

სამივე გვარი დასახლებულია სხვადასხვა სოფელში. ზოგი მათგანი ძლიერ არის ერთმანეთს დაშორებული. ხმის გამო რომ ეს გვარები, გადმოცემის თანახმად, ერთი ოჯახიდან არის წარმოშობილი, გამრავლებულია და მთელს ხევსურეთშია დასახლებული. ამიტომ ეს გვარები ხევსურეთის მოსახლეობის თავდაპირველ, ფუძემდებელ გვარებად უნდა ჩაითვალოს.

არაბულების გვარი სამ ფრატრიად ანუ თემად არის გაყოფილი. ერთს ეწოდება—რკინაულის თემი, მეორეს—ბიჩინაგურის თემი და მესამეს—ფიცხელაურის თემი. რკინაულები სახლობენ სოფ. ჩირდილში, ხიტალეში, წინ ხალუსა და ზეისტეჩოში; ბიჩინაგურები—სოფ. დათვისში, ჯუთასა და ზეისტეჩოში; ფიცხელაურები—ბაცილიგოში, ჩხუბოში, მოწხოში, ოხერხევში, წინხალდუში, გველეთსა და ბარისახოში.

უნდა აღვნიშნოთ, რომ ხევსურეთში თემი არ შეიცავს ტერიტორიალური ერთეულის ცნებას, არამედ გვარის ერთობლიობას.

ჭინჭარაულის გვარს ორი ფრატრია (თემი) აქვს: მგელიაურისა და უურდღელაურისა.

რადგანაც ეს სამი გვარი მთელს ხევსურეთშია დასახლებული სხვადასხვა სოფელში, ამიტომ, ერთსა და იმავე სოფელში ხშირად სახლობს სხვადასხვა თემის წარმომადგენელი.

ამ სამი მთავარი გვარის გარდა, სხვა გვარებიც არის: ხალიქოკო გვარეულობა; იყოფა სამ თემად: ჩალხურისძე, ანუ ჩალხურის თემად, ხახონაურიძე, ანუ ხახონაურის თემად, და ხუნ-



ჩალაურის ძედ ანუ ხუნჩალაურის თემად. ამჟამად ეს სამივე ფრა-ტრია, ანუ თემი, ერთ გვარზე იწერება—ლიქოკელის გვარზე, და ლიქოკის ხეობაში სახლობს. ხახონაურები და ხუნჩალაურები სისაურის მოდემისანი არიან, ანუ ხაზიტაშვილების თაობისა არიან. ამათში სისხლის აღრევა, ე. ი. ქალის გათხოვება, სასტიკად აკრძა-ლული იყო.

ამ ხეობაში კიდევ სახლობს ბასხაჯაურის გვარი.

როგორც ხეესურები ამბობენ, ჩალხურისძე ვადმოსახლებუ-ლია ჩალხისწყლიდან (კახეთი), ბასხაჯაურები თურქთა მოდემი-სანი არიან. მათი წინაპარი ხეესურეთში დარჩენილა ოდესღაც ომიანობის შემდეგ. ეს გვარი სულ რამდენიმე კომლისაგან შეს-დგება და სახლობს ქალისსოფელში (ლიქოკის ხეობაში\*); ხახო-ნაურისა და ხუნჩალაურის ფრატრები ხუთ სოფელში სახლობენ: მალრანში, აკუშოში, კიმხაში, ქობულოსა და აჭეში. ჩალხურისძენი, დასახლებულნი არიან სოფელ ბაგჩვილოსა და კარწეულთაში. სი-საურები ვადმოსახლებულები არიან ქისტეთიდან. ამ გვარის ერთი ნაწილი ზინადრობს ლიქოკის ხეობაში, ზემოთაღნიშნულ ხუთ სო-ფელში, მეორე ნაწილი კი, განაყარნი, — სოფ. ძიძეთსა და ბუზა-რანაში (კახეთში). მესამე განაყარნი სოფ. შატილში. შატილიონები (შატილელი) სისაურები ამჟამად სხვა გვარზე იწერებიან, მაგრამ სისაურების გვარის დანარჩენ წევრებთან სისხლით ნათესაობას არა წყვეტავენ, თუმცა საუკუნეებით არიან მათგან დაშორებულნი. სა-ერთო წესისამებრ, აქაც, სისაურების გვარში (ამათ რიცხვში შატი-ლელი სისაურებისაც) სისხლის აღრევა აკრძალული იყო.


სისაურების პირდაპირი განაყარნი ცხოვრობენ სოფ. შატილ-ში, პირიქით ხეესურეთში. მათ ეწოდებათ ანატორელები.

შატილიონებსა და ანატორელებს შორის გვაროვნული ნათე-საობა არ არსებობს, მაგრამ მათ შორის ქალის გათხოვება მაინც აკრძალულია.


ხეესურეთის მესამე მთავარ გვარს — გოგოჭურებს. — განაყარ-ნი არა ჰყავს და ეს, ალბათ, იმით უნდა აიხსნას, რომ ეს გვარი რაღაც მიზეზით ვერ გამრავლდა ისე, როგორც გამრავლდა არა-ბულებისა და ჭინქარაულების გვარი.

\* ბასხაჯაურთა გვარი განცალკავებული გვარია და ხსენებულ გვართან ნათესაური კავშირი არა აქვს. ამ გვარის წარმომადგენლებს ჩვენ შეგხვდით მხოლოდ რამდენიმე კომლს და ლიქოკის ხეობაში მისი შტოები არ შეგხვდ-რია.


რკინაულების სავაჭროლოში (ფრატრიაში) შედის რამდენიმე მამათაობა:



რკინაულის თემი მრავალრიცხოვანია. დროთა განმავლობაში გამრავლების შედეგად მივიღეთ მეორე სახელწოდების გამრავლებული გვაროვნული ფრატრია:



ამ მთავარი გვარის მეორე განაყარნი კიდევ არიან. ისინი ბიჩინაგურების ფრატრიაში ირიცხებიან, მაგრამ ხეცურული წყობის ნათელსაყოფად საკმარისია გვაროვნული ტოტით აღვნიშნოთ მამათა თაობა.




ფიცხელაურების  
ფრატრია

შთავარი გვარის არაბულგების) მესამე განყარნი

როგორც ვხედავთ, რკინაულების, ბიჩინაგურებისა და ფიცხელაურების მოდგმა შედგებოდა ჯერ ზამი პატარა გვაროვნული ფრატრიისაგან, მერე კი არაბულების გვარის დიდ ფრატრიად, მრავალრიცხოვან გვაროვნულ ძმათა საზოგადოებად გადაქცეულა. ყოველი ფრატრია ამჟამად თავისი განსაკუთრებული სახელწოდებით — რკინაულები თავიანთ რკინაულობით, ბიჩინაგურები — ბიჩინაგურობით და სხვ.


ყველა ხევსური, ქალი თუ კაცი, ორ სახელს ატარებს (ზოგჯერ სამ-სამ და ოთხ-ოთხ სახელსაც) — ერთს ნათლობისას, მეორეს ნართათულა სახელს, რომელიმე საგნის სახელს, რომელიც ადამიანს სიზნეავით ან სიშამაცით დამსახურებული აქვს თავის თემსოფელში. ამის მიხედვით იცვლება ძირეული გვარი, მაგრამ ეს არ იწვევს სისხლით ნათესაობის დაკარგვას. ამის მაგალითია ის, რამ ფიცხელაურების ფრატრიიდან ზოგი ფიცხელაურებად იწერება, ზოგი კი ისევ ძველ გვარზე — არაბულზე. რკინაულებისა და ბიჩინაგურების ფრატრიები კი, ყველანი, არაბულებად ითვლებიან. მგელიაურისა და ყურდღელაურის ფრატრიები ჭინჭარაულებად იწერებიან. ხევსურების სიტყვით წმინდა არაბულები სოფ. წინხადუში ცხოვრობენ და იყოფიან მამათა ოთხ თაობად:




წმინდა არაბულების  
ფრატრია

ამ შტოში მოთავსებული თაობაც წმინდა არაბულებს ეკუთვნის და სახლობს სოფ. ბარისახოში.


მეორე მთავარი გვარი — ჭინჭარაულები — ორ მთავარ ფრაქციად გაყრილია — ერთია მგელიურების გვარი; მეორე — ყურდღელაურებისა:




მესამე მთავარი გვარი — გოგოჭურები, — ერთ კარგად მოზრდილ გვარს წარმოადგენს და ფრაქციებად არ იყოფა. ეს გვარი სახლობს ოთხ სოფელში: ატაბეში, ბუჩუკურთაში, გუროსა და ჭორმეშაში. მისი შემადგენლობა ასეთია:




როგორც უკვე ვთქვით, სამ მთავარ გვარს გარდა, ხევსურეთში სხვა გვარებიც არის. ამათში პირველია **ლიქოკელების** გვარი. სახლობენ ლიქოკის ხეობაში. ლიქოკელები სხვადასხვა წარმომოშობისანი არიან, შედგებიან ოთხი გვარისაგან, მაგრამ ლიქოკელებად იწერებიან. ამ ოთხში სამი გვარი მთავარია და ასეთი მამათა მოდგმა აქვთ:





მეოთხე გვარია ბახხაჯაურების გვარი. ოთხივე გვარში აკრძალულია ერთმანეთში ქალის გათხოვება.

ლიქოკელების შემდეგ მეორე ადგილი უჭირავთ წიკლაურებს. ესენი სახლობენ სოფ. როშკაში, ბლოში, ამლაში, საბერწყესა და გარბანფაფარენაში. ამ სოფლებში მცხოვრები წიკლაურები ერთ ფრატრიას წარმოადგენენ:




წიკლაურების გვარს ხევსურები არა სცნობენ ხევსურეთის ფუძემდებელ გვარად, მაგრამ სიმრავლით თითქმის რომ ყველაზე ძლიერი გვარია, და ამ მხრივ არაბულების გვარსაც კი ეჯიბრება.

მთლად წიკლაურებით დასახლებულია სოფ. ამლა (პირიქითა ხევსურეთშია). ამ წიკლაურებში სხვა გვარების ჩამომავალნიც



არიან, მაგრამ ამჟამად წიკლაურებად იწერებიან და ამიტომ წიკლაურების ჯგუფში მოვათავსეთ.

წიკლაურების გვარში შედის ზარიძეების გვარი: ცხოვრობს სოფ. ხორნაულთაში.




ზარიძეების განაყარნი ცხოვრობენ ფშევისხევშიც, სოფ. კაწალხევში და ხორნაულებად იწერებიან. როგორც ჩანს, ამ გვარის ეს შტო თავის ძველ მოსახლეობის ადგილთან, სოფ. ხორნაულთასთან კავშირს არა წყვეტენ და ამიტომ გვარიც ამ სოფლის სახელიდან გაუკეთებიათ — ხორნაულეზი. მაგრამ მათი ძირეული, ძველისძველი გვარი ორია: წიკლაური და ზარიძე.

სოფ. ქმოსტაში ორი მთავარი გვარია—ველთაურა და ბურდული.




სოფ. ხახმატში დასახლებულია ალუდაურების გვარი. იყოფა სამ მამათა თაობად.

სოფ. ბისოში მოსახლეობს ქეთელაურების გვარი. ამათი განაყარნი სახლობენ სოფ. სახილეში.



ხუთი გვარი — ოჩიაური, ბალიაური, ნაროზაული, ცისკარაული და ჯაბუშანური, ცხოვრობს სოფ. ახიელში.

სოფ. ჭიმლა სხვადასხვა გვარებითაა დასახლებული: გაბურებით, თეთრაულებითა და გიგაურებით. ამათ შორისაც აკრძალულია ქალის გათხოვება, თუმცა სხვადასხვა გვარისანი არიან.




სოფლები — ახიელი, ჭიმლა და კვირიწმინდა, და აგრეთვე სოფ. ამლა, რომელიც წიკლაურებითაა დასახლებული არხოტის მხარეშია.

ცისკარაულებისა და ნაროზაულების გვარები, მახლობლები არიან ოჩიაურის გვარისა. მათი გვარი წარმოშობილია ერთი მაძი-



საგან. ოჩიაურები წინად გაბიდაურები ყოფილან. გაბიდაურების შემდეგი გაგრძელება ჯორჯიაულის გვარში გადადის. მათი განაყარნი არიან ოჩიგატურები, ცისკაურელები და ნაროზაულები.



ბალიაურებსა და ჯაბუშანურებს ძველად განაყარნი არაჰყევანან. ჰყავთ ახლად გაყრილები ძმები, ბიძაშვილები. ესენი მეტად მცირერიცხოვანნი არიან და გვაროვნული წყობილების ძლიერ სუსტ ჯგუფს წარმოადგენენ.

საინტერესოა ერთი ფაქტი: სოფ. კვირიწმინდაში ცხოვრობს ერთი კაცი თორღვა შუქიაური 120 წლისა. შუქიაური არხოტის თემში მისული კაცია. მას არც მახლობელი ჰყავს, არც შორეული ნათესავი.

ლიქოკელები, წიკლაურები და სხვებიც, შემდეგ არიან დასახლებულნი ხევსურეთში, არ ეკუთვნიან ხევსურეთის ძირეულ გვარებს, მაგრამ მათთან შედარებით, ნაკლებად არ არიან გამრავლებულნი.

საერთოდ, გვარები ისე არიან გაბნეულნი მთელს ხევსურეთში, რომ მათი გვაროვნული სათავისა და კავშირის მონახვა მეტად ძნელია. ზემოთდასახელებული თორღვა შუქიაური, თურმე, გიგაურების გვარისაა. გიგაურები, ზოგი მის მეზობლად ცხოვრობს სოფ. კვირიწმინდაში, ზოგი სხვადასხვა სოფელშია გაბნეული, ზოგი კახეთშია გადასახლებული. ასე რომ, თორღვა გვარდაკარგული არ

არის, თუმცა ნათესავეები არა ჰყავს. სამწუხაროდ თორღვას პირადად ნახვა ვერ მოხერხდა, თორემ, ალბათ, დამისახელებდა თავის გვარის თაობათა ჯგუფებს.

### გვაროვნული წყობა

გვარით (სისხლით) ნათესაობა აუცილებლად მამრობითი სქესით შიშვენიერობდა: პირველი ადგილი უჭირავს შვილს, მეორე-ძმას, მერე ბიძაშვილს, შემდეგ გარეთა ბიძაშვილს და ბოლოს კი მთელი გვარი შეადგენს ერთ სისხლით ნათესაობას. ასეთ საგვარეულო ნათესაობის გარდა, უახლოეს ნათესავედ ითვლება სიძე, რძალი, სიძის დედბაბა, ანუ მძახლები, ხევსურეთსა და ფშავში ძმათაშვილებსა და დათაშვილებს შინში ჰქვიათ.

469  
გვაროვნული კავშირი მეტად მტკიცეა. ზემოთ ჩვენ ზოგადად ვთქვით, რომ ერთი გვარის, ხშირად კი, რამდენიმე გვარის წარმომადგენელთა შორის ქალის გათხოვება აკრძალულიაო. ეს მაშინაც კი ხდება, როცა ერთისა და იმავე გვარის ოჯახები მრავალი თაობით იყვნენ ერთმანეთს დაშორებულნი. ამ აკრძალვის სისასტიკეს იმით უფრო დავინახავთ, თუ მხედველობაში მივიღებთ, რომ ამ აკრძალვის ძალით ერთი გვარის ხევსური ქალ-ვაჟი ვერ შეუღლებიან და, მაშასადამე, დედის მხრით ხევსურებში ნათესაური სისხლის აღრევა სავსებით გამოთიშულია. ყველაფერი ეს იმის მიჩვენებელი და დამადასტურებელია, რომ ხევსურეთში ნათესაობათ მხოლოდ გვარით ჩამომავლობა ითვლება. სისხლის აღრევის შინში იქამდის იყო მისული, რომ ტერიტორიალური მეზობლობაც კი კრძალავდა ურთიერთშორის ქალის გათხოვებას, თუნდაც სხვადასხვა გვართა შორის. მაგრამ ამ აკრძალვას მარტო ასეთი ნათესაური და ტერიტორიალური ერთობა არ უდევს. რადგანაც ხევსურეთში ყოველ გვარს თავისი საკუთარი ხატი ჰყავდა, და ერთი ხატი კიდევ რამდენიმე გვარს, და ესენი ყველანი ამ ხატის ყმებად ითვლებოდნენ, ამიტომ ამათ შორისაც აკრძალული იყო ქალის გათხოვება. ამრიგად სისხლის აღრევის აკრძალვას, რასაც საფუძვლად უდევს ძველთაგანვე მოყოლილი სისხლთ ნათესაობა, სარჩულად საერთო სალოცავიც დასდებია.

მაგრამ გვაროვნული კავშირი მარტო ამით არ განისაზღვრება. გვარი, გვარის თითოეული წევრი, ისე იცავს თავისი გვარის მეორე წევრს, თუნდაც მრავალი თაობით დაშორებულს, როგორც ღვიძლ

ძმას. სადმე სოფელში გვარს რამე უბედურება რომ ეწვიოს, მეორე სოფლიდან გვარი უნდა დაეხმაროს. თუ სოფელში რაიმე მიზეზით გვარი მთლად გადაშენდება, მეორე სოფლიდან იმავე გვარის წარმომადგენლები უნდა დასახლდნენ იქ, რათა მათი გვარ-ტომის ძირეული ნათესაობა არ „გაცივდეს“, არ მოისპოს.

სისხლის აღებაც გვარზე იყო: ორ გვარს შუა სისხლი რომ ჩამოვარდეს, საქმეს დედით ნათესაობა ვერ უშველის, — მაგ., დედის შხრივ ბიძაშვილობა ან მამიდაშვილობა. ესენი მოსისხლე მტრებად გადაიქცევიან, რადგანაც მთავარია გვარის სახელი და პატივი. უთანხმოება, სისხლის აღება იშვიათად, მაგრამ მაინც იყო დეიდაშვილებსა, დედისძმისწულებსა, მამიდაშვილებს შორის, ძმათაშვილებშიც კი.

განსაკუთრებით მტკიცე იყო, თითქოს გვარით ნათესაობაზე შეტად, ნათელ-მირონობით ნათესაობა. აქ შეუძლებელია შუღლი, უსიამოვნება, სისხლის აღება. ასეთი ნათესაობა დიდ ხანს გრძელდება. ნათელ-მირონთა შორისაც აკრძალულია ქალის ვათხოვება. გვარ-სისხლით ნათესაობა კი უამრავ თაობამდე გრძელდებოდა (თუმცა, ზოგი მოხუცი ხევსურის თქმით, ცხრა თაობამდე გასტანდა ხოლმე).

ყველა ზემოთქმულის გამო ცხადია, რომ მემკვიდრეობაც მამრობითი სქესის ხაზით მიდიოდა. ოჯახის მთელი ქონება რჩებოდათ ვაჟიშვილებს და ქალიშვილებს არავითარ შემთხვევაში არა. თუ ოჯახში არ იყო ვაჟი—მემკვიდრე, ქონება გადადიოდა გვარით ახლონათესაზე—ძმაზე, ძმისწულზე. შემდეგ ბიძაშვილზე, გარე ბიძაშვილებზედაც კი.

მაგრამ ამითაც არ ამოიწურება გვაროვნული კავშირი. როგორც ვთქვით, გვარს საერთო სალოცავი (ხატი, ჯვარი) ჰყავდა და ეს აკავშირებდა გვარს, ვიმეორებთ, იდეოლოგიურად. მოხსენებული გვექონდა, რომ სოფ. ამლაში მთლიანად წიკლაურები ცხოვრობენ. მათ შორის არიან ძალიან მახლობელი ნათესავეებიც და ძალიან დაშორებულნიც, სულ სხვა მოდგმისანიც კი, მაგრამ რაკი ისინი ერთ სოფელში ცხოვრობენ. ჰქონდათ საერთო სასოფლო ხატი, სასაფლაო და მიწა, ამიტომ ისინი ერთგვაროვნულ ჯგუფს წარმოადგენდნენ.

გვაროვნული, გვარის, სიმტკიცის დასანახვებლად ასეთ მაგალითს ვიტყვით: ვთქვათ ერთი გვარის ორ კაცს — საჩინასა და ალუდიკას — რამე ჩხუბი, შუღლი, მოუვიდათ. დავაში საჩინას თა-

ვისი მახლობლები მიეშველებიან, ალუდიკას — თავისები, მაგრამ თუ ამ დროს მეორე გვართან მოხდა შუღლი, მაშინ საჩინა და ალუდიკა და მათი მახლობლები შესწყვეტენ შუღლს და ერთად იბრძობებენ ამ მეორე გვარის წინააღმდეგ.

ხევსურეთის გვაროვნული წყობის შინაარსი ისეა დაზუსტებული, წყობილი, რომ კვლევის დროს არავითარ გაუგებრობას არ იწვევს.

საერთოდ, დიდი პატივი იმ გვარს აქვს, რომელიც თავს მტკიცედ იცავს, რომელსაც თავი არასოდეს შეურცხვენია გვარ-სისხლის წარყვნით. ამ სულ ბოლოდრომდე, შატილიონებს ერთი დიდი უპირატესობა ჰქონდათ. შატილიონების ქალის თხოვება სიძეს ძალიან ძვირად უჯდებოდა. შატილიონების ქალის წაყვანა დიდ პატივად ითვლებოდა და ამიტომ, სიძე დიდად იბეგრებოდა, ხოლო თუ შატილიონელი ირთავდა სხვა გვარის ქალს, ასე ძლიერად არ იბეგრებოდა, არამედ იბეგრებოდა ქალის მხარე. **საბჭოთა ხელისუფლების გავლენით, შატილიონების ეს პრივილეგია გაუქმდა.**

რომელიმე გვარს რომ ვენერითული სენი რამ შეამჩნიონ — თუმცა ეს მოვლენა ძალიან იშვიათია ხევსურეთში, — მას **დამპაღს** უწოდებენ, და იქ არა თუ არ გაათხოვებენ ქალს, ან მოიყვანენ იქიდან, არამედ ახლოც არ გაქაჭანდებიან.

გვაროვნული კავშირის გასამტკიცებლად კაცები ერთმანეთში დადიან როგორც ჭირში, ისე ლხინში. ყოველ წლისთავზე უეჭველად ინახულებენ ერთმანეთს, გვაროვნული ალერსით მოიკითხავენ, გაიხსენებენ წარსულს, შეათვასებენ აწმყოს, მომავალს. ეს კავშირი ზორციელდებოდა **ათენგეობას**. ნათესაური მიმოსვლა აქვთ აგრეთვე დისწულებში, დედით ბიძებში, მოყვრებში (ქმრისა და ცოლის დედმამის ოჯახში). მისვლა-მოსვლის საბაბია — ქალის გათხოვება, შვილის შეძენა, ცოლის შერთვა. მოაქვთ მოსაკითხავი — არაყი. ახალწელიწადს — ბედისკვერი, ერთი ხმიადი, ხავიწიანი ქადა, არაყი.

## საზოგადოებრივი წყობილება

გვარს ჰყავდა ერთი ამორჩეული კაცი — **კითხული კაცი**. კითხული კაცი, რასაკვირველია, ჰქვიანი; გამოცდილი, ბრძენი უნდა ყოფილიყო უემისოდ გვარში არ გადაწყდებოდა არც ერთი, თუნდაც წვრილმანი საქმე. ყოველ გასაჭირში მას ეკითხებოდნენ როგორც საერთო საგვარეულო, ისე სათემ-სოფლო საქმეს. კითხული კაცი მსაჯულიც იყო, თემსოფლის საქმეთა მომრიგებელიც, გვარის წინამძღოლიც.

ასეთი კითხული კაცის გარდა, ძველად ხევსურები (და ფშა-  
ვლებიც) ირჩევდნენ თითო ჭკვიან კაცს. ასეთ კაცს ხევსურეთში  
**მომროგებელი — მრჩველი** ეწოდებოდა (ფშავში — **ბრძენი**). ახ-  
ლაც ახსოვს ხალხს ბრძენი ადამიანები — **დათვია ხახუაისძე** (ხევ-  
სურეთში) და **ჭულურა ულუნჩაური** (ფშავში). ბრძენ კაცებს ირ-  
ჩევდნენ განუსაზღვრელი დროით. ისინი მთელს თავიანთ სიცოც-  
ხლეში განაგებდნენ ხეობას.

ამათთან თანაბრად ირჩევდნენ კიდევ ხუთ კაცს.

ამორჩეულთა სიტყვა კანონი იყო. თუ ხევსურებსა და ფშავ-  
ლებს რამე შუღლი მოჰყვიდოდათ, მის გადასაწყვეტად იწვევდნენ  
ამ ბრძენ კაცებს. რასაც ისინი გადასწყვეტდნენ, იმის თანახმანი  
იყვნენ ორივე ხეობის მცხოვრებნი.

შემდეგში, ისტორიულ პროცესში, ასეთი ბრძენი კაცების  
ინსტიტუტი შესცვალეს **დეკანოზებმა და ხევისბერებმა**:

დიდი საქმეები ირჩეოდა ბრძენი კაცების უზენაეს. საბჭოში,  
მაგრამ სანამ აქ გადაიტანდნენ საქმეს, მას არჩევდნენ თითოეულ  
თემში ცალცალკე. ამრიგად, იყო კიდევ ერთი ორგანო, ქვემდგომი,  
რომელსაც ახლაც ასე ეწოდება — **მობჭენი**. ეს იყო სოფლის სამე-  
ლიატორო სასამართლო, ანუ სოფლის საბჭო.

მთელ ხევსურეთში ირჩევდნენ კიდევ ეგრედწოდებულ **კუთხა-  
კუთხის** კაცებს. სულ ირჩევდნენ ოთხ კაცს. ესენი წარმოადგენდნენ  
მთელი ხეობის უმაღლეს საბჭოს და არიგებდნენ გვართა შორის  
აღძრულ საქმეებს.

რასაკვირველია, ირჩევდნენ ისეთებს, რომლებიც ცნობილნი  
იყვნენ ჭკუით, სიღარბაისლით. თუ მოკვდებოდა ან რამე მიზეზით  
გამოვიდოდა საბჭოდან რომელიმე წევრი, მაშინვე ირჩევდნენ სხვას,  
ისეთს, რომელიც უკვე დიდი ხანი ჰყავდა ხალხს თვალში აწონ-  
დაწონილი, შესწავლილი, ნაცადი ზნეობრივი სიფაქიზის მხრით.

ამრიგად, ხევსურეთში სამი საზოგადოებრივი დაწესებულება  
იყო: ბრძენი კაცები **მრჩველნი** (უზენაესი), თემის (სოფლის) —  
**მობჭენი** (ქვემდგომი) და **კუთხა-კუთხის** ხალხი.

დიდი სათემო საქმეების გასარჩევად სამი ადგილი ჰქონდათ:  
პირველი — სოფ. ოხერხევის გორის ბოლოში; მეორე — საირმიაზე,  
ლულისჭალაში; მესამე — გიგაურთის ველში, ანუ სოფ. მოწმალს-  
ჭალაში. დიდი საქმეების გარჩევაზე მიიტანდნენ ხოლმე ორ  
მთავარ დროშას — გუდანის ჯვრისას, და კოპალის ჯვრისას. ესენი

ყველაზე მეტად აშინებდნენ ხალხს და იყო სიმბოლო დამთრგუნველობისა.

როცა ერთი გვარის საქმე ირჩევოდა, ამაში მეთაურობდა მარტო ამ გვარის კითხული კაცი, მაგრამ როდესაც ირჩევოდა სათემ-სასოფლო დიდი საქმე, მაშინ იწვევდნენ კუთხა-კუთხის კაცებს და მთელი ხეობის მომრიგებელი მრჩეველები ბრძენის მეთაურობით არჩევდნენ საქმეს. საქმე გრძელდებოდა რამდენიმე დღეს. დღით და ღამით შეუწყვეტელი სჯა-კამათი ისეთი ცოცხალი, ბრძნული აზრებით სავსე, რომ უცხო მაყურებელი განცვიფრებაში მოდიოდა. იქ არც ბრალმდებელი იყო, არც დამცველი, არც ჯალათი, არც ჟანდარმერია, არც ცრუ მოციქული მღვდელი; დამნაშავეს არც ციხე აშინებდა, არც სახრჩობელა. დამნაშავეს აშინებდა თემ-სოფლის მსჯავარი, გაკიცხვა, შეჩვენება და წელში გამწყვეტი დაბეგვრა-დაჯარიმება. განაჩენის სამართლიანობაში კი არც ერთ ხევსურს ეჭვი არ შეუვიდოდა. ყოველნაირ მსჯავრს, გამანადგურებელსაც კი, იგი უყუყუანოდ ემორჩილებოდა.

მოსამართლეები მსჯელობდნენ სრულიად მიუდგომლად, სიმართლითა და ხევსურული რჯულის (სამართლის) წესების სრული დაცვით. ისინი თავს ვალდებულად ავლიდნენ ეხელმძღვანელოთ ასეთი პრინციპით:

„ბერო, ბერობას ნუ შჩივი,

მაკლებას თვალებისასა,

ეცადე ჭკვა-გონებასა,

რიგებას თემ-სოფლისასა,

სწორ-სწორად ვაჯავრდომასა

თავისასა და სხვისასა,

ჯერ ბოლოს გაიკეთებდი

მერმ გზასა სულეთისასა“.


ამ მორალის საილუსტრაციოდ მოგიტხრობთ ერთ ამბავს. ჩემი იქ ყოფნის დროს არხოტის თემში იყო ერთი განთქმული, ბრძენი კაცი, კითხული კაცი, თათია ბალიაური, მახვილი გონების პატრონი. მთელ არხოტის თემში დიდ კთხულ კაცად ითვლებოდა, მაგრამ ფიცხი იყო, ყველაფრის სწრაფად ამთვისებელი. ერთხელ თემში მან რაღაც დანაშაული ჩაიდინა. მთელ თემში კაცი ვერ ნახეს, რომ მისი გასამართლება შესძლებოდა. რაკი ვერ გასამართლეს, მან თითონ გამოუტანა განაჩენი თავის თავს და თავი მოიკლა თოფით.

ომის დროს ან მტრის შემოსევისას, ხალხის სარდლობა ეკისრებოდა მთავარი ხატის დეკანოზს.

ხევსურეთი მთის ხალხთა შორის ისეთი ხალხია, რომელმაც შეჰქმნა ყველაზე თავისებური ყოფა-ცხოვრება. თითქმის ყველა ის საყოფაცხოვრებო მოვლენა, რაც ახასიათებს, მაგ., — ამერიკის ძველ ბინადართ — იროკეზებს, — ხევსურებსაც ახასიათებს. იროკეზების ხალხის მრჩეველ, ჰკვიან კაცს ეწოდებოდა **სახემი**. ხევსურეთში ასეთ კაცს — **კითხული** კაცი. იროკეზების ხალხურ საბჭოში შედის რამდენიმე სახემი და დანიშნულ ადგილას მათს შეკრებას ჰქვია „სახემების საბჭო“; ანალოგიურ დაწესებულებას ხევსურეთში ეწოდება „კუთხა-კუთხის ხალხის საბჭო“. იროკეზების სამხედრო ბელადები საზოგადოებრივ როლსაც თამაშობდნენ; ხევსურეთშიც ასეთები იყვნენ **მომრიგებელი მრჩეველები, ბრძენი კაცები და სხ.**

ხევსურეთში მთავარი სალოცავი იყო **გუდანის ჯვარი**. ამ ჯვარის საკუთარ საყმოდ ითვლებოდნენ არაბულები, ჭინჭირაულები და გოგოჭურები. რადგანაც ესენი წარმოადგენენ ხევსურათის ფუძე, ძირეულ მოსახლეობას და ყველაზე მრავალნი არიან, ამიტომ ლაშქრობაში მთავარი როლი ამათი იყო; მათივე ხატი იყო ომში წინამძღოლი. სხვა გვარები კი მხოლოდ ემორჩილებოდნენ მათ. გუდანის ჯვარის წინაშე ყველა ხევსური დებდა ფიცს გამარჯვებისათვის. ამრიგად, ხევსურეთის ლაშქარი გუდანის ჯვრის ერთ დიდ ფრატრიად შეიძლება განვიხილოთ. ომს სარდლობდა გუდანის ჯვრის დეკანოზი. ამას გარდა, ყველა გვარს თავისი სალოცავი ჰქონდა.

დეკანოზი შეიძლება ყოფილიყო კითხული კაციც. ყოფილა შემთხვევა, რომ რომელიმე პატარა თემ-სოფლის ხატის დეკანოზი მთელი ხევსურეთის კითხულ კაცად გამხდარა.



დეკანოზები (გუდანის ჯვრისა და კობალასი) ლაშქარს რომ მეთაურობდნენ, ეს სულ ძველად ყოფილა. შემდეგ კი, ასეთ მეთაურად გამხდარა ეგრეთწოდებული გაველიანი კაცი, ადამიანი, განთქმული სიმამაცით, გამჭრიახობით. ასეთ კაცს ჯარის მეთაურად არც ირჩევდნენ, არც ნიშნავდნენ. ლაშქრობაში ის თავისთავად ხდებოდა მეთაური, როგორც გულადი, გონიერი ადამიანი.

## სარწმუნოებრივი კულტი

ხევსურები ხატს ისე არ უყურებდნენ, როგორც ეკლესიას უყურებდნენ საერთოდ სხვაგან. ხევსური ხატში „სულის საცხონებლად“ არ მიდიოდა. ხევსურისათვის ხატი დამხმარე, მშველელი იყო ყოველგვარ საქმეში.

ხატი (ჯვარი) მრავალია ხევსურეთში. მავრამ მთავარი ოთხია — გუდანის ჯვარი, მთავარანგელოზის ჯვარი, ხახმატის ჯვარი, და ლიქოკის ჯვარი.

ლიქოკის ჯვარში ბრძანებლობდნენ კობალა და იახსარი.

ეს ჯვარი გამოდიოდა, ასე ვთქვათ, მაცდურის (ეშმაკის) გზაზე დამდგარის მხსნელი, ე. ი. უბედურებისაგან მხსნელი. ვინც თავს მოიკლავდა, ზვავისაგან დაიღუპებოდა, წყალში დაიხრჩობოდა ლიქოკის ჯვარს შეავედრებდნენ. თუ ხალხს რაიმე საერთო გასაჭირი მიაღებოდა. მთელი თემი კობალას ან იახსარის ჯვარს შეევედრებოდა განსაცდელისაგან დასახსნელად.

გუდანის ჯვარში „ბრძანებლობენ“ „ღვთის მშობლისა“ და გიორგის ხატები. გუდანის ჯვარი ორივე სქესის სამლოცველო იყო. ესეც, ვითომც, მფარველობდა ხალხს ყოველგვარ გასაჭირში.

ხახმატის ჯვარის დანიშნულება იყო უშვილოსათვის შვილის გაჩენა; მეტადრე მას ევედრებოდა ის, ვისაც ვაჟი არა ჰყავდა. ამ დანიშნულებისათვის, ხახმატის ხატში განსაკუთრებული ნიში დგას მწევრის საფლავი; აქ ორსულ დედაკაცს ან უშვილოს ფეხს შეადგმევინებდნენ, რომ შვილი გაეჩინა, მეტადრე ვაჟი. მწევრის საფლავზე ყოველ წელიწადს ურიცხვი საკლავი იკვლებოდა. აქ სალოცავად მოდიოდნენ ხევსურებიც, თუშებიც, ფშაველებიც. მწევრის საფლავის ნიშის თავზე ერთი ქვაა, რომელიც მამაკაცის სასქესო ორგანოს მოგაგონებთ. ალბათ, ხევსურები ოდესმე ფალოსის კულტის თაყვანისმცემლები იყვნენ.

მართლაც და, წარმართობის ნაშთების მხრივ ყველაზე საინტერესოა ეს ხახმატის ჯვარი. მას ლაშაზი ბუნებრივი მდებარეობა



აქვს. აღმოსავლეთით ჩაუდის წყარო სტეჭურა. მის გადაღმა აშენებულია სახლი მლოცავი (მეხატიონე) ქალებისათვის **საჯარე**. ქალებს აკრძალული ჰქონდა სტეჭურაზე გადასვლა. ეს იყო საზღვარი მათთვის სამლოცველოსთან. სტეჭურას აქეთა ნაპირზე კი არის ოდნავ დაფერდებული ვაკე, რომელზედაც დგას სხვადასხვა სახელოვანების ხატის ნიშები. აქ დგას მრავალწლოვანი დიდრონი იფ-



მწვერის საფლავი.

ნები, ვეებერთელა გაშლილი ტოტებით. ამ ხეების ჩრდილში ღრეობდნენ ხატიონები (ანუ მეხატიონები). ვაკეზე აქა-იქ, მეჩხერად ყრია დიდრონი ლოდები. ვაკის თავში, ჩრდილოეთის მხარეზე, აშენებულია მთავარი ხატის სახლი, რომელსაც ზევიდან გადმოჰყურებს **ხანმატის ჯვრის ციხე**. მის ახლოს ვერავენ გაივლიდა ვინც გაივლიდა მას დააჯარიმებდნენ ერთი საკლავით და უკანასკნელად გააფროთხი-

ლებდნენ. ხევსურების თქმით იქ იყო ქაჯეთის ციხიდან მოტაცებულნი, ძვირფასი ქვებით მოჭედილი ძროხის რქა და ოქროს ჩონგური.

მთავარი ხატის სახლში სამი ოთახია — **საკოდე, დარბაზი და საქობე.**

ხანმატის ჯვარს სამხრეთით ჩამოუდის დარისთვალა, — პატარა არაგვის მდინარე. დასავლეთით აკრავს ბუნხუელას ციხე და სოფ. ბისო.

მთავარი ხატის სახლის გვერდით მწკრივად იდგა სამი ნიშნავადასხვა სამლოცველო დროშებისათვის. ქვემოთ, ვაკის ბოლოში არის მწვერის **საფლავის ხატი**, რაც იყო ძეობის სიმბოლო. როგორც ზემოთ ვთქვით, აქ სალოცავად და საკლავით მოდიოდნენ უშვილო და უვაჟო დედაკაცი. საკლავად აქ აუცილებლად თიქანი უნდა ყოფილიყო.

სტექურას გამოღმით, საჯარე სახლის პირდაპირ, ხატის პატარა ნიშია. მის წინ, მარიამობას, აუარებელი ბატკანი იკვლებოდა მლოცავი ქალების გასანათლავად. მლოცავი ქალი ბატკანს გადასცემდა ხატის მსახურს, **დახტურს**. მთავარი ხუცესი დაჰკლავდა ბატკანს. ყელიდან გადმოსულ სისხლს დედაკაცი შეუშვებდა ხელს, გაიზანდა და მერე უკანვე გადახტებოდა სტექურაზე. ხანმატის ჯვრის დღეობა აგვისტოში იყო, მარიამობას. აქ სალოცავად მარტო ხევსურები კი არ მოდიოდნენ, არამედ ფშაველებიც, თუშებიც, კახელებიც კი. მაგრამ, ეს ჯვარი, უმთავრესად, მაინც ქალების სალოცავი იყო. ქალებსა და რვთისმშობლის შუა აქ შუამავლად, მეშუედ ქალებივე იგულისხმებიან — ანგელოზები. მათ ეძახდნენ **გიორგი ნალვარმშვენიერის მოღვმომხრეს**, გიორგის **აზადს**, გიორგი ნალვარმშვენიერის **გათამამებულებს** (აზადი — თამამი), გიორგის **ყელილიანებს**: ამ აზად ქალებში ყველაზე ძლიერი, თამამი და გავლენიანი ანგელოზი იყო — **სამძიმარა**, ანუ **სამძიმარა ხელანგელოზი**.

ამ ნალვარმშვენიერი გიორგისა და სამძიმარაზე ასეთი თქმულებათ დარჩენილი:

ხანმატში ყოფილა წმინდანი — **გიორგი ნალვარმშვენიერი**. მას ხატისათვის შეუყენებია (ე. ი. ბერად დაუყენებია) **კორმეშელი გახუა**; გახუა უცოლო ყოფილა. ნალვერმშვენიერი ქაჯეთს წასულსა საომრად, გახუაც თან ჰყოლია. ქაჯებს გიორგი და მისი მხლებელი დახოცილი კაცების თავ-ფეხებით მოუგერებიათ. გიორგი ადამიანის ხორცს ვერ მიჰკარებია. გახუა კი ხელოსანი ყოფილა და იგი შესულა ქაჯების ციხეში. მას ღვთისშვილები (ხატები)

შეპყოლიან. გახუას გაუტეხნია. ქაჯების კიდობანი, ათასნაირი გან-  
 ძიბა და სიმდიდრით სავსე. ციხიდან გამოსასვლელად, გიორგი-  
 ნალვარმშვენიერს გახუა ცხენის სტომაქში ჩაუსვია და ასე გამო-  
 უყვანია, რადგანაც ქაჯები ცხენის სტომაქს ვერ მიეკარებოდნენ  
 თურმე. ქაჯეთიდან წამოღებული ნადავლი გიორგი ნალვარმშენი-  
 ერს ხევსურეთის ხატებისათვის გაუნაწილებია. ყველაზე მეტი კი  
 თავისთვის აუღია. ნადავლში ყოფილა ძროხებიც, ხარებიც, ცხენე-  
 ბიც. ყველაზე შესანიშნავი ყოფილა ერთი საოცარი ძროხა, რო-  
 მელსაც დიდრონი რქები ჰქონია, 6—7 ლიტრის ტევადობისა. გი-  
 ორგი ნალვარმშვენიერი ამ რქას გაცრილი ფქვილის ასაწყავად  
 ხმარობდა თურმე. ქაჯეთიდან წამოუყვანიათ ხუთი ქალიც. სამს  
 ქართული სცოდნია. ერთ მათგანს სამძიმარა რქმევია. სუქალასა  
 და ხეთქალას მარტო ქაჯური სცოდნიათ. სამძიმარას ღვთისმშობ-  
 ლისათვის უთხოვნია, მომნათლეო:

„ქალ სამძიმარა გეხვეწებო  
 მომნათლე. დედა მარიამო,  
 ჩამიშვი მირვნის ქოთანშიო“.

მარიამს სამძიმარაც მოუნათლია, აშექალაც და მზექალაც. გა-  
 ხუას სამძიმარა შეპყვარებია. ზოგჯერ სიხმრადაც კი მოეჩვენებო-  
 და ხოლმე, ხევსურულად ჩაცმული, და გახუას ის ხევსური ამირას-  
 ქალი ეგონა ხოლმე. გახუას სამძიმარასთვის უთქვამს, ჩემთან და-  
 წექიო. ამის შემდეგ გახუას რაღაცა უღიარული შესმენია და ლო-  
 გინზე დარჩენილა ქალის სამკაული. ქალი კი გამქრალა და მერე  
 გახუას იგი აღარ უნახავს. ამის შემდეგ სამძიმარა აქადაგებდა გა-  
 ხუას ასეთი სიტყვებით:

„ქალი ქალურად მოვირთვიდიო,  
 ბოსლით ჭერხოსა ამავეხდიდიო,  
 საყურ-სამკაულ ავისსნიდიო,  
 მეგრელაურსა გახუასაო  
 ამირთ ქალი ვეგონოდიო,  
 საცოლედ ვენდომოდიო“.

როდესაც ხახმატის ჯვარს ქაჯეთიდან ნადავლი მოუტანია, იმ  
 დროს ხახმატში ორი მექონე დედაკაცი ყოფილა: ერთი ვაჟის დედა,  
 მეორე — ქალისა. ქალის დედას გაუხედნია, დაუნახავს მორეკილი  
 საქონელი და უთქვამს:

— აუ, რამდენ საქონი ჩამდგარა მაგ ხახმატის ჯვარში, რა  
 ნხელ ქალები ას. დაილოცა, ხახმატის ჯვრის საქმე იქნების!

ვაჟის დედას უთქვამს:

— ეშმაკებით ავსილა და ეშმაკების თხებით მანდაობა ღმერთმა დასწყვიტა.

ხახმატის ჯვარი გარისხებულა და ვაჟის დედის შვილი ქალად უქცევია, ქალის დედის შვილი—ვაჟად.

ამ მთავარ ხატებს გარდა, სხვა ხატებიც იყვნენ: სამებისა, დიდგორისა და ეგრეთწოდებული დამსჯელი ხატი.

სამების ხატი განაგებდა ბუნების სტიქიურ მოვლენებს და მფარველობდა, განსაკუთრებით ჭირნახულს. თუ ავდარი იყო, დარს დააყენებს, თუ გვალვაა—წვიმას მოიყვანდა. სამების ხატს სოფლელები ყოველ წლივ და რიგრიგობით სწირავდნენ საკლავს. ამ საკლავს ხადარ-ავდროს უწოდებდნენ.

დიდგორის ხატი ზოგადი მნიშვნელობისაა, ე. ი. ხალხს ვითომც ყველაფერში ეხმარებოდა.

დამსჯელი ხატი ბრძანებლობდა ბაცალიგოს თემში. დამსჯელი იმიტომ ეწოდებოდა, რომ თუ ორსული ან თვიურში მყოფი ქალი გაივლიდა მის მიდამოში, იგი დასჯიდა მას: „ცდომილის“ სხეული ლბობას დაიწყებდა, დასცვივდებოდა თმა, წარბები, ცხვირი. ასევე მოუვიდოდა მამაკაცსაც, თუ ცოლი ორსულობის უკანასკნელ თვეში ჰყავდა და ამ ხატის მიდამოში გაივლიდა.

სხვა ხატებიც არიან,—საგვარეულო, სათემო ხატები. მაგ., ზეისტეჩოს ხატი. ეს არის მხოლოდ არაბულებისა და მათი ქალღმერთების ხატი. არაბულის გვარის ქალს სხვა თემში გათხოვილს, მის შვილს, შვილისშვილს, ყოველ წლით მოჰყავდათ საკლავი ამ ხატისათვის.

ხევსური ხატობაში ვერ წავიდოდა, თუ საკლავი არა ჰყავდა, რადგანაც ასეთ მლოცველს ხატი არა ღებულობდა. ვერც ისეთი მამაკაცი მივიდოდა ხატში, რომელიც წინა სამი დღის განმავლობაში დარჩენილა თავის ცოლთან. ასეთ ხევსურს თუ რაიმე აუცილებელი საქმე ჰქონდა ხუცესთან (დეკანოზთან), შორიდან გამოუძახებდა მას. დეკანოზი წაიღებდა ლუდით სავსე ვერცხლის თასს, დაალევიებდა ხევსურს და გამოელაპარაკებოდა. დედაკაცთან ნამყოფი ხევსური კი ამ თასს ხელს ვერ მოჰკიდებდა. მოიხდიდა ქუდს, ორივე ხელისგულზე დაიდებდა. დეკანოზი ქუდზე დასდგამდა თასს და ხევსური ისე დალევდა ლუდს და ამრიგადვე გადასცემდა დეკანოზს.

ცოლ-ქმარს ერთად წოლა შეეძლოთ მხოლოდ ხუთი კვირის განმავლობაში, მეექვსე კვირას კი უნდა გაშორებულიყვნენ ერთმანეთს.

რადგანაც ხატობა ახლოვდებოდა და ცოლთან ნაწოლი მამაკაცი  
ფერ მოვიდოდა ხატში. დედაკაცს უფლება არა ჰქონდა ხატთან ახ-  
ლოს მისვლისა. დედაკაცები შორიახლო სდებოდნენ თავიანთი  
შვილებითა. პატარა გოგოებსაც, ხუთი წლისებსაც კი, აკრძალული  
ჰქონდათ ხატთან ახლოს მისვლა.

ვიმეორებთ, ხევსური ხატში იმისათვის კი არ მიდიოდა, რომ  
„სული ეცხონებია“, არამედ მხოლოდ ყოველდღიური საჭიროების,  
ცხოვრების პირობების, საქმიანობის უკედ წარმართვის მიზნით.  
ადგილობრივი რწმენის თანახმად, თუ ადამიანი შრომობდა, ხატი  
დაეხმარებოდა ყოველგვარ გასაჭირში, საქონლის გამრავლებაში, მო-  
დგმის „დასაძირკვლებაში“, აცდენდა ფათერაკიან გზას და სხ. ხატი  
მარტო კარგ საქმეში კი არ ეხმარებოდა ადამიანს, არამედ ცუდ-  
შიაც—ჭურდობაში, ყაჩაღობაში, კაცისკვლაში. ასეთნაირ საქმეზე  
მიმავალი ხევსური ხატს საკლავს ჰპირდებოდა (წინდაწინ არ დაუკ-  
ლავდა). საქმე უშედეგოთაც რომ დამთავრებულიყო, ხევსური ხატს  
დანაპირს მაინც შეუსრულებდა და საკლავს დაუკლავდა. სანადი-  
როდ მიმავალი ხევსური ხატს ჯიხვის რქებს ჰპირდებოდა, და თუ  
მოჰკლავდა ჯიხვს, რქებს უეჭველად ხატს მოუტანდა. ამიტომაც,  
რომ ხატთან მუდამ აუარებელი რქები აწყვიან. სანადიროდ  
სახლიდან გასვლისას ხევსური პირჯვარს იწერდა და ამბობდა: —  
ღმერთო, ნადირისა და მონადირის გამჩენო, მოგვიმართე ხელი, მო-  
გვეცი ბრმისა და კოჭლის თავი მაინც. (ე. ი. თუ კარგს ვერას მოგ-  
კლავ, უბრალო ნადირი მაინც მომაკვლევენო).

საკლავის მაგივრად შეიძლებოდა რაიმე ძვირფასი ნივთის შე-  
წირვა.

შეწირვათა გამო ყოველი ხატი მდიდარი იყო განძეულითა და  
შიწა-წყლით. ამიტომ, ხევსურეთში, ხატი დიდი მიმამულე იყო. ამ მა-  
მულით სარგებლობდა ხალხი, საერთოდ. ეს გამოიხატებოდა იმაში,  
რომ ამ მამულს საერთოდ ამუშავებდნენ და მოსავალსაც საერთოდ  
ხმარობდნენ ხატობაში. კერძო პირს ხატის მამულით სარგებლობის  
უფლება არა ჰქონდა. მხოლოდ იშვიათ შემთხვევაში აძლევდნენ  
შიწას გაჭირვებულს დასამუშავებლად. ასეთ გაჭირვებულს ხატის  
ამანათი ჰქვიოდა.

ამანათები ყოველ სოფელში იყვნენ თითო-ოროლა. უფრო  
ხშირად, კაცისმკვლელები; კაცისმკვლეელი თავის თემში ვერ დარ-  
ჩებოდა; უნდა გადახვეწილიყვნენ ისეთ თემში, სადაც მოკლულას  
ნათესავეები ადვილად ვერ მისწვდებოდნენ. იშვიათ შემთხვევაში ამანა-

თები შეიძლება იყვნენ გადმოსახლებულნი სხვა პროვინციიდანაც. —  
ქისტეთიდან, ხევიდან.

როგორი იყო ხატის მსახურთა შემადგენლობა?

ხევსურეთში მღვდელი არ იყო, მღვდელი არ სწამდათ.

უმთავრესია ხუცესი. ყოველ ხატს ჰყავდა ერთი ან ორი ხუცესი, მიწვეული ხატის მიერ ან ქადაგის მითითებით არჩეული. ხუცესი უვადოდ იყო არჩეული, სიკვდილამდე. ხუცესი ახალგაზრდა არ შეიძლებოდა. უნდა ყოფილიყო შუახნისა მაინც, დარბაისელი, პატივცემული. მისი მოვალეობა იყო ხატის საქმეების გამგებლობა: როდის მოიმკას ხატის მამული, როდის მოიხარშოს ლუდი, მასვე ევალებოდა დროშის მოვლა და ტარება, შესაწირავი საკლავის დაკვლა. მას ჰქონდა უფლება მისულიყო ხატთან, შეხებოდა მას და მისნიკთებს ხელით; იგი წინამძღოლობდა მთელ თემს, განაგებდა მის საქმეებს, შუღლის დროს ამშვიდებდა ხალხს, ლხინის დროს ალხენდა. ხატის სამსახურში მყოფი ხუცესი განუსაზღვრული უფლებით იყო აღჭურვილი, მის წინააღმდეგ ხმას ვერავინ ამოიღებდა, ხატის კრძალვითა და შიშით. ხატობის გათავების შემდეგ კი ხუცესი ჩვეულებრივი, უბრალო გლეხი იყო. ყოველ თემს ჰყავდა ასეთი ხუცესი.

ხუცესის პირდაპირი თანაშემწე იყო ხელოსანი, ანუ მედროშე. მედროშეს ირჩევდნენ ერთი-ორი წლის ვადით. მისი ამორჩევის წესი ასეთი იყო: კანდიდატი 5—6 კვირით უნდა გამოირდეს სოფელს. ამ ხნის განმავლობაში მან ყოველდღე უნდა იბანაოს ისეთ მდინარეში, სადაც არც საქონელი დადის, არც სარეცხი ირეცხება და არც თევითი მღვარი ქალები დაიარებიათ. ამ ახალგაზრდას სოფელი უცხოვს ქადებს, უხდის არაყს და უხარშავს ხინკალს. მთელი ეს ამბავი იწყებოდა რომელიმე დიდი ხატის წინ ხუთი კვირით ადრე. ხატობის დაწყების წინ კანდიდატი კიდევ უნდა გაბანილიყო ცხრა წყაროში, ჩაეცვა სრულიად ახალი ტანისამოსი და გადაეხადა სახელო, ე. ი. ამ დღეობისათვის მას საკუთარი ხარჯით უნდა მოეხარშა ლუდი, გამოეცხო იმდენი ცალი პური, რომდენიც კომლია სოფელში, დაეკლა ერთი კურეტი\*, მოეხარშა, მისი ხორცი დაეწყო თითო პურზე, ახალი ლუდით უნდა გაეცსო თასები და დაედგა სუფრაზე. სუფრა იშლებოდა მრგვალად. გარშემო ანთებდნენ სანთლებს. კანდიდატს ჩააყენებდნენ სუფრის შუაში. ხუცესი იხუცებდა (დაგლოცებოდა) იმ ხატისათვის, რომლის სამსახურად ემზადებოდა ახალგაზრდა. ამის შემდეგ ის ითვლებოდა ხატის მსახურად, ხელოსნად, ანუ მედ-

\* ანუ კურატი—ახალგაზრდა კურა. (ბულა).

**როშედ.** მას უფლება ჰქონდა ეარა ხატის მიღამოში, ხელით შეხებოდა ხატსა და მის ნივთებს. მაგრამ არ იყო ხუცესის განსაკუთრებული უფლებით აღჭურვილი.

ხელოსნის შემდეგ, ხატის მსახურნი იყვნენ **დასტურებზ.** მათ ირჩევდნენ ერთი-ორი წლით. მათი მოვალეობა იყო ხატის ყანების დაცვა, მომკა, გაღწევა; შეშის დამზადება, ლუდის მოხარშვა; ხატისათვის ერბოს გადახდა; ხატში მოსული ხალხის მომსახურეობა და მისთანანი.

შემდეგ, ხატს ჰყვანდნენ **ღიასახლისებზ.** ამათ ირჩევდნენ უსათუოდ დასტურების ოჯახებიდან. ღიასახლისებად ისეთ დედაკაცებს ირჩევდნენ, რომელთაც თვიური სულ ცოტა, ერთი წლის წინათ მაინც ჰქონდათ შემწყდარი. ღიასახლისების მოვალეობა იყო ხატობაში ქადების ცხოვა; სხვა არაფერი. ღიასახლისებისათვის ხატში აშენებული იყო ცალკე ბინა — **სადიასახლისო.**

დასტურებს ჰყავდათ ერთი ან ორი თანაწემზე — **ჩანჩხი** ანუ, უფრო ძველებურად, **შულტა.**

ხატს ჰყავდა აგრეთვე **მაგანძური**, ე. ი. ხატის ქონების მომვლელი და მეთვალყურე.

იმ შენობას, სადაც ხატის სიმდიდრე და წმინდა ნივთები ინახებოდა და სადაც ხუცესი, ხელოსანი და დასტურები ასრულებდნენ თავიანთ მოვალეობას, **დარბაზი**, ანუ **ბეღელი** ერქვა.

ყოველ ხატს ჰყავდა ევრეთწოდებული **დობილნი** (ესენი ალბათ, ერთგვარი ანგელოზნი იყვნენ). მათი მთავარი მოვალეობა იყო მეთვალყურის დევნება ხალხზე. თუ ვინმე რამეს დააშავებდა დობილნი დაასმენდნენ ხატთან. ამიტომ ხევსურებს ეშინოდათ მათი და დიდი მორიდებით ექცევოდნენ. დობილთ ასე ლოცულობდნენ: დედაკაცები გამოაცხოზდნენ ხოლმე სამოცდასამ ძალიან თხელ ნამცხვარს **აშალს**. ერთი აშალი სხვებზე დიდი იყო მას ეწოდებოდა: **საწინაო**. იგი გულიანია — ხავიწიანი (ხაჭოიანი). აშალს მიიტანდნენ იმ ნიშთან, სადაც დობილნი ლოცულობდნენ. აქვე გროვდებოდნენ სოფლის ბავშვები. ხუცესი დალოცავდა აშალს, შემდეგ ბავშვებს გადაუგდებდა საწინაოს, მერე კი ნელ-ნელა გადაუყრიდნენ დანარჩენ აშალსაც. აქ დიდები არა მონაწილეობენ. ბავშვები კი გადაყრილ აშალს დიდი სიამოვნებით და ჟივილ-ხივილით იტაცებდნენ.

აშალბ აუცილებლივ დილით, მზის ამოსვლასთან უნდა. **დაშლილიყო** (დაირღვეს) ან მზის ჩასვლასას. ეს იმიტომ, რომ დობილნი ამ დროს იფანტებოდნენ თავიანთი ალაგიდან და თუ ვინმე ბავშვი

ან ქალი მოხვდებოდნენ იმ ადგილას, სადაც ხატის მიჯნა იყო, და მწვერვალთაში, ე. ი. მზის ახლადდაცემულ სხივებში გაეხვია, ავად გახდებოდა — დააყრიდა მუწუკებს, რომლებიც მერე დოყვებად გადაიქცევოდა, ავადმყოფს სიცხეს მისცემდა, ჭკუაზე შემოლიდა. ამისთანა ავადმყოფისათვის დაშლიდნენ აშალს და შესწირავდნენ თიკანს.

დობილთა პირდაპირი დანიშნულება იყო დაეცვათ ხატის ადგილები შეურაცხოვისაგან: არავის გაეარა ხატის ადგილზე მზის ამოსვლისასა და ჩასვლისას, არავის ეჭურდა, დაეფურთხებია იქ; არ მოიფეხსადგილებია, ხატის ნივთებს უდიერად არავინ მოპყრობოდა და სხვ. ასეთი რამ ძლიერ საშიში იყო.

დობილნი თან მიჰყვებოდნენ მზის გრილას, ანუ ჩრდილს.

იმ ადგილას, სადაც დობილნი ილოცებოდნენ **დობილთ ხავალა** ერქვა.

ხატის დობილნი, ხატის შეურაცხოვისათვის ადამიანთა გარდა თითქოს საქონელსაც ვნებდნენ მეტადრე ძროხას. ძროხას დობილის მიზეზით უფრო ხშირად ძუძუ უვადდება. ასეთ შემთხვევაში ქალები ანთებდნენ თაფლის სანთელს ან აცხობდნენ **სადობილოს**, უფრო კი აშალს. სადობილოა ქადა (ერთი ან ორი). ქადაზე სდებდნენ პატარა კვერს და ზედ დაზნთებდნენ სანთელს. ამით შევედრებოდნენ დობილთ.

ხევსურებს დიდი კრძალვა ჰქონდათ დობილებისა. დედაკაცები დარწმუნებული იყვნენ რომ მათ კარებთან ყოველთვის დგანან დობილნი და თუ რამეს გაიგონებენ, მაშინვე შეატყობინებენ ხატს.

ამ ბოლო დროს, რასაკვირველია, საბჭოთა ხელისუფლების გავლენით, ხევსურების ძველებური რწმენა ძალიან შეირყა. ცრუმორწმუნეობამ დაჰკარგა თავისი უწინდელი ძალა: დობილებმა კი, ხატის ამ ჯაშუშებმა, მთლად დაჰკარგეს მნიშვნელობა.

ზოგ ხატს ჰყავდა ლაშქარნი და მწევარნი: უპირველესად ყოვლისა მათი მოვალეობა იყო რაც შეიძლება მეტი ზიანი მიეყენებიათ ადამიანისათვის, მაგრამ დახმარებასაც უწევდნენ იმას; ვინც შორს არის სადმე წასული და გზაში ხიფათი მოელოდა.

ლაშქარ-მწევართ ლოცულობდნენ იქ, სადაც მათი ნიში იყო ხევსურულად, **ლაშქარ-მწევართ საფლავი**. ეს საფლავები ხატის წმინდა ადგილების ფარგლებშია. აქ ან ნიშია აგებული, ან რამე ნიშანია დადებული. მსხვერპლად უკლავდნენ თიკანს და ბატკანს.\* დაკლულ

\* თიკანს უკლავდნენ მხოლოდ დობილებსა და ლაშქარ-მწევრებს.



თიკანსა და ბატკანს მუხლებში მოაჭრიდენ წინაფეხებს. ფეხებს სტო-  
ვებდენ საფლავზე. დაკვლის შემდეგ (დასაკლავს ეწოდება **ზღვენი**)  
ამავე მიზნით, ლაშქარ-მწევართა საფლავზე ზოგჯერ, ლამისთევაც  
იმართებოდა. ლამისთევლად მესხეწური გამოხდის ლუდს. გამოაცხობს  
ქადას, წაიყვანს ზღვენს და საფლავზე მართავს ქეიფს. ქეიფი იწ-  
ყებოდა ხუცესის ლოცვით **თას მახსენებით**. სუფრაზე იმდენი თასი  
უნდა იდგეს ლუდით სავსე, რამდენიც **ღვთისშვილია ხევსურეთში**,  
ე. ი. ხატი. ყოველ თასზე ასახელებდნენ რომელიმე ხატს ან ჯვარს.  
ყოველ თასზე დაანთებდნენ სანთელს. ამით იწყებოდა ხუცობა—თას  
მახსენება. ხუცესი პირდაპირ შიმართავდა იმ ხატს, რომელთანაც  
ითვლებოდნენ ლაშქარ-მწევარნი, და სთხოვდა დახმარება ვაეწია  
გაჭირვებულისათვის, რომლისთვისაც იმართებოდა ეს ლამისთევა.

ასეთი რამ უფრო ხშირად ხდებოდა **ძენგლის დაღების** სახით. ძენ-  
გლი არის ადამიანის მიერ ნაკისრი ვალდებულება, რაიმე დანა-  
შაულის სამაგიეროდ. ძენგლის გადახდა ლამისთევის სახით იცოდნენ  
წელიწადში ერთხელ ან რამდენიმე წელიწადში ერთხელ, იმის მი-  
ხედვით თუ როგორი პირობა ჰქონდათ დაღებული. ძენგლს სდებ-  
დნენ უფრო ხშირად იმ შემთხვევაში, თუ ხატს მოჰპარავდნენ რამეს  
ან სხვა რაიმე დანაშაული ჩაიდინეს მის წინააღმდეგ. ძენგლს  
ივალდებულებდნენ მაშინაც, თუ რამეს სთხოვდნენ ხატს.

ამრიგად, ძენგლის დება უმთავრესად სასჯელია. ეს სასჯელი  
უდავო იყო და თაობიდან თაობაზე გადადიოდა. სასჯელს ადებდა  
ხალხი. ხევსურს შეეძლო არ მიეღო ეს სასჯელი. ვინც მიიღებდა,  
იმას ეწოდებოდა **მეძენგლე**. ძენგლი უბრალო დანაშაულებისათვის  
არ დაედებოდა ადამიანს.

ხატობა ხევსურეთში წლის განმავლობაში მრავალჯერ იმარ-  
თებოდა, თითქმის ყოველ თვე. ნაკლები მნიშვნელობის ხატობას მარ-  
თავდა თემ-სოფელში ერთი გვარი ან მარტო ერთი ოჯახი. ოჯახი  
იხდიდა სამღთოს ბავშვის დაბადების ერთი, სამი ან ხუთი წლის თავ-  
ზე. ასეთი ხატობა იმართებოდა ბავშვის წლოვანობის მხოლოდ კენტ  
რიცხვზე; მაგრამ იმართებოდა საყოველთაო, მთელი ხევსურე-  
თის მნიშვნელობის ხატობაც. ასეთია **ათენგენობა, ამაღლება, მა-  
რიამობა და გიორგობა**.

ყოველ ხატობაში მსხვერპლის დაკვლისას (მსხვერპლად ითვლე-  
ბოდა ხარი, მოზვერი, თიკანი ან ბატკანი) მთავარი ხუცესი (დეკა-  
ნოზი) **ხუცობდა**—ილოცებდა. ხუცობა ყოველთვის იწყებოდა წინასი-  
ტყვაობით. წინასიტყვაობა იწყება ასე: „გადიდას, გაგიმარჯოს ღმერ-

თმა ამ პირისაბანზე, სადიდებელზე! მთავარო ანგელოზო, შენ უშველე მეხვეწურს, შენ ბედი-დავლათი დაახზარე!“ და შემდეგ: „აა, დიდება ღმართსაო, დიდება დღესინდელ ძალ ღვთისასა, დიდება და გამარჯვება შენდა, მთავარო ანგელოზო! გევედრებიან, გეხვეწებიან მამაშვილები,—რასა მხარ-გულზე გეძახოდან, იმ მხარ და გულზე დაეხმარიდი, კაცის მეხვეწური იყვასა, კაცსა ბოლოს უმატიდი, შორსმყოფი ახლოს დაუხთიდი, უშველიდი, უბოიშნიდი, შენ კაბის კალთას ჩააფარიდი, სხვა თუ რა ღვთისშვილი უწყრებოდას, უმრუდებოდას, შუ გაურიდი, წაღმ გაურიდი, სხვა, მყუდრო შარა გაასწავლიდი. ჩემგნივ რაც დიდება-ხსენება გაკლდებოდას შენ შენს წყალობას ნუ მააკლებ. ღმერთმ შენს ბატონობას გაუმარჯოს!“.

როცა ხუცესი ხუცობას გაათავებდა საძღვნე საკლავს, რომელიც იქვე დასტურს ეჭირა, ყელში ხანჯალს გამოუხსევებდა, გასისხლიანებულ ხანჯალს ყელგამოჭრილი საკლავის კრაველზე გასწმენდდა და ქარქაშში ჩააგდებდა. ამით თავდებოდა ხუცესის მოვალეობა.

ხატში დაკლული საქონლის ტყავს, თავ-ფეხსა და ხორცს ხუცესები და დასტურები ინაწილებდნენ, მხოლოდ ნაწილს უგზავნიდნენ მლოცველებს **მეძღვნის** ხელით. ტყავსა და თავ-ფეხს ხუცესები და დასტურები ასე იყოფდნენ: ტყავსა და თავ-ფეხს ცალცალკე დააღებენ, მერე ხატის რომელიმე სტუმარს მისცემენ ადლისოდენა ჯოხს. სტუმარი ჯოხს ხელს წაავლებს შუაში. სტუმარი ჯოხის ერთ წვერს ტყავისაკენ მიმართავს, მეორე წვერს—თავ-ფეხისაკენ. ხუცესი ან დასტურა იტყვის: ძირი მე, წვერი შენ.

მეორე სახუცესო საგანია **სანთელ-სადიდებელი**. ეს არის ქაღები სანთლებიანი და მასთანავე რაიმე საწირი—ფული, ვერცხლის ან სპილენძის ნივთი, შეძლებისა და სურვილის მიხედვით.

მესამე სახუცესოა—**კოდი-სადიდებელი**. კოდი არის ლუდის შესანახავი ჭურჭელი, რომელსაც ხატობის დროს გახსნიან **ხოლმე** ხუცობით.

ხახმატის ჯვრის მთავარი სახლის აღწერისას ჩვენ ვთქვით, რომ ეს სახლი სამი ოთახისაგან შესდგება: საკოდესაგან, საქობესაგან და დარბაზისაგან. საკოდეში ინახება მხოლოდ სალუდე კოდები, მეორეში სალუდე ქობი დგას. ამ ქვაბში ყოველი დღესასწაულისათვის ინარშება ლუდი. ეს ქვაბი კირის საწვავ ღუმელსა ჰგავს, ან თანამედროვე სამხედრო-სალაშქრო ქვაბს.

**ხულის ხუცობა**,—გარდაცვალებულის სულის მოხსენებაა. ამ ხუცობით ლოცავდნენ ტაბლას ხარჯების დროს—ლუდსა და არაქს,

აგრეთვე საკლავსა და ცხენსაც დააკურთხავდენ ხოლმე. სულიც კურთხევის სიტყვები ასეთია:

— ღმერთო, დიდება შენდა, ღმერთო, მადლი შენდა! ღმერთო! კაციც შენ გეხვეწებისა და სულიც შენ გებარებისა, ღმერთო, უწველე მამა-შვილსა, ღმერთო მარხეს ნულარას მისცემ, ავი შეუცვალე, ღმერთო, ავს ნულარ დააღირება! სადაც შენ ხარ, მინდია, სული შენი იხსენებისა. ტაბლა შენი დაიდგმისა. შეგინდნას, მაგახმარას ღმერთმა ეს დადგმული ტაბლა, დასხმული თასნი, დაკრულნი სანთელნი, დადგმულნი კოდნი. შეგინდნას, მაგახმარას ღმერთმა, როგორც მამა-შვილებს ეჩქერებისა, ისემც შენ მოვიდისა ცოტა დიდათა, რიოს წმინდათა, ფურცვლეღადა, წაუქცევლადა. ლოცვასაც გიმსუბუქებსა, ხელით ნაქნარსა, ყურით განაგონსა, წინდახვედრილსა, უკანდაწეულსა, კარიმც საკვამიმც მღიე გაქვაო, შენ მოხვლასამცა ნურა დაგიშლისო, კალთასამც გახკრა, ხელსამც გაიხვევა, შეგინდნას, მაგახმარას ღმერთმა!

**ტაბლის დალოცვა:** ეს უკვე ხუცების საკუთრივ მოვალეობას არ შეადგენდა. ასეთი დალოცვა ხშირად ხდებოდა. ხევსურები იშვითად ამზადებდენ კარგ საჭმელს—ხინკალს, ქადას ყაურმას. ასეთ დანამზადებს დააწყობდენ ტაბლაზე, გვერდზე მოუდგამდენ წყლით ქურჭელს, თუ ჰქონდათ— არაყს. ყანწებში ჩაასხამდენ არაყს და ოჯახის ერთერთი უფროსი დაილოცებოდა, თავისი მიცვალებულისათვის. თუ ქალი ილოცებოდა, ჩუმიად ლაპარაკობდა. მამაკაცი კი უტბრო ხმამალა. დალოცვის დროს კარს გააღებდენ, რომ მკვდრები ადვილად შესულიყვნენ შინ. ამ დროს შინ თუ კატები იყო, გარეთ გარეკავდენ.

ტაბლის დალოცვა ასეთი იყო.

— ღმერთო, დიდება შენდა, ღმერთო, მადლი შენდა! ღმერთო, მარხეს ხულარას მოგვცემ! სადაც შენ ხარ, მამუკა დედავ, შენი სული იხსენიების! შეგინდნას, მაგახმარას ეს ტაბლაი, წყალი წყურვილი, როგორც ჩვენ გვექჩერების, ისემც შენ გეხმარების, ნუმცარა გაკლავ, ნურაიმიტაც ღონდები, ყველაიმც მზას გაქვს დადგმულ ტაბლა, დადგმულ ლოგინი, კარიმც მღე დაგხვდების, შარხიმც თავისუფალი, მაზიდულ-მაწეული. ვინ გაწყვებისავ, მაკეთე ნატამალი, დობილ-ძმობილი, სიკვდილის დღეს დასწრობილი. ნურამც რაით დაღონდების, ნურამც რაი დაგაკლდების. შეგინდნას, მაგახმარას ღმერთმა, როგორც ჩვენ გვექჩერების, ისემც შენ გეხმარების. შენ ძმა გიგია, სად იყვას ან ნანუკა სად იყვას, დე-

დიო, გაიყოლიდი! წყლულიან ყვანდესავ, წყლულის საპონ სჭირ-  
დებოდესავ, სახვილ სჭირდებოდესავ, ხელგახკრილით თან გაიყო-  
ლიდით, ნუმცარაით დაღონდებით, ნუმცარა შეგაწუხებთ. შაგინ-  
დნას, მოგახმარას ღმერთმა, თქვენიმც სახმარი იქნების, ცოდვა-  
სამც გახდისთ, გზასამც გაიღებთ!

საკულტო წესებში მეტად საინტერესოა ეგრეთწოდებული  
სიცოცხლეში დამარხვა. ეს წესი იმაში მდგომარეობდა, რომ უმემ-  
კვიდრო ადამიანი (უშვილო ცოლქმარი, უცოლოდ დაბერებული  
მამაკაცი, ან გაუთხოვარი ქალი) სიბერეში რომ შევიდოდა, სიცოცხ-  
ლეშივე შეასრულებდა ყველა იმ წესს, რასაც მისი სიკვდილის შემდეგ  
შეასრულებდა მემკვიდრე, რომ ჰყოლოდა. ასეთი წესებია: რიგი—  
ზაქმლისა და სასმლის დალოცვა, ცხენ-დოღის გამართვა და სხვ.  
ნათესავ-მოკეთებეცი ისე მოიკითხავდენ და ისე მიუსამძიმრებდენ,  
როგორც ნამდვილ მიცვალებულის პატრონს. თავის დამარხვა საპა-  
ტიო საქმე იყო, საამაყო, მაგრამ, აუცილებელი კი არა. ამ წესს იხდი-  
და ის, ვისაც შეძლება ჰქონდა. თავის დამმარხველი იმ დღეს ჩაიც-  
ვამდა საუკეთესო ტანისამოსს, შეიძლება სულ ახალიც ჩაეცვა.  
რიგის დამთავრების შემდეგ გაიხდიდა და ნამდვილად მოკვდომისა-  
თვის შეინახავდა სამკვდროდ (სახუდროდ). მოკეთებეი ასეთ ფსევ-  
დო-მკვდართან არაყს მიიტანდენ ხოლმე, ისე როგორც ნამდვილ  
მკვდრის ჭირისუფლებს მიუტანენ ხოლმე.

დამარხვა მარტო დასაფლავებას არ გულისხმობდა, არამედ ყვე-  
ლაფერს, მთელ ცერემონიას, რაც შესრულებული უნდა ყოფილიყო  
ამ შემთხვევაში. თავის დამარხვა და ნამდვილი დამარხვა ერთმანეთ-  
ში თითქოს არაფრით განსხვავდებოდა. თავის დამარხვისათვის ყვე-  
ლაფერი ისე ხდებოდა, როგორც უნაწილოდ (უმემკვიდრო მამაკაცი),  
ან უზღედოდ (უმემკვიდრო ცოლ-ქმარი) გარდაცვლისათვის. მკვდარს  
რიგში დაულოცავდენ სასმელ-საჭმელს, ტანსაცმელს, თოფ-იარაღს,  
ცხენსა და მისთანებს. გარდაცვალების შემდეგ ერთი წლის მერე  
მიცვალებულის ტანისამოსს (შარვლის გამოკლებით) დაალაგებდნენ.  
ხალიჩაზე, გარშემო შემოუსხდებოდნენ დედაკაცები და დაიტირებდ-  
ნენ. ერთი მოსთქვამს, სხვები უხმოდ ტირიან. ტირილის შემდეგ ამ  
ტანისამოსს უნაწილებდნენ ნათესაებს. ამ რიტუალს ტალავართ აღე-  
ბა ჰქვიადა. ტალავართ აღება და ტირილი ცოცხლად დამარხვის  
დროს წესი არ არის. ერთ წლამდე კი, გარდაცვალებულის ტანისა-  
მოსს უვლიან და ინახავენ სუფთად (გაწკიპულად). თავისდამარ-  
ხვაზე თავისდამმარხველი არ მიეკარება იმ სასმელ-საჭმელს რაც

ნაკურთხი იყო რიგის წესით. მისთვის სხვა საკმელი მზადდებოდა. არც დოლი იმართება. დოლის მაგივრად ასეთი წესი სრულდებოდა: ცხენს ჰკიდებდნენ ფსევდომკვდრის ტანისამოსს, ხურჯინს. ხურჯინის ერთ თვალში ჩაალაგებდნენ ნაკურთხ საკმელს, მეორეში—უკურთხს. ცხენზე შესვამდნენ თავისდამმარხველს. იგი წავიდოდა თავის დედის ძმის სახლისაკენ. გზაში შემხვედრთ მიაწვდიდა ნაკურთხ საკმელს, უკურთხს თვითონ სჭამდა. ცოტაოდენი გზის გავლის შემდეგ, დაბრუნდებოდა უკან. ხარჯების მონარჩენ ნაკურთხ საკმელ-სასმელს დაურიგებდა ან გაუცვლიდა მეზობლებს. როცა თავისდამმარხველი ნამდვილად მოკვდებოდა მაშინ შეუსრულებდნენ ყველა იმ წესს, რაც თავისდამარხვაზე დააკლდა: დოლს, ტალვართ აღებას და სხვ.

ტანისამოსს, იარაღს, საკმელს, რიგის დროს. ლოცავდა ხულის ხუცესი, ან მღვდელი. თუ ხატის ხუცესი მონაწილეობდა სულის ხუცესი საჭირო არ იყო. ვინც სულის ხუცობა (ლოცვა) იცოდა, ყველას შეეძლო დალოცვა.

ხევსურები მარტო ქრისტიანული წესით (მირონით) კი არ ინათვლებოდნენ, არამედ შეწირული საქონლის სისხლითაც. ხელმეორედ გასანათლავად ხევსური ხატს სწირავდა ბატკანს. როცა ჯვრის ხელოსანი ბატკანს დაჰკლავდა, შემწირველი ხელს შეუშევრდა სისხლს, დაიბანდა ხელს, გულსა და შუბლზე ამ სისხლით გამოსახავდა ჯვარს. ასეთ განათვლის დროს დედაკაცები ხატისაგან მოშორებით იდგენ.

## ოჯახი

ხევსურული ოჯახი მონოგამიურია, რაც მყლავნდება თავისებური წესებით. შეუღლება ხდებოდა სამი გზით: ქალვაჟის ნებაყოფლობით, მოტაცებით ან მშობლების ძალდატანებით. აქ მონაწილეობენ ახლო ნათესავები, მაჰანკლობენ. ზოგჯერ შეუღლება ხდებოდა ხატის მითითებითაც. ხევსურს შეუძლიან მეორე ცოლი შეერთოს პირველის სიცოცხლეშივე. ეს ხდება მაშინ, თუ პირველ ცოლს შვილი არა ჰყავს ან არა ჰყავს ვაჟი. ასეთ შემთხვევაში ხევსურს პირველი ცოლი ვერ გაეყრება. ამას ჰქვია კვეთილში ჩასმა.

დაქორწინების პირველ თვეს ცოლქმარი ერთმანეთს არ ელაპარაკება, შემდეგ ერთმანეთს ესაუბრებიან. მესამე პირის დახმარებით. მთელი სიცოცხლის განმავლობაში ქმარი ცოლის სახელს არ ახსენებდა, სახელით არც მიმართავდა უწოდებდა მხოლოდ დიაცს.

ხევსურული ქორწინება მკაცრი ევზოგამიურ წესითა ხდებოდა. ზემოთ უკვე ვთქვით, რომ თავისი გვარის ან თავისივე სოფლის თუნდაც სხვა გვარის, ქალის შერთვა სასტიკად აკრძალული იყო ამ წესის დამრღვევი განდევნილი იქნებოდნენ სოფლიდან, თავისი მიწა-წყლიდან.

ოჯახში ყველა ემორჩილება დედ-მამას. მათ დაუკითხავად ოჯახში შეიღები ვერაფერს გააკეთებენ. უფროსობა და მეთაურობა, რასაკვირველია, მამისაა. მამის სიკვდილის შემდეგ მეთაურობა დედაზე გადადის, შინაურები მას ისე ემორჩილებიან, როგორც მამას. თუ დედაც მოკვდა, მაშინ უფროსობა გადადის უფროს ვაჟიშვილზე. ოჯახს თუ არც ვაჟი ჰყავს (ეს იშვიათი მოვლენაა), მაშინ უფროსობს უფროსი ქალიშვილი.

თუ ოჯახი უშვილოდ ამოწყდა, დამარხვა და ყოველნაირი ჭირისუფლობა ოჯახის მამის ძმას ან ახლო ბიძაშვილს ევალებოდა და მთელი ქონებაც მასზე გადადიოდა. თუ არც მამის ძმაა, არც ახლო ბიძაშვილი, მაშინ შორეული ბიძაშვილი პატრონობდა მიცვალებულს, და ქონებაც მას რჩებოდა.

ხევსურული წესის მიხედვით უმცროსი ვაჟი უფროსზე აღრევერ შერთავს ცოლს. რძლებს შორის რაიმე უპირატესობა არ არის, მაგრამ რომელი რძალიც თავისი ჭკუითა და გამჭრიახობით სჯობნის სხვა რძლებს, უპირატესობასაც ის დაიმსახურებს.

მამა მოვალე იყო შვილი აღეზარდა ხევსურული მკაცრი წესების მიხედვით. ბავშვს ნათლობის სახელის გარდა მაშინვე არქმევენ რომელიმე დიდი ნადირის სახელს, ზმნის სიტყვას, ან რამე საგნის სახელს. ვაჟებს: ვაჟას, დათვიას, მეელიკას, ლომიკას, გამახელას, უთურგას, ჯარმულიკას, უნჯრუას, იმედას, ბერდიას, მინდიას, სუხუმიას და მრავალ ამისთანას. ქალებს: მზიას, მზექალას, მეწყინას, აშექალას, სამძიმარას, სანდუას, დედიკას, ძილას და სხვ.

ვაჟებს წვრთნიდნენ ხმლის ხმარებაში, მხედრობაში, მუშაობაში, უამბობენ ხევსურეთის გმირების თავგადასავალს. ჰგეშავდნენ გარეშე მტრებზე, ასწავლიდნენ ხევსურულ ზნე-შვეულებას, თავიანთებურ რაინდობას, მეურნეობას. ვაჟის დაბადება ზეიმსა და სიხარულს იწვევდა. ოჯახი ფერხულს უვლიდა. ქალის დაბადების გამო კი ღონდებოდნენ, თავჩაქინდრული დადიოდნენ.

ახალდაბადებულს ქუდის ყურში ჩაუკერებდნენ ხოლმე ნახშირს, ყურძნის ქერქს, ჯორის ძუას. ღორის ჯაგარს, ღორის კბილს,

არწივის გაზს (არწივის ფეხების ყანწს) ძაფზე აასხამდნენ და აკვანზე ჩამოჰკიდებდნენ. ყველაფერი ეს იყო ავგაროზი, ფათერაკის ამცოლებელი. ავი თვალისაგან დასაცავად ხმარობდნენ ქარვისა და გიშრის მძივებს.

ყოველგვარი საოჯახო საქმე დედაკაცს ეკისრება: ბავშვების აღზრდა, საქონლის მოვლა, რძის დამუშავება, კარაქის შედღვებვა, ერბოს გადადნობა, პურის ცხობა, ბოსლის დახვეტვა, მატყლის დაჩეჩვა, დართვა, ტანისამოსისთვის შალეულის დამზადება, მოქსოვა, შეკერვა, ქარგვა, შეღებვა და სხვა. ერთი სიტყვით მთელი შინამრეწველობა დედაკაცის კისერზეა. მამაკაცს დედაკაცი უშლის ლოგინს, სამუშაოდან მოსულს მიაართმევ „თათებს“ (იხ. ქვემოთ „ტანისამოსი“) და სხვა. ოჯახის მართვა-გამგეობაში დედაკაცი მეტად შეზღუდული იყო. მამაკაცი თავის დიაცს არაფერში ეკითხებოდა. თუ დაეკითხა, ხალხი დასცინებს: ცოლის ცოლიაო, იტყვიან. სტუმრის მიღება, მოვლა, გამასპინძლება დედაკაცის საქმეა, მაგრამ სტუმრებთან საუბარი და დაჯდომა დედაკაცს მართო ახლონათესავთან შეუძლია. შორეულ ნათესავთან და უცხო სტუმართან არა. მაგრამ ამ ბოლო დროს ეს წესიც გადავარდა. ეხლახევსური დედაკაცები ქმარსაც თავისუფლად ელაპარაკებიან, გარეშე ხტუმარსაც და მასთან თავისუფლად სწდებიან. სისხლის აღების წესებიც თანდათან გადავარდა. სოციალისტურ წყობას აქაც შეაქვს თავისი მძლავრი, გამაკეთილშობილებელი და გამანთავისუფლებელი გავლენა.

დედაკაცი შინა მუშაობს, მამაკაცი—გარეთ. ამიტომ, თუ ოჯახს აკლია პური, ტყავი, ქალამანი, თივა, ჩალა, შეშა, ნავთი ჩირახი, მარილი,—ეს მამაკაცის სირცხვილია. თუ აკლია—ყველრ, ერბო, საქონელი, ტანისამოსი,—ეს დედაკაცის სირცხვილია. თუ ოჯახს თივა-ჩალა მომარაგებული ჰქონდა, მაგრამ საქონელი ზამთარში კარგად ვერ გამოიკვება და გაზაფხულზე გამხდარი გამოვიდა ბოსლიდან, ეს დედაკაცის სირცხვილია, რადგანაც მან ზამთარში კარგად ვერ მოურა საქონელს.

დედაკაცი თავისუფლად განაგებს თავის ხელნაქნარს,—ერბოს, ყველსა და მისთანებს, და მამაკაცს უფლება არა აქვს დედაკაცის დაუკითხავად შეეხოს ამ საგნებს. ქმრის დაუკითხავად ვერ გაყიდდა საქონელს. თუ დედაკაცი ქვრივია, საქონლის, მიწის, სახლ-კარისა და ქმრის იარაღის გაყიდვა შეეძლო, მაგრამ უჯობდა ახლო

ნათესავ მამაკაცს დაჰკითხებოდა. ქვრივი დედა ქალს თავისი ვერ-  
გაათხოვებდა თუ არ დაეკითხა ქმრის ბიძას ან ბიძაშვილს.

თუ რაიმე საპატიო მიზეზით დედაკაცს ქმართან არ ეცხოვრე-  
ბა, შეუძლია ვაშორდეს ქმარს და მშობლებთან წავიდეს, მაგრამ  
ქმარს შეეძლო იგი კვეთილში ჩაესვა, ე. ი. ნება არ მიეცა მეო-  
რედ გათხოვებისა.

საერთოდ კი, ხევსური ქალი თამამია. მას ადვილად ვერაფერ  
დაჩაგრავს. მკვირცხლია, ცქვიტი, გამრჯე, მომქმედი და შრომის-  
მოყვარული. აქვს თავისებური თავისუფალი მიხვრა-მოხვრა. სა-  
უბარში აჩქარებული კილო, სიამაყე; დედაკაცის საქმიანობაში  
მამაკაცი სულ ვერ ჩაერევა. დედაკაცი შველის ხოლმე მამაკაცს  
ხვანათესავში, მკაში, თიბავში, შეშის მოტანაში, ძნის თრევაში.

დედაკაცები სახალხო საქმიანობაში ერეოდნენ მხოლოდ ჩხუ-  
ბის დროს, როგორც გამშველებლები. ჩხუბის საკითხების არსები-  
თად გადაწყვეტაში კი ისინი ვერ ჩაერეოდნენ. ხევსურულ სამარ-  
თალში (რჯულში) დედაკაცს მონაწილეობის უფლება არ ჰქონდა.  
ამაზე ხევსურეთი იტყოდნენ,—ჩვენ მაშინ დავილიენით, როცა დე-  
დამ დაგვისხდნენ ოზირათო! ჩივილი შეეძლო საქმის აღძვრა, მაგ-  
რამ მოსამართლეებში, რჯულის კაცებში, დაჯდომა კი არა. ხევ-  
სური დედაკაცი არც თავისი ხლის საქმეში წარმოადგენდა რამეს.  
აქაც შეეძლო საქმის აღძვრა, შესრულებით კი მამაკაცებს უნდა  
შეესრულებია. თუ მოკლული იყო ისეთი მამაკაცი, რომელსაც  
გვარში სხვა მამაკაცები არა ჰყავდნენ, საქმის აღძვრა შეეძლო დე-  
დას, ცოლს, დას, მამიდას\*.

ქორწილში, რიგებში, დედაკაცები დიასახლისობენ, ხევსურუ-  
ლად—**ხარისტას** აძლევენ. ახალგაზრდა ქალები კი სტუმრებს უფლიან.

ხევსურულ ოჯახში ძმების ერთმანეთთან დამოკიდებულებას  
რაიმე განსაკუთრებული თავისებური წესები არა აქვს. მაგრამ  
მანც უმცროს ძმას მორიდება და პატივი აქვს უფროსი ძმისა.  
თუ უფროს ძმას ვინმე აწყენიებს უმცროსი ძმად არის დაიცვას  
იგი და თავიც კი შეაკლას მტერს. მაგრამ უფროსი ძმა, რაც უნდა  
მწვაფე მდგომარეობაში ჩავარდეს, თავს იკავებს, სიბრაზეს არ  
იჩენს, არა უწმაწურობს, დინჯად იქცევა, რომ უმცროსი ძმა თა-  
ვისი თავდაუპყრობით მსხვერპლი არ გახადოს.

გვარშიაც ეს წესია დაცული.

\* იხ სისხლის ადების წესები ხევსურეთში; „ხუთი წელი ფშავ-აფხაზ-  
რეთში“, წიგ. I.



დები შეძლებისდაგვარად ინაწილებენ ოჯახის საქმეს. მცირე-წლოვანივე ეჩვევიან და სწავლობენ საოჯახო საქმეს: კერვას, ქსოვას, რთვას და მისთანებს. დები ერთმანეთს ეხმარებიან, ერთმანეთისაგან სწავლობენ საქმეს. ერთმანეთს ეჯიბრებიან ხელსაქმის უკეთესად გაკეთებაში. ძმებში თუ ჯერ უფროსმა უნდა შეირთოს ცოლი, დებისათვის ეს წესი არ არის. ქალი გათხოვდება მაშინ, როდესაც მას შემთხვევა მიეცემა, და უფროსი დის გათხოვებას არ ელის. მზითვეი მიღებული არ არის წესად. მაგრამ ქალი წინდაწინ იმზადებს რამდენიმე ხელ ტანისამოსს, ხელნაქნარ ნივთებს, და მხოლოდ თავისი ხელით გაკეთებული ნივთები და შეკერილი ტანისამოსი მიაქვს ქმართან. ამას გარდა თავის სახელზე ზრდის ერთ ძროხას, რომელიც საკუთრებად ქმრის სახლში მიჰყავს. ამას ჰქვია სათავნო. მაგრამ, ხევსური ქალის ცხოვრებაში ყველაზე მნიშვნელოვანია სწორფერობა, სიყვარული გათხოვებამდე.\*\*

საინტერესოა ოჯახში რძლებისა და მაზლების ურთიერთობა. უმცროსი რძალი უფროს მაზლს ვერ დაელაპარაკება მოყვანიდან ერთი თვის განმავლობაში. უფროსი რძალი კი თავისუფლად დაელაპარაკება მაზლს (ამ შემთხვევაში, რასაკვირველია, უმცროსი მაზლი უნდა ვიგულისხმოდ, რადგანაც ოჯახში ჯერ უფროსი ძმა ირთავს ცოლს). (იხ. ზემოთ). უფროსი რძლის აძრახება (დალაპარაკება) ასე ხდება: თავისი მოყვანიდან ერთი თვის შემდეგ უმცროსი რძალი მივა უფროს მაზლთან და მესამე პირის დახმარებით აღდევრძელებს მას. მერე როცა კაი ხანი გავა რძალი მაზლის თხოვნით აიღებს არაყიან ყანწს და აღდევრძელებს მაზლს. ამის შემდეგ უმცროს რძალს უფლება ეძლევა ელაპარაკოს უფროს მაზლს. ეს წესი შესრულებული უნდა იყოს ყველა უფროსი მაზლის მიმართ, რამდენიც უნდა იყვეს ოჯახში.

მამის სიკვდილის შემდეგ მთელი ქონება რჩებოდათ ვაჟიშვილებს. იყოფდნენ თანასწორად, მხოლოდ უფროს ძმას ეძლეოდა ერთი დღიური მიწა მეტი საუფროსო. ხენა-თესვის დროს სათესლე თანასწორად იყოფოდა. დანარჩენი ქონებაც თანასწორად იყოფოდა, სულობრივ. აკვნის ბავშვსაც ჰქონდა წილი. მხედველობაში არ იღებდნენ ვინ რამდენს მუშაობდა, ვის რა შეჰქონდა ოჯახში, ვის რა ძალა შესწევდა. ყველას არსებობა უნდოდა—გლახაკს, ბეჩავს, გაურჯელს, ბეჯითს, კოხტას (კოხტა—უსაქმო, მოხეტიალე კაცი). ხევსურები ამბობდნენ: კოჭლი, ბრმა და კოხტა ოჯახმა უნდა შეინახოს.

\*\* იხ. სწორფერობა; „ხუთი წელი ფშავ-ხევსურეთში“, წიგ. I

შეძლებულ, ღონიერ ოჯახის პატრონს, ჭკვიანს, დარბაისელს, კერამიკვიდრეული ჰქვია. ასეთი კაცის სახელი ოჯახის ფარგლებიდან გადის გვარში, თემში, თემს იქითაც გავარდება ხოლმე. ასეთი კაცი გახდება გავფლანგი (იხ. ზემოთ). ასეთ კაცს ავალებდა თემ - სოფელი ახალგაზრდობის გაწვრთნა - სწავლებას. ისიც ასწავლიდა წარსული ცხოვრების ძველ ამბებს, აღვიძებდა მათში გმირულ გრძნობებს. ასეთი უფროსი კაცი ერთგვარი განსაზღვრება იყო ხევსურული ზნეობისა. მის წინაშე ხმაამოუღებელი უნდა მდგარიყვნენ რძლები, თავჩალუნულთ უნდა ესმინათ მისი ჭაპარაკი. ოჯახში ამ უფროს კაცისათვის საკუთრად აქვთ საგანებო სკამი—საუფროსო სკამი. სადაც მივა ისეთი გავფლანგი ან ფროსი კაცი, სხვა ოჯახში თუ თემში საქმის გასარჩევად, აქაც ას ასეთ საუფროსო სკამზე მიიწვევენ.

საცხოვრებელ სახლს წინად შუაზე ჰყოფდა შუაცეცხლი. ერთ ხარეს ერქვა სალიცო,—მეორეს სამამაცო. სამამაცოში გადასვლა დიაცისათვის დიდი სირცხვილი იყო. სამამაცოში იდგა ერთი გრძელი სკამი, რომელზედაც ჩხდებოდნენ ასაკის მიხედვით. სალიცოში სკამები არ იყო. დედაკაცები პირდაპირ მიწაზე სხდებოდნენ კერისპირად. პურისჭამად ჯერ მამაკაცები სხდებიან, მერე დედაკაცები. საუკეთესო ნაჭერს,—ლუკმას,—მამაკაცებს მიაართმევდნენ: დედაკაცები სულ ცუდ ნიჭრებს სჭამდნენ. ამის გასამართლებლად ამბობდნენ: დედაკაცს რად უნდა ჭამა, ძაღლს რა მტერთან ბრძოლაში გამოიყენებსო. საინტერესოა მეორე ანდაზაც: ქალს რათ უნდა თვლები, რა დურბინდისათვის გამოიყენებსო. ასეთი ანდაზები, ოჯახური ყოფაცხოვრების დამახასიათებელი, მრავალი იყო ხევსურეთში. დედაკაცის სისხლიც ნახევართავად ფასობდა.\*

დედაკაცები მეტსა მუშაობდნენ ოჯახში, ვიდრე მამაკაცები. მუშაობდნენ თითქმის მთელ დღე-ღამეში. მამაკაცებს შეეძლოთ მუშაობის დროს დაესვენათ კიდევ, დაეძინათ კიდევ. დედაკაცი-სათვის კი ასეთი რამ სირცხვილი იყო. ღამითაც კი, როცა მამაკაცები იძინებდნენ, დედაკაცები განაგრძობდნენ საქმიანობას: ჩეჩავდნენ, ართავდნენ, აკერებდნენ. ლოგინშიაც კი არა წვებოდნენ, იქვე ბოსელში მიწვებოდნენ იატაკზე და იძინებდნენ!

მამაკაცები იძინებენ სახლის მეორე სართულში — ჭერხოში. პირველი სართული ორი ნაწილისაგან შესდგება საკვამისაგან და ბოსლისაგან. საკვამე წინანაწილია პირველი სართულისა. წინა კე-

\* იხ. სისხლის აღების წესები ხევსურეთში; „ხუთი წელი ფშავ-ხევსურეთში“, წიგ. I.

დელში ზემოთ დატანებულია პატარა სარკმელი სინათლისა და ბოლისათვის. საკვამის უკან არის ბოსელი ბრტყელი ქვით დაფენილი. საკვამის შუაადგილი ცეცხლისათვისაა განკუთვნილი, ოდნავ ჩავარდნილია და ბრტყელი ქვით დაფენილი. ზემო მხარეზე დევს მოკრძო ქვის კერა, გარშემო აწყვია ბრტყულად წაფენილი ქვები. როგორც ზემოთ ვთქვით კერის მარჯვნივ არის სამამაცო. აქ დვას ხის ან ქვის გრძელი სკამი მამაკაცებისათვის. მის ზედა თავს საუფროსო ეწოდება. საცეცხლე ადგილას შუაზე ჩამოკიდებულია ჯაჭვი—საკიდელა. მამაკაცები საკვამეში ჭერხოდან ჩადიან. საკვამეში შესასვლელად მათთვის სხვა გზა არ არის. საკვამის ჭერში გამოჭრილია ერთი კუთხე. აქედან საკვამეში ჩადის საცალფენო კიბე. ამ კიბით ადიან მამაკაცები ჭერხოში. დედაკაცი ამ კიბით ვერ ჩავა საკვამეში. საკვამეში ის გარეთა კარიდან შედის. მამაკაცს კი საკვამეში შესვლა ამ კარიდან სასტიკად ეკრძალება. სტუმარი მამაკაცებიც საკვამეში ჭერხოდან ჩაჰყავთ. პატივსაცემ სტუმარს სკამზე ნოხს დაუგებენ.

ჭერხოა ავეჯის, ჭურჭლეულის, ტანისამოსის, ხორბლეულის შესანახი და დასაძინებელი ადგილი. ხორბალს აქ ინახავენ დიდრონ გოდრებში. ტანისამოსი გადაკიდებულია ხარხებზე—მამაკაცისა ცალკე, დედაკაცისა ცალკე. ოჯახის ყოველ წევრს ორი წყვილი, ტანისამოსი აქვს — საშინაო და საგარეო. შეძლების მიხედვით შეიძლება 2—3 ხელი ტალავარი (ტანისამოსი) ჰქონდეთ. ტანისამოსის შესანახად, უფრო ხშირად ოჯახის ყოველ წევრს ცალცალკე აქვს ხარხები. ჭერხოშივე დვას ხევესურული ლოგინი —მაღალფეხებიანი საწოლი, გაბანდული ბაწრით ან თასმით. შიგ დაგებული იყო ნალეწი ჩალა. საბნად ხმარობდნენ ნოხს ან ფარდავს. საწოლის წინა ნაწილი თავისებურად არის მოჩუქურთმებული. სასტუმალთან ჰკიდია ხევესურული თათები (იხ. თავი „ხევესურული ტანისამოსი“). თათები ფეხების მოსასვენებელია, წინდების მაგვარი. თათები სტუმრებისათვისაც აქვთ, სათადარიგოდ. ჭერხოში იძინებენ მამაკაცებიც და დედაკაცებიც, მაგრამ უფრო ხშირად კი ბოსელში ეძინათ ხოლმე.

მკვდარს არ დაიტორებენ მშობელი—შვილს, ცოლი—ქმარს, ქმარი—ცოლს. ასეთი რამ სირცხვილია. სხვები კი დაიტორებენ ხოლმე. არც გვარი ტირის მოკლულს, ესეც დიდი სირცხვილია. ყველაზე მეტად სტირის ძმას და, თმას გაიკრეჭავს და მთელი სიცოცხლის განმავლობაში არ გაიხარებს. გლოვის წესია წვერის გე

შვება, ტანსაცმელის ჩაცმა უკუღმა, საკრავი ნივთების პირქვევად მობრუნება; მათ ერთი წლის განმავლობაში არ დაუკრავენ— ყოველნაირი სიკოხტავე უარყოფილია, ცხენს კუდს არ გამოუწასკვამენ, შორთულ გულ-მკერდს რამე თაღის ფართლით დაფარავენ; დედაკაცები მანდილის ჩაკეცილ ყურს გადმოუშვებენ. სიცილს ერიდებიან.

ქალი უწმინდურ, არსებათ ითვლებოდა. უფროსის ლოგინის ახლოს ვერ გაივლიდა, თვიურის უამს ქერხოში, ვერ ავიდოდა. ხოლო თვიურის გათავების შემდეგ სამი დღის შემდეგ შეეძლო ეს. ეს ინიტომ, რომ ხვესურების წარმოდგენით მამაკაცსა და მის საწოლს მთავარანგელოზი მფარველობს და თვიურიანი დედაკაცი ქერხოში შესვლით წაბილწავს იქაურობას. ამის გამო მთავარანგელოზი გაუწყრება ოჯახს და საქმე უკუღმა წაუვა. იმავე ანგელოზის შიშით დედაკაცი მამაკაცს ხმამაღლა ვერ აუძრახდებდა (დაელაპარაკება).

ხვესური სამუშაოდ გადის დილით ადრე, უზმო. სამუშაოზე დანაყრებული არავინ გავა. ეს დიდი სირცხვილია. კაცმა ჯერ უნდა იმუშაოს და მერე ჭამოსო. ისაუშვებენ მაშინ, როცა კარგად იმუშაებენ და მზე ცაზე კარგად მაღლა წამოიწევს. ამას **ჭქვია ნაყრი**. დღეში კი სამჯერ სჭამენ—დილით—ნაყრი, შუადღისას **სამხარი** და საღამოთი **ოხშამი** (ვახშამი). იციან აგრეთვე **გრძელი სამხარი** (დაგვიანებული) და **გრძელი ოხშამი**.

ახალგაზრდა ვაჟიშვილს საჭმლის მხრივ მეტი პატივისცემა აქვს ვიდრე მამას, ე. ი. უკეთეს ნაჭრებს ვაჟიშვილს მისთავაზებენ. უკეთესი ჭამა უნდა მას, რომ კარგი ვაჟკაცი გამოვიდესო. პურის ჭამად უფროსს ელიან და მასზე ადრე არ დასხდებიან; უფროსი კი არ ელის უმცროსებს.

წვნიან საჭმელს სჭამენ **ქიტურათი** (კოვზით). ქვაბიდან წვენის ამოსალეზად ხმარობენ **ქიტს** (ჩამჩა). წვენს ჭამენ ან საერთო ჯამში, ან ცალცალკე. წვეულების დროს შლიან **ტაბლას**. ყველანი შემოუსხდებიან მას გარშემო. ერთი კაცი ემსახურება ყველას. ეს არის **ზემდეგი**. ზემდეგი ტაბლაზე მსხდომთ დაუდგამს სათითაო ვერცხლის ჯამს ლუდით სავსეს. ხუცესი იტყვის ტაბლის სადხდებელს და ყველა შეუდგება ჭამას. ჭამას რომ გაათავებენ აიღებენ ლუდით სავსე თასებს. ყველა თავისებურად დაილოცება და დასცლის თასს. ტაბლის ასეთ დაწყობას, დადგმას, დოვლათს **ჭქვია**,—  
**კარახანა**.

იმის გამო, რომ მიწა მხოლოდ ვაჟიშვილზე გადადიოდა ან მხოლოდ გვარის მახლობელ ნათესავებზე, აგრეთვე იმის გამო, რომ უფროს ვაჟს ერთი დღით მეტი ეძლეოდა საუმფროსო, მიწა თანაბრად ვერ ნაწილდებოდა. მაგრამ ხშირად, გვარს საერთო სამფლობელო მიწებიც ჰქონდა. მაგალითად, სოფ. ამლაში მთლად წიკლაურები ცხოვრობენ. არიან სხვა მოდგმის მცხოვრებლებიც, მაგრამ რაკი ერთ სოფელში ცხოვრობენ ერთ გვარეულ ჯგუფს წარმოადგენენ; მათ ჰქონდათ საერთო ხატი, სასაფლაო\* და სასოფლო მიწები. ამ მიწებს გვარი ასე ხმარობდა: საბალახო საერთო ჰქონდათ, სახნავი მიწები კი დანაწილებული იყო ოჯახებზე, ზოგს მეტი ექირა, ზოგს ნაკლები. ამის ნიადაგზე ხშირი იყო ჩხუბი, ერთმანეთის ჩაგვრა, მიწის ძალით წართმევა, მკვლევობა, ვისაც ბევრი მიწა ჰქონდა იმაზე ამბობდნენ—ხოდაბურის მჭრელიაო. (ხოდაბური—დიდი მამული). ყველაზე მეტი მიწები, ხოდაბურები, ხატს ჰქონდა, რაც უფრო „დიდი“ იყო ხატი, ე. ი. რაც უფრო დიდი სახელი ჰქონდა, მით უფრო მეტი მამული ჰქონდა. ზემოთ უკვე ვთქვით, რომ ხატის მამულს საერთოდ ამუშავებდნენ და მოსავალს ხმარობდნენ ხატობაშივე, ხოლო გაჭირვებულებს სახმარისად აძლევდნენ მიწის ნაკვეთებს. ხატის ტყე კი სრულიად ხელუხლებელი იყო. იქიდან ერთ გამხმარ ჩხირსაც ვერ გამოიტანდნენ. ამიტომ ხატის ტყე საუცხოოდ არის დაცული.

ძმათა გაყრის დროს ხშირი იყო ჩხუბი, უთანხმოება. საკუთრებად განაწილებული მიწები ოჯახებს არ ყოფნიდათ. ეს იწვევდა სიღარიბის გაძლიერებას. ამის გამო გავრცელებული იყო მოჯამაგირეობა. მიწის გამო ხშირი იყო დავა გვარებს შორისაც, ერთი ფემ-სოფელი მეორეს უცხადებდა ომს, პირიქითელები—პირაქითელებს. დავა და ბრძოლა ერთი ნაჭერი მიწისათვის ზოგჯერ ათეული წელი გრძელდებოდა ხოლმე. ასეთი იყო გაუთავებელი დავა გუდანის ჯვრის და არხოტის ჯვრის ყმებს შორის. თუ არ ხეცურული რჯული გუდანელები ერთი დაკვრით დაამარცხებდნენ არხოტელებს, მაგრამ მათი დავა ბოლოსდაბოლოს გადაწყდა და ეხლა ამ გვართ შორის კეთილი განწყობილებაა.

\* გვარის საერთო სასაფლაოზე სხვა გვარის მიცვალებული ვერ დაიმარხებოდა.

## ხევსურული ტანისამოსი

ხევსურეთში ტანისამოსს მხოლოდ დედაკაცები ამზადებენ. ეს მარტო დედაკაცის საქმედ ითვლება და მამაკაცი ამაში არ ჩაერევა.

მამაკაცის ტანისამოსი 8 ნაჭრისაგან შესდგება. ესენია: 1) პერანგი, 2) ჩოხა, 3) შალღარი, 4) ბაჭიჭები, 5) გულისპირი (ჭილექი), 6) ქუდი, 7) ტყავი და 8) ჯღანი.

დედაკაცის ტანისამოსის შემადგენელი ნაწილებია: 1) საღია-ცო, 2) ქოქლო, 3) კაბურა, 4) ბაჭიჭები, 5) ტყავი, 6) თავსაცმელა, 7) მანდილი და 8) თათები.

საერთოდ, ხევსურული ტანისამოსი შალისა მზადდება. ყოველ სოფელში არის დახელოვნებული დედაკაცი, რომელიც ყველას უსასყიდლოდ გამოუჭრის ტანისამოსს. გამოჭრილს ჯერ შეკერავენ და მერე შეღებავენ. უფრო მიღებულია შავი და ლურჯი ფერი. თეთრი და ლევა ტანისამოსი სირცხვილად მიაჩნიათ. შეღებილ ტანისამოსს გამრობის შემდეგ დაუწყებენ დაჭრელებას აბრეშუმის ძაფით ან შინდამზადებულით. ზოგ საღებავს დედაკაცები თვითონ ამზადებენ, ზოგს კი ქალაქში ყიდულობენ\*. მაგალითად, ლილას, ძალას და სხვას.

პერანგს ახალგაზრდისათვის კობტად და გულდასმით დააჭრელებენ, ხნიერისათვის კი სადად. მკერდზე დააკერებენ ერთგვარ ნაჭერს, რომელსაც ქალები შილიფას უწოდებენ. ამაზე ნაჭრელა (ნაქარგი) ადვილად იკერება. პერანგზე მოკერებულ ამ შილიფას ეწოდება საბეჭური. საბეჭური იწყება ქამარს ზემოდ, მიდის წინა მხარის უღლებამდე. პერანგს ბეჭებზედაც აჭრელებენ ჯვრებით, ასევე ამოქარგული სახელოებიც მაჯებიდან იდაყვებამდე პერანგი მუხლებამდე უნდა სწვდებოდეს. მოკლე პერანგი სირცხვილია. პერანგი თეძოების კიდურებიდან ფერდებზე გაჭრილია.

ჩოხას სხვადასხვანაირად კერავენ: აჭრელებენ მხრებზე, მხარ-ხახელოებზე. წინ გულმკერდზე სამასრეები აქვს. ჩოხის ბოლოებს აჭრელებენ ნაჭრელათი და სირმით. ნაჭრელა ყველგან ჯვრებადაა, გარდა კალთებისა.

შარვლის ტოტებს უწინ გადმოშვებულს ატარებდნენ, ბაჭიჭებში არ იტანდნენ. ეს წესი ეხლა გადაეარდა. მოხუცებულები თუ მისდევენ, ისე კი ბაჭიჭებში ატანენ.

\* იხ. საღებავები ხევსურეთში; „ხუთი წელი ფშავ-ხევსურეთში“, წიგ. I.

დიდი სირცხვილია საწელეს (ხვანჯრის) გამოჩენა. შარვლის ტოტები კარგი ნაჭრელითაა ნაკერი. პირველ პირზე მიკერებული აქვს შილიფა (შილის ფერადი ძაფი დაგრესილი). შილიფას მოკერებული აქვს სხვადასხვა ფერის სკლატი, (რბილი და თხელი მაუდის მსგავსი მატერია, — ქალაქში ყიდულობენ), ოთხკუთხედად დაჭრილი. სკლატის მოსდევს ნაფთულა (ერთმანეთზე მიკერებული შილიფა). ნაფთულას მისდევს რქებად დახრილი (ნიშან ზ მსგავსი) ნაჭრელა და სამკუთხედებად დაკლავნილი ნაჭრელა. ისევ მეორდება ნაფთულა. მერე ისევ სკლატის კუთხა და ბოლოს შიბაის ჯვრები. შარვლისათვის ამზადებენ საუკეთესო შალს, სუფთა ძაფისაგან. ამ შალს ორშინი ჰქვია.

ტყავი იკერება, უფრო ხშირად ცხვრის ტყავისა. თბილი ჩასაცმელია. ტყავი ორნაირია: ერთი მოკლე, უმთავრესად სამუშაო, მეორე უფრო გრძელია, — მუხლებამდე. ჯიხვის ტყავისაგან შეკერილს საბეწვგარეთო ჰქვია. ეს შეძლებულების სამოსია და მონადირეებისა. ეს საპატო ტანისამოსია. ვისაც ეს აცვია, იმაზე იტყვიან საჩინოდ, საამაყოდ არის ჩაცმულიო. საბეწვგარეთოს წამოასხამენ ხოლმე საპატო სტუმარს. ცხვრის ტყავი იკერება ჭრელად. ილღიებში დააკერებენ მაუდის სამკუთხედ ნაჭრელებს, სხვადასხვა სახისას. საყელს უკეთებენ შავი ბატკნის ტყავისას. წინ, ქამრის ცოტა ზემოთ, უკეთებენ საყრდლებს, ნაჭრელათი დაკერებულს და მძივებდაყრილს. სახელოებზე აკერებენ წითელი ან ლურჯი მაუდის შალს. მოხუცებულების ტყავი სრულიად სადაა.

ბაჭიჭები (პაჭიჭები) ორგვარია. ერთნაირია—უბრალოდ შეკერილი, მუხლებს ზემოდ სწვდება. იცვამენ უფრო ზამთარში, თოვლში. სამუხლე ბაჭიჭები ჰქვია. მეორენაირია—დაკერებული ბაჭიჭები, ახალგაზრდებისათვისაა. მოკლეა, დაჭრელებულია ბოლოებზე და წვივების შიგნითა მხარეზე.

თათები ორგვარია—საქალამნე თათები ანუ ამოცვლილა. ამ თათების ხმარება უქალამნოდ არ შეიძლება. ესენი წინდების მაგიერია. მეორენაირი თათებია შიბიანი თათები. დაკერებულ-დაჭრელებულია. ძირზე გამოკრული აქვს ცხვრის, თხისა ან ხბოს ტყავი. ასეთი თათები ყოველ ოჯახში რამდენიმე წყვილი არის საპატო სტუმრისათვის, ფეხების მოსასვენებლად.

საფუხრებიც ორგვარია — ხუთთითიანები, შეიძლება იყოს მოქსოვილი, ფერადი ძაფისა, ზედ გამოყვანილი ჯვრებით, რქებითა და სამკუთხედებით. აკერებენ ფერად მაუდებს, ჯგუფ-ჯგუფად

მძივებს, ღილებს. მეორენაირი საფუხრები სქელია, თბილი და გამ-  
აღე. აქვს ერთი ბუდე ოთხი თითისათვის და ერთიც ბერა თითისა-  
თვის (ცერისათვის).

ყაწიკა წამოსასხმელია. მხოლოდ პირიქითა ხევესურეთში ხმა-  
რობენ და გადმოღებული აქვთ ქისტებისაგან. იხმარება წვიმაში,  
როგორც ხევესურები იტყვიან, ზოგჯერ იქსოვება როგორც ჩვეუ-  
ლებრივი შალი, მაგრამ ძალიან მჭიდროდ. სიგრძით 11 ან 12 ად-  
გილი ოთხკუთხედი. სიგრძე მეტი აქვს სიგანეზე. წამოსასხმენ ხოლ-  
მე ისე, რომ პირის სიგრძე კისრიდან წვივებამდე მიდის, მეორე  
პირი გადამბრუნებულია შიგნით და წელამდე მაინც უნდა სწვდე-  
ბოდეს. ამ გადამბრუნებულ პირზე დაკერებულია ღილი და შატა,  
რომლებითაც ყაწიკას შეიბნევენ გულმკერდზე. ყაწიკა შეიძლება  
იყოს სხვადასხვა ფერისა.

ქოქაი ყელსახვევია, სათბური. ლურჯი შალის ნაჭერს დასქ-  
რიან და მერე ერთმანეთს დააკერებენ ჩაკოჭვილად. შემდეგ ირგ-  
ვლივ შემოაყოლებენ წითელ მიტკალს, ზედ მოაკერებენ სისვის  
(მომწვანო ფერის) ნაფთულას (მატერიას), რომელსაც დააჭრელე-  
ბენ დაკლაცნილად ან სწორი შიბით. სისვის შუა გულზე მოაყო-  
ლებენ რბილი მათუდის ნაჭერს ან უფრო წვრილი ნეჭრელათი. დაჭ-  
კერავენ მთლიანად. ქოქაის გარშემო შემოაკერებენ სირმას და ზედ  
მძივებს დააკერებენ. ბოლოზე კიდევ გაატარებენ ორ-ორად ას-  
ხმულ მძივებს. მძივებს ბოლოებზე უკეთებენ აბრეშუმის ჯინჯილს  
(ფოჩებს). ბოლოებზე დააკერებენ ღილსა და შატას; ქოქაი ყელ-  
კისერს ეხვევა მთლიანად.

ჩაჩმის ანუ ჯანჯიკის ხელსახოცი იხმარებოდა უწინ. ვაღანზე  
(ხმლის ტარზე) ჰქონდათ ხოლმე შებმული. სიგრძით ოთხი მტკავეჭ-  
ლი, სიგანით ერთი ხელის დადება. ხელსახოცი შალისაა. გარშემო  
შემოვლებული აქვს წითელი შილა ან წითელი მიტკალი, ისე  
რომ ბოლოებამდე არ მიდის, თითო მტკაველი დატოვებულია  
უშილოდ. შილას შიგნით მოაყოლებენ ნაფთულას (ხოლებად დაჭ-  
რილ მატერიას) ნაჭრელათი დაკერებულს. შემდეგ—სირმისა და  
წითელი სკლატის ნაფთულას. ბოლოებზე დატოვებული თითო  
მტკაველი შილა შეკუმშულია იმდენად, რომ სამი თითის სიფართე  
ჰქონდეს. ზედ გააკრავენ ხოლმე სისვისა და წითელ ნაფთულას.  
ამ ნაფთულაზე აკერებენ აბრეშუმის შილას, დაკავკაულს ან ზედვე  
დააკერებენ მძივებს. ბოლოებს მოქარავენ აბრეშუმის ძაფით. ამ



ხელსახოცს ეხლა ხმარობენ ცხენ-დოჯის დროს—თავზე იხვევენ. შუღლის დროს შეიხვევენ ხოლმე კრილობას.

დედაკაცის ტანისამოსი უფრო რთული ხელსაქმის ნიმუშია. სადიაცო—შიგნითა ჩასაცემელია. იკერება შავი ან ლურჯი. სადიაცოსათვის ტოლს (შალის საკაბე ნაჭერს) სიგანე უნდა ჰქონდეს ოთხი მტკაველი, ხოლო სიგრძე—ორად მოკეცილი—ხუთი მტკაველი. სადიაცო კაბის მაგიერია და იცვამენ შიშველ ტანზე. მარტო სადიაცოთი ხეცური დედაკაცი ვერც გარეთ გამოვა, ვერც მამაკაცებს დაენახვება, ვერც ოჯახში ისაქმებს. იკერება ასე: ტოლს გასჭრიან სიგრძეზე—სამ მტკაველსა და სამ თითზე. აქედან ამოსჭრიან აზლოტებს (გვერდებზე ჩასაკერებელ ნაჭრებს) და სახელოებს. აზლოტი ბოლოში ოთხი გაშლილი თითის სიგანისაა, თავში—სამისა. აზლოტებს გვერდებში ჩაკერებენ ისე, რომ სადიაცო ტომარას დაემსგავსება. ამ ჩაკერებულს დაჰკერავენ ტომრის შიბაით. ასევე მიაკერებენ სახელოებსაც. შემდეგ შეღებავენ მთლად. მერე მარცხენა მხარეზე გასჭრიან ოთხი თითის გაშლაზე, მერე ჩაშჭრიან მარცხნივ ორი მტკაველის სიგრძეზე და მიიღება ვერეთწოდებული ფარავის კანჭი (უბე). ფარავი სამკუთხედიან, მთლიანად ფარავს მკერდს, ისე რომ ქალს ძუძუები არ ემჩნევა. ფარავში გამოჩენილი ძუძუები დიდი სირცხვილია, ამიტომ ფარავი იღლიებამდე ამოკერებული. ფარავს აჭრელებენ სხვადასხვა ფერის სკლატის ნაჭრებით, აბრეშუმის ძაფითა და დააკერებენ მძივ-ლილს.

ფარავს ასე ჰკერავენ: კიდევებს დაკერავენ მწკალით (წმინდა ძაფით ამოუხვევენ), მერე დააკერებენ ორი თითის სიგანე ლურჯ სკლატს მარჯვენა მხარემდე და ბოლოზე მოავლებენ სისვი სკლატის ნაფთულას, ნეკის სისხოს. ნაფთულას მოქარგავენ აბრეშუმის ძაფით—გააკეთებენ ნაჭრელას. ნაფთულაზე დააკერებენ წითელ სკლატს სამი ღვინჭის სიგანეს (ღვინჭი—თითების სახსრები, რომლებითაც თითები უერთდებიან, ხელის ზურგს). ამ სკლატს ზიკი ჰქვია. ზიკს ზედ ნაწყვეტ-ნაწყვეტად დააკერებენ შავ, თეთრ და ყვითელ ნაფთულებს, ერთმანეთზე მიყოლებით და გამოდის ნაჭრელა. ფარავის გაკეთების შემდეგ, სადიაცოს მარცხენა გვერდზე ჩაჭრილ ნაპირსა და საყელოს მორთავენ იმავე სახით, როგორც ფარავს, აგრეთვე სახელოებს იდაყვებამდე. კალთებსაც დააჭრელებენ ვისაც როგორ სურს. სკლატით ან მოქარგავენ აბრეშუმის ძაფით, ან შინ დამზადებული ძაფით. შემდეგ სადიაცოს წაკერებენ ქოქომოვებს, — ოთხი ფერის ერთმანეთზე წაკერებულ

რებს. ქოქომოების პირველი წყება შავია, მეორე—ყვითელი, მესამე—წითელი ან ლურჯი და ბოლოს—ლურჯი. ქოქომოებს ბოლოებზე მიაკერებენ სამფეროვან შილით-ომლებსაც დაყოლებული აქვთ დაგრეხილი სირმა. ქოქომო-კანა ნაწილი დანაოჭებულია. ამ ნაოჭებს ნაჩაფნაჲ ჰქვია; თ 15-ია ან 24. ნაჩაფნებს თავებზე წაკერებული აქვს სამ-ანი შილიფა, შემდეგ კიდევ შილიფა. ამას მოსდევს კბილე-დაწყვეტილად გამოჭრილი სკლატი. ნაპირებზე შემოაყოლებ-ეთრ გრეხილებს.

მეორენაირ სადიაცოს კალთამაკერებული სადიაცო ჰქვია. რება იმავე სახისა, როგორც პირველი, მაგრამ სკლატს არ უკეთებენ, არამედ ჰქარგავენ მარტო ნაჭრელათი—სხვადასხვა კრის ძაფით. ზიკ-სამწყვეტულასაც ტოლისას უკეთებენ, სკლა-ის ნაცვლად კალთამაკერებულს დააკერებენ ხოლმე უბე-საკერა-კას. იქსოვება ღვედა-კაჭკაჭიანი. მთლიანად შავ-თეთრი ძაფისა. შეღებავენ ტუტაში ცისფრად ან ენდროში, წითლად ან რუხად. ამ შალს დასჭრიან წინა კალთის სიგრძეზე, წააკერებენ უბეზე და ფარავის მარჯვენა გვერდზედაც ააკერებენ ილიის ძირამდე.

კალთამირგვალას ქსოვენ არშიანს და ცალჭირადაც (უბრა-ლოდ), მხოლოდ შალი კარგად მოთელილი უნდა იყოს. იქსოვება ყველანაირი ფერისა: მოქსოვის შემდეგ ვასჭრიან ფარავიდან მუხ-ლებამდე. ამ ტოლს შეღებავენ ნახევარს ლურჯად ან რუხად, — ნახევარს წითლად. შემდეგ ამ ორი ფერის ნაჭრებს მიაკერებენ ერთმანეთს. ამას თიკვთი ჰქვია. შალს კი სათიკვე. თიკვთსა და მირგვალას ერთმანეთს მიაკერებენ. თიკვთს ძალიან ღამაზად დააჭ-რელებენ სკლატ-აბრე მუმიით—ნაჭრელათი და შიბათი და შუა ჩაყოლებენ სირმის გრეხილს. კალთამაკერებულს წააკერებენ სამ ქოქომს—შავს, რუხსა და წითელს. შილიფაწაკერებულს, ზოგ-ჯერ ქოქომოსაც წააკერებენ. ქოქომო შეიძლება არშიანი იყოს ან სადა. ფარავს დააკერებენ ხოლმე მძივებსა და ძელის ღილებს, მაგ-რამ უფრო ნაკლებად შეამკობენ ხოლმე. სახელოებს მოქარგავენ, როგორც სადიაცო სახელოებს.

ზაფხულში, ტყავის მაგივრად, დიაცები წამოისხამენ ხოლმე ფაფანავს, ქოქლოს, ქათიბს.

ფაფანავი წამოსასხმელია, სადიაცოს ზემოდან. იკერება საუკე-თესო შალისა—ტოლისა. ტოლს ქსოვენ ოთხი მკლავის სიგანეს, არშიანს. მოქსოვილს გარეცხავენ, მოთელავენ მაგრად და დასჭრიან

ცხრა აზლოტს, უკეთესია თორმეტი. ბეჭებში სივანე, აქვს ოთხი მტკაველი. მხრებიდან წელამდე. ორი მტკაველი. აზლოტის სიგრძე წელიდან ბოლომდე სამი მტკაველია, სივანი—ბოლოში ერთი მტკაველი, თავში სამი თითის დადება. აზლოტები დაჭრელეზულია ტომრისა და ჩოხის შიბაით. ტომრის შიბაი თავიდან ბოლომდე, აზლოტის გარეთა ნაპირზე მოკერებული აქვს ჩოხის შიბაი, დაკავკაული. აზლოტებს დააწყობენ ერთმანეთზე, დაადებენ ზედ მძიმე ქვას, რომ კარგად დაიკეცოს, ფაფანაგს წელზე. განივრად აჭრელეზენ ჩოხის შიბაით, სწორით ან დაკავკაულით, აგრეთვე ჯვრებით, მარწულებითა და კვერათი. შემდეგ, ფაფანაგზე ჩამოადებენ ორ-ორ სწორ შიბაის, შუაში გაკერავენ დაკავკაულად შიბაივით. სახელოს ნაკერავებზედაც დააკერებენ შიბაის. შიბაიებს შორის მოქარგავენ დაკავკაულად. საყელოს იმავე ტოლისას უკეთებენ; სიგრძე ოთხი გაშლილი თითია, სიმაღლე—ორი თითი. დააჭრელეზენ სწორი შიბაით და დაკავკაულით. ყველა ამის შემდეგ ფაფანაგს შეღებავენ ლურჯად. აზლოტებსა და კალთებს შორის ამოუკერავე რჩება ორივე გვერდები. ამ გვერდებს ეწოდება **სამხედრო**. ორი მტკაველის სივანისაა. სამხედროს აჭრელეზენ სკლატითა და აბრეშუმით. ნაპირზე მოაკერებენ ლურჯი შალის ნაფთულას, ცერის სივანისას, ამოქარგულს სხვადასხვა ფერის ორი წყვილი შიბაით, შემდეგ — წითელი სკლატის ნაფთულასა და მერე წითელი ან ლურჯი აბრეშუმის შიბაის. სამხედროს გაკეთების შემდეგ შეუდგებიან კალთების გამოყვანას. კალთებს მოაკერებენ სკლატის წითელ ნაფთულას; ამას მოავლებენ ჭრელი აბრეშუმის შიბაის. სკლატს წითელივე სკლატით გახიდავენ სამ ალაგას. მას შუა ჩაკერებენ ყვითელი სკლატის მარტულებს. მარტულებს შემოავლებენ სირმას. აზლოტებს ბოლოებზე მოაკერებენ წითელი სკლატის ნაფთულას ორი თითის სივანისას შიბაით და დააჭრელეზენ. შემდეგ მოაკერებენ ისევ ყვითელი სკლატის წვეპრას. ყვითელი სკლატის წვეპრას მოავლებენ წითელი სკლატის ნაფთულას. ამას დააჭრელეზენ ჭრელი შიბაითი. შიბაით შუა, ნაფთულის ნაპირზე სისვი აბრეშუმით მოქარგავენ დაკავკაულს. ამას გარშემო მოსდევს ყვითელი და თეთრი დაკბილულა, ირგვლივ წითელი სკლატის წვეპრა. სახელოებს დააჭრელეზენ სხვადასხვა ფერის სკლატის მარტულებითა და ჯვრებით. სახელოებსაც აქვს სამხედროები, ნაპირებზე შილიფა შემოვლებული (შილიფა ყაითანია). სამხედროს სამ ალაგას აქვს ღილი და შატა.

**ქოქლო ანუ კაბურა.** ამისი ტოლიც საუკეთესო იქსოვება. ტოლს სიგრძე სამი მტკაველი აქვს. ტოლს მაგრად მოთელავენ და გამოსჭრიან ისე, როგორც ფაფანაგს. ქოქლოსა და ფაფანაგს შორის ის განსხვავებაა, რომ კაბურას დიდ სამხედროებს არ უკეთებენ. შედეგის შემდეგ კალთებს და ფარაგის მხარ-სახელოებს ან წითელ ნაფთულას დაატანენ ან ნაფთულაზე აბრეშუმის შიბას და აყოლებენ სხვადასხვა სახით, ვისაც როგორ სურს. კალთებზე მოაკერებენ შილიფებს. ფარაგებისა და სახელოების წვერებს შემოავლებენ რუხ ან წითელ შილიფებს. სახელოებს წვერები გახსნილი აქვს. სახელოებს გადაიდებენ მხრებზე, როცა სურთ. ბეჭებს აჭრელებენ ნაჭრელათი, მარტულებით, სკლატის კვერილებს დააკერებენ კუთხად და მრგვლად; აგრეთვე ხონბის თვალებს. გარეთა ნაპირზე, წელისა და აზლოტების თავებზე სამი თითის სიგრძით ჩამოკიდებულია სკლატის ნაფთულები, იმნაირადვე აჭრელებული, როგორც მხარ-სახელოების თავები.

**ქათიბი**—იკერება მხოლოდ ნაყიდი ჩითისა ან სატინისა. წითელი ან ლურჯი. ჩითს დასჭრიან როგორც ფაფანაგისათვის ტოლს. სარჩულს უდებენ მხოლოდ ბეჭებზე. წელზე—ნაოჭები. იღლია გახსნილი აქვს. სამხედროს მარტო სახელოებზე გააბამენ ერთი მტკაველის ოდენას. წელზე ნაკერავებს დააკერებენ შალის ნაფთულას, ან სისე-წითელ მიტკალს. აგრეთვე მხარ-საყელოს და ფარაგს. ქათიბს ბოლოებზე მოაკერებენ ბატკნის ბეწვს—მაშთაგს, ქათიბის ფერისასვე. მაშთაგს მოსდევს წითელი მიტკალის დაკბილულა. ბეჭებზე—აჭრელებულია, შიბაით, მძივებით და ღილებით.

**ხარტყელი**—დედაკაცები იკრავენ საღიაცოზე. მხადღება მატყლის ქსოვილისა; სიგანე აქვს ერთი ხელის გაშლა; სიგრძე 5 ადლი. კეთდება წითელი, შავი ან ლურჯი. ბოლოებზე აქვს შილიფა, წელზე ირტყამენ ორფათ.

**მანდილი**—თავსახურავია, მხოლოდ ქმრიანი დედაკაცებისა. სიგანე აქვს ერთი მტკაველი და 4 ღვინჭი. სიგრძით ხუთი წყრდაა, ფესვებიანად. ფესვებს სიგრძე—ერთი წყრთაა. ფესვები იქსოვება ყაითანივით. მანდილი ლურჯია ან შავი. ნაპირზე შემოვლებული აქვს კრელი შიბაი, დაჭრელებულია ნაჭრელათი, გემოვნების მიხედვით. ნაჭრელას მოსდევს კრელი შიბაი, შემდეგ—დაკავკაული ფესვებიდან ერთი მტკაველის სიგრძეზე ააჭრელებენ ლამაზი შიბით და დაქარგულით, აგრეთვე აბრეშუმის ძაფით. მოქარგულებში დასტოვებენ თავისუფალ ადგილს სამი თითის დაღება-

ზე. შიგ. ჩახატავენ დიდ ჯვარს გეშოვნების მიხედვით. ჯვარზე ამოქარავენ პატარა ჯვრებს. ფესვებში ჩატანებულია სხვადასხვა ფერის ბამბის გრეხილები.

**სათაურა ანუ თავსაცმელა.**—კეთდება ლურჯი ან წითელი სკლატისა. დააჭრელებენ ნაჭრელათი. (თუ ეს არა აქვთ, მაშინ ტომრის შიბაით ნაბადს შავად მოქარავენ). მორთავენ ამავე სკლატის სხვადასხვა ნაფთულით. ნაფთულებს შუა გააკეთებენ ნაჭრელებს—ჯვრებს ან დაკავკაულას. შემდეგ დააკერებენ მძივებს. დაჭრელებულ ზედაპირს ზემოდან დაადებენ მუთაქისებურ პატარა ბალიშს,—მოლუნულას, რომელიც შუბლსა ჰფარავს, ერთი ყურიდან მეორემდე. ბოლოებზე მოკერებული აქვს შილიფა. ამით შეიქრავენ კეფის ძირზე. თავსაცმელის ზემოდან გადაიფარებენ მანდილს.

**ქოჭაი**—სილამაზისათვისაა. ყელზე იხვევენ. სამი თითის სიგანისაა, ლურჯი შალისა. მოქარგულზე დააკერებენ მძივებს და ღილებს. ბოლოებზე აქვს შილა, რომელსაც ჩაუშვებენ ფარავის შიგნით.

**სათმე**—ძველად იხმარებოდა თმის ნაწნავებში ჩასატანებლად დაწნული იყო გრძელი შილიფისაგან 11—12 ცალი, ნაწნავების რიცხვის მიხედვით. აჭრელებული იყო მძივებით, ბოლოებში მძივები ქუჩუჩებითა და სკლატით.

**ხელსახვიელა.**—ქალის გრძელ თმას გაწეწავენ, დაართავენ და დაწნავენ, შიგ ჩაურთავენ 5-6 მტკაველის შილიფს, მძივებით შემკულს. ერთ ბოლოში დააკერებენ ღილებს, მეორეზე—აბრეშუმის ძაფით ყულფებს—შესაკრავად. ხელსახვევს ხმარობენ მხოლოდ მარჯვენა ხელზე, დედაკაცებიც და მამაკაცებიც, რომ ხელი არ დაიღალოს მუშაობით. ასრულებს ერთგვარი პროტეზის როლსაც, როცა რომელიმე ხელის კუნთები დაზიანებულია.

**ბაჭიჭები.**—ქალების ბაჭიჭები იქსოვება წინდის-ჩხირებით. სივრძით—კოჭებიდან საბაწრემდე (მუხლამდე). თავსა და ბოლოზე მიაკერებენ შილიფას. სათავეებზე მოაბამენ ბაწარს, რომლითაც დაიმაგრებენ მუხლებთან. ახალგაზრდა ქალის ბაჭიჭები ბოლოებზე დაჭრელებულია.

**თათები**—დედაკაცებისაც ორნაირია: **საქალმე** და **ამოკერებული**.

**ტყავი**—დედაკაცისა სულ არა ჰგავს მამაკაცისას. იკერება ცხვრისა, ხბოსი და შუნჯინვისა (დედალი ჯინვისა). სივრძით მუხ-

ლებამდე ან ცოტა გრძელიც. ნაპირებზე, კალთებსა და ბოლოებზე შემოკერებული აქვს ხბოს ტყავი,—ჭრელი (ხნიერი დედაკაცებისათვის—შავი ან წითელი). ეს შემოვლებული ტყავი ხელის დადების სიგანისაა. ჰქვია **სამწავე**. ასე შემკულ ტყავს **მომწაული** ჰქვია. ხბოს ტყავს მოსდევს წითელი შილა. სამწავე აქვს სახელოების ბოლოებზედაც, ბეჭებსა და ფარაგზე მოკერებული აქვს შავი მაშთავი, ან ჯიხვის თავის ან ფეხების ტყავი. საყელოზე მოყოლებულია ჯიხვის ყურებიც. ამრიგად საყელო ფარავს ბეჭებსაც. საყელოსა და წელს შუა ადგილას ააჭრელებენ ილლიისძირით. ილლიისძირი სამია—სამკუთხედი, სკლატი აჭრელებული მძივებით და ნაჭრელათი. ილლიისძირებს დააკერებენ სამკუთხედებათ თითოს აზღოტებზე და ერთს ბეჭებს შუა. ილლიისძირის გარშემო, ზოგჯერ, მოქარგავენ ხოლმე ჯვრებით.

**ჯლანი**—იკერება ხარისტყავისა. ტყავს მოთელავენ კარგად, მერე გამოსჭრიან და შეკერავენ ჯლანს ყურებიანი მესტებივით. ძირს გაბანდავენ თასმებით, შიგ ჩააგებენ დაფხენილ ჩალას ან თიჯას.

## მ კ უ რ ნ ა ლ ო ბ ა

დიდ ინტერესს წარმოადგენს ხევსურული მკურნალობა, როგორც ხალხური, შეიძლება ითქვას პირველყოფილი მკურნალობა. ამ მკურნალობაში, რასაკვირველია, დასტაქრული მკურნალობა უკეთესად არის განვითარებული, ვიდრე შინაგან ავადმყოფობათა მკურნალობა, რადგანაც ჭრილობა უფრო დასანახი, მისაწვდომი და რეალურია განუვითარებელი გონებისათვის. წამლებით მკურნალობის გარდა, შინაგან ავადმყოფობას როგორც ყველგან, ხევსურეთშიაც, შელოცვითაც მკურნალობენ, განსაკუთრებით იციან შელოცვით მკურნალობა წითელი ქარისა და შეშინებულისა. შელოცვით მკურნალობა შეიძლება შევადაროთ შთაგონებით მკურნალობას. შელოცვით მკურნალობენ მხოლოდ დედაკაცები.

სანიძეშორდ მოვიტან დამახასიათებელ ორ ლოცვას.

### წითელი ქარის ლოცვა

სახელო ხეთისაო, სახელითა ხეთისათა ისხდეს დედანი, მაჰანი კარსა სამოთხისასა, იტყოდეს წამალსა. რაის წამალსა? წითელი ქარისასა, ყვირ-

ლის ქარისასა, პირქვა მარტულისასა, სუროვანდი-  
სასა. ჩვენ სამნი ძმანი ვიყვენით: მათე, ივანე, მარ-  
კოზი. მათსა წავედით, კვალი მივკვლიეთ, კვალი  
მივკვლიეთ, ხავრისა, ხიარაჯისა, წითელი ქარისა,  
ყვითლის ქარისა, პირქვა მარტულისა, სუროვანდი-  
სა. ორბი იყო ორბისა, მხართა შუა გაზრდილი.

ორბსა ლარი დაუგით, ლარი აბრეშუმისა,  
მოვიდოდა ქრისტე ღმერთი ცხრით მღვდელითა,  
ცხრით დიაკენითა, ერთად დაღადებითა. ველთა  
ველი ორი, ტანთა ტანი ორ, ვაჟყმას მოხვდები,  
ქალყმას მოხვდები, ხორცსა დაადნობ, სისხლსა  
დაადენ, ჟამსა ამტეხენ, ჟამსა დამეცებისასა, ჟამსა  
ამტეხენ, ჟამსა თენებისასა, გამე, გამაიკრიფე,  
წყალთა შუა თევზივითა, თორემ გამოგიყონ  
ღვთისა შეწვევითა, ცხრანი უკვრენ შენს ჭირს,  
შენს სატკივარსა, ცხრანი ანიავებენ ოქროს ფიწ-  
ლითა. ფუი, ჯვარი გეწერას, ეგრამც მალე მარ-  
ჩები!

### შეშინებულის ლოცვა

დაწყებამდე აიღებენ რაიმე ჩვარს, დაკეცავენ ორად ისე, რომ  
ჩვარის ყურები ერთმანეთს გაუთანაბრდეს. შუაში გაურჭობენ ნემსს.  
შემდეგ ჩვარს დაახვევენ მაგრად, რომ ნემსი დაიმალოს. ჩვარს  
გულზე დაადებენ შეშინებულს, ზემოდან რამე რკინას და შემლო-  
ცველი ზემოდან დაადებს ხელს. შემდეგ იტყვის ლოცვას:

გულო, გულის ალაგასა, ჩაჯექ თავის ალაგასა,  
თეთრი ქორი ქანდარასა, ქათამი—საბუდარსა. გუ-  
ლო, რამ შეგაშინა? ცის ქუხილმა? მიწის ძვრამა?  
ხარის ყვირილმა? ცხენის ჭიხვინმა? ზვავის ქუ-  
ხილმა? მამლის ყივილმა? დედლის ჭყივილმა? გუ-  
ლო, გულის ალაგასა, ჩაჯექ, თავის ალაგასა.

შემლოცველი ლოცვას იტყვის სამჯერ. მერე ვახსნის ჩვარს  
და გასინჯავს ჩვარის ყურებს. თუ ერთ-ერთი დასჭარბდა, მეტი მო-  
ვდა, ეს იმის ნიშანი იქნება, რომ გული შეშინებულა; ამიტომ  
შემლოცველი იმდენხანს გაიმეორებს ლოცვას, ვიდრე ყურები გა-  
ტოლდება. ხევსურების რწმენით ყურები აუცილებლად გატოლდე-  
ბა და ავადმყოფიც განიკურნება.

ავი თვალის წინააღმდეგ ლოცვას ასეთი წესი აქვს. დიდხუთ-  
შაბათის დილით შემლოცველი დედაკაცი ხმამოუღებლივ წავა-  
ცხრა სხედასხვა წყაროზე და თუნგში ჭიქით მოაგროვებს ცხრა  
ჭიქა წყალს. ზოიტანს შინა და ააღუღებს. თან თითო-თითოდ ჩაყრის  
ქაქემს (ნაკვერჩხალს). თითო ქაქემზე ჩაიფიქრებს (ახსენებს) იმის  
სახელს; ვიზედაც ეჭვი აქვს ავთვალთანობისა. ქაქემში თუ აუშოშ-  
ხუნდა, ეს იმის ნიშანი იქნება, რომ ავთვალთანი ის არის, ვინც  
ამ ქაქემზე იყო ჩათქმული. ქაქემის ჩაყრის დროს შემლოცველი  
ასე იწყევლებს: „ეგრემც ჩაიშრიტების, ვინც ჩემს მეკვემურობის  
სახლყოფას ცუდი თვალთ შემოხედავს“.

მთელ ამ ცერემონიას თვალის ჩაშრეტა ჰქვია.

ამით ვათავებთ ამ სავსებით ცრუმორწმუნეობის ამბავს და გა-  
დავდივარ იმ მკურნალობაზე, რომელსაც შეიძლება ნამდვილი  
მკურნალობა ვუწოდოთ, თუმცა აქ ბევრი რამ შეგვხვდება უხეშიც,  
დაუსაბუთებელიც, მაგრამ ყოველ შემთხვევაში, გამოცდილებასა  
და ცოდნაზე დამყარებულიც.

ხევსურეთში არიან გამოცდილი, სახელგანთქმული ექიმები  
მაგრამ ხალხს ახსოვს ძველი, სახელოვანი ექიმები. ფშავ-ხევსურეთ-  
ში სამი ასეთი ექიმის სახელია დარჩენილი. ერთი ყოფილა ფშავის  
ხევში — ბაჭყალიაძე, ორი კი ხევსურეთში — ბლარათ თათუა და  
გახუა. ექიმობის გარდა ისინი საზოგადოებრივ მუშაობასაც აწარ-  
მოებდნენ: ამორჩეულ კაცებად იყვნენ — სახალხო საქმეების გამრ-  
ჩეველები და მომგვარებლები და მხედარ-მეთმარების მეთაურებიც.  
საერთოდ ასეა ხევსურეთში — ექიმი კაცი ბრძენ და კითხულ კაცად  
იყო მიჩნეული. ექიმი თუ საზოგადოებრივ საქმეში არ მონაწი-  
ლეობს, მისი გავლენა და სახელი დიდი არ არის.

უნდა ითქვას, რომ ამჟამად ფშავ-ხევსურეთში მდგომარეობა  
დიდათ შეიცვალა. ის, რასაც მოგითხრობთ, სულ ახლო წარ-  
სულის ამბავია. ამ რამდენიმე წლის წინათ კი, იმდროს, როდესაც  
ავტორი საბჭოთა ხელისუფლების მიერ მივლინებული იყო ფშავ-  
ხევსურეთში, როგორც ექიმი, მდგომარეობა სულ სხვანაირი იყო.  
იქ ჯერ ისევ ბატონობდა ძველი ჩამორჩენილი გვაროვნული, სა-  
შუალო საუკუნოების კულტურა. მაგრამ საბჭოთა ხელისუფლებამ,  
ლენინ-სტალინის პარტიამ, დიდი ხტალინის ხელომძღვანელობით  
აქაც შეიტანა შუქი კულტურისა და ბედნიერი ცხოვრებისა. დღეს  
ფშავ-ხევსურეთში არის სკოლები, რადიო, საავადმყოფო; უმაღ-



ლესი განათლების მქონე ექიმები მომსახურეობას უწყევნ მოსახლეობას. ხალხი უკვე მიეჩვია ამათ და თავის ძველ ექიმბაშებს აღარ მისდევს. ხევისურეთში განთქმულმა დასტაქარმა მგელიკა ლიქოკელმა შეწყვიტა ექიმობა და მეურნეობას მიჰყო ხელი, მაგრამ თავისი სიცოცხლე ასოცი წლის მოხუცმა ტრალიკულად დაამთავრა. მას მარცხენა ფეხზე ფლეგმონა გაუჩნდა. ტკივილებმა შეაწუხა. თვითონ გაიკეთა ოპერაცია და წამლობა დაუწყო თავის თავს, მაგრამ ვერა უშველა რა და 1935 წლის ნოემბრის პირველ რიცხვებში თავი მოიკლა თოფით.\* მგელიკა, ცნობილი დასტაქარი, დინჯი, ტანად მორჩილი, დიდი გამჭრიახი გონების პატრონი იყო, დიდი მუხსიერების მქონე და იმათებურად დიდად მცოდნეც არ იყო ისეთი ძველი ამბავი, გადმოცემა, რომელიც მას არა სცოდნოდა. საუბარიც დინჯი ჰქონდა, იცოდა დაწვრილებით თხრობა

**მგელიკა ლიქოკელის სამკურნალო წესები.** მგელიკა ლიქოკელის ექიმობაზე ბევრი რამ გვაქვს მოთხრობილი პირველ წიგნში: აქ მსურს დამატებით ვთქვათ მისი სამკურნალო წესების ამბავი.

მგელიკა ჭრილობების მოსარჩენად ხმარობდა არხვის (ფრინველია) ქონს, ირმის კინწვის (ფეხის) ძვლის ტვინს და დათვის ქონს.

სისხასი (დეზინტერიის) და ყაბზობის წინააღმდეგ ხმარობდა ერთსა და იმავე წამალს — ხვითოს. ხვითო არის რაღაცა ბურთულა, ირმის რქის ძირში, გარედან ყვითელია, შიგნიდან თეთრი. ხვითოს ლესავდა წყალში და ისე ასმევდა ავადმყოფს. მგელიკას სიტყვით ეს უებარი წამალია, ორ დღეში ჰკურნავს ავადმყოფს.

ბისტს (თვალზე თეთრი რომ გადაეკრობა) მგელიკა მკურნალობდა ყოჩნახ ნაღველით. ერთი წვეთი თვალში. ეს წამალი მეტად მწვავეა. ამასვე ხმარობდა სათესლე ჯირკვლების გასივების წინააღმდეგ. წყალში გახსნილს ასმევდა ავადმყოფს ერთხელ ან ორჯერ.

ჭრილობის მოსარჩენად სხვა მალამოსაც ამზადებდა: ორი წილი თხისქონი, ერთი წილი საკმეველი, წმინდა სანთელი, ორი წილი კარაქი, ყაყაჩოს ღეროს წვენი, ერთი წილი ზინთი (კევი). მგელიკა ამ მალამოს ლურჯ მალამოს ეძახდა.

მეორე რეცეპტი: შაბიამნის ფხენილი, ჯანდარი (საღებავი) და ფისი, ერთმანეთში არეული. ხმარობდა წამხდარი ჭრილობის

\* მგელიკასი და მისი მკურნალობის ამბავი იხ. „ხუთი წელი ფშავ ხევისურეთში“, წიგ. I.

მოსაწმენდად. შემდეგ კი ჭრილობას ადებდა მომწვანო ფერის მა-  
ლაამოს. ეს მალამო ჭრილობის დასაამებელ საუკეთესო წამლად  
ჰქონდა მიჩნეული.

მესამე რეცეპტი: მალამო ყვითელი ფერისა. ხმარობდა ჩირ-  
ქიანი სიმსივნის გამოსარწყობად, გამოსაწოვად—დარიშხანას ურევე-  
და წყალში გახსნილ ჯანდარში.

ამრიგად, მგელიკა ლიქოკელის აფთიაქში წამლებს საკმაოდ  
მოუყრიათ თავი, მაგრამ ამ წამლებს ხევესურები თვითონაც, მგე-  
ლიკას დაუკითხავადაც, ხმარობენ. მგელიკა თავის წამლებს საი-  
ღუმლოდ არ ინახავდა. საინტერესო ის არის, რომ ლიქოკელი  
მკურნალობაში კონსერვატორი არ იყო. ახალ წამლებსაც სცდიდა  
ხოლმე, ბევრჯერ სცდიდა, და თუ უკეთესი გამოდგებოდა, ძვე-  
ლებს უარყოფდა ხოლმე.

### სამკურნალო ბალახები

რადგანაც ხევესურეთი მთა და ცივპავიანია, ამიტომ იქ კულ-  
ტურული მცენარე ვერა ხარობს. იშვიათად შეხედება ადამიანი  
იჯახს, რომელსაც ბაღია ან ბოსტანი ჰქონდეს. ხევესურები ხილად  
ხმარობენ მთის ველის მწვანელიეულობას, ხმილსა და პანტას. მაგ-  
რამ ამ ბოლო დროს, საბჭოთა ხელისუფლების მზრუნველობით,  
ხევესურებმა ცოტ-ცოტათი უკვე მიჰყვეს ხელი მებაღეობას. რვა-  
ვენ და თესვენ ისეთ მცენარეებს, რომლებიც ეგუება ადგილობ-  
რივ პირობებს.

ბევრნაირი საჭმელი ბალახია ხევესურეთში. ამათში მეტი წი-  
ლი სამკურნალო ბალახებადაც ითვლება. მაგრამ არის მხოლოდ  
წამლად სახმარი ბალახებიც.

საჭმელად და სამკურნალოდ სახმარი ბალახები: შუბუა დიყსა  
ჰვავს. ფართო ფოთოლი აქვს. ტკბილია. სჭამენ მარტო ძირს  
(ფესვს), ღეროს კი ხმარობენ კბილისტკივილის წინააღმდეგ, რო-  
გორც გამაყრუებელს. ხოხნუტა — მოტკიბლოა და ძალიან ცხარე.  
სჭამენ ძირსაც და ღეროსაც. ძირს ხმარობენ გველის ნაკბენზე.  
ტყისკვლია — საამო სუნი აქვს. ტკბილია. იჭმევა მხოლოდ ღერო.  
თესლს კი ხმარობენ როგორც საუკეთესო სანელს ლობიოსა და  
ხინკალში. იხმარება კუჭისტკივილის წინააღმდეგ. სჭამენ წყალში  
შაჭრილს. დუცი — ფართო ფოთლები აქვს. სჭამენ მხოლოდ ღე-  
როს. წამლად იხმარება სიცხის წინააღმდეგ. მოტკბილია.

**მხოლოდ სამკურნალო ბალახები:** **ყინტორა** — სიცხის გამომ-  
 ნელებელი და ოფდმდენი წამალია. ხმარობენ მის ბუბულას, რო-  
 გორც ჩაის. ამავე მიზნით იხმარება **ცაცხვისა** და **დუდგულის** ყვა-  
 ვილები. დუდგულის ყვავილი ტკბილია, ცოტა გალა სუნი აქვს.  
 გრძელი ფოთოლი იცის; ბუჩქნარაა, ტყის მოდგმისა. დიდი არ  
 იზრდება, ქარების წამალია. **ანწლი** — დამწიფებულ ნაყოფისას  
 ხლიან არაყს და იმითი იზილანვენ მტკივნეულ ადგილებს. **წყლუ-**  
**ლისწამალი** — დაჭრილის წამალია. გაახმობენ, დანაყავენ და აყრიან  
 ჭრილობას. **მთისბობოლა** — წვრილფოთოლაა. იხმარება იმგვარად-  
 ვე. დიდხანს ინახება. **კლდისდუმა** — კლდეზე მოდის. სქელი ფო-  
 თოლი აქვს. ზედა კანს მოაცლიან და ისე დაადებენ ჭრილობას.  
 ტკივილებს აყუჩებს. **შალისძირი** — ყვავილი ლურჯი აქვს, ძი-  
 რი — თეთრი. დაჩეჩქვავენ, მოხარშავენ რძეში, გააციებენ და და-  
 ადებენ დახვეებულ (მსივან) ადგილზე. მგელიკა ლიქოკელის  
 სიტყვით, სიმსივნე მეორე დღესვე ქრება. **ცხენისტერფა** — მრგვა-  
 ლი, სქელი და თეთრი ფოთოლი იცის. ამოდის კლდეზე. იხმარება  
 სასწრაფო დახმარების მიზნით, მაგ., გზაზე დაშავებისას, ექიმთან  
 მიყვანამდე. **გველისწამალი** — მინდვრის ბალახია. ყვითელი ყვა-  
 ვილი იცის. გველის წამალს იმიტომ ეძახიან, რომ თქმულებით,  
 ეს წამალი ერთ ხევსურს გველისაგან უსწავლია. მას გველი და-  
 უჭრია ცელით. გველი გასრიალებულა, რაღაც ბალახის ყვავილი  
 მოუწყვეტნია და ჭრილობაზე დაუდვია. მერე თავისებურად და-  
 ხვეულა და კლდის ძირში განაბულა, თითქოს ჩასძინებია. ხევ-  
 სურს თვალი დაუჭერია მასზე. ერთი დღე-ღამის განმავლობაში  
 გველი განკურნებულა. იმ ხევსურს ის ყვავილი ჯერ პირუტყვზე  
 უცდია, მერე ადამიანზე. **ჩაღალდი** — ჭაობის ბალახია. ყვავილი  
 არ აქვს. წვრილდერაა. ხავის (სიმსივნის) წამალია. იხმარება და-  
 ჩეჩქვილი. **სისხლიანი ბალახი** — ქვიშნარში იზრდება. ყვავილი  
 აქვს და მრგვალი ფოთოლი. რომ მოგლიჯოთ, წითელი წვენი გად-  
 მოუვა. მის ფოთოლს გაახმობენ, დაფქვავენ და დააყრიან ჭრილო-  
 ბას. **სამყურა** — მანდვრის ბალახია. დაღეჭავენ ან დაჩეჩქვავენ და  
 დაადებენ ჭრილობას. **ციცისკუდა** — იმგვარადვე იხმარება, უფრო  
 ხშირად საქონელზე, როცა ის ფეხს მოიტეხს ან დაიჭრის. **ხარი-**  
**სენა** — ჩრდილში მოდის. ხარის ენასავით პრტყელი ფოთოლი  
 აქვს. ფოთოლს გაახმობენ მზეზე, დაფხვნიან და დააყრიან ჭრილო-  
 ბას. **აბზინტა** — მზიან ადგილას მოდის. კარგი სუნი აქვს. მისი ფო-  
 თოლი კუჭის ტკივილის წამალია. ფოთოლს გაახმობენ, დაფშენიან,

ჩაყრიან ჭიქა არაყში და დაღვევენ. **ბალბა** — ველის ბალახია. დი-  
დი არ იზრდება. წვრილი ფოთოლი და წითელი ყვავილი აქვს.  
ყვავილს გაახმობენ, დაფხენიან, აურევენ. კაცის ძვლის ფქვილსა-  
და შარდში, მოზილავენ ცომს, კვერივით გამოაცხობენ, გაახმობენ,  
შემდეგ დაფხენიან და ჭრილობაზე ხმარობენ. ხეცურების აზრით  
საუკეთესო წამალია.

**მხოლოდ საჭმელი ბალახები.** **კენკემა** — მინდვრის ბალახია.  
ტკბილი. იჭმევა მხოლოდ ღერო. **ბიბუ,** — ესეც მინდვრისაა, ნივ-  
რის გემო აქვს. წნილად სდებენ ფოთოლს. **ხიფხოლა** — ერთი ბა-  
ლახის ძირსა ჰქვიაან მის წვერს კი ხიფლისყვია — **ჭიმა.** გემოთი ყველა  
ბალახსა სჯობია. ძმრითა სჭამენ. **კრავისთვალა** — მისი ნაყოფი  
ფხილსა ჰგავს. სჭამენ მხოლოდ ძირს. მოტკბოა. **ბიწყინტა** —  
ტკბილია. სჭამენ მხოლოდ ძირს. ჭამის წინ უსათუოდ უნდა გა-  
ირეცხოს. **ბაჩიკა** — მინდვრის ბალახია. ტკბილია. სჭამენ ძირსა და  
ღეროს. მისი ჭამა უყვართ ხენა-თესვაში. **მჭივანა** — მის ფოთოლს  
სჭამენ ძმარში ჩაყრილს. **თვითმავალა** — წელიწადში ორჯერ მო-  
დის. მხალია. **ნაცარქათამა** — მხალია. **წითელმხალა** — იჭმევა მხო-  
ლოდ მოხარშული. **მონადირეთ მხალა** — ტკბილია. **ალოშა** — ტკბი-  
ლია. ფოთოლს თუ მოველეჯთ რძე გამოვა. იჭმევა ღერო. **ჭერ-  
თხალა** — მყავე ბალახია. სჭამენ მარტო ღეროს. **ველისწიწმატი** —  
მომწარაა. სჭამენ ღეროს. **მუავია** — წვრილი ფოთოლი აქვს. ძირ-  
ტკბილია — მრგვალი ძირი აქვს, ტკბილი. იჭმევა მხოლოდ ძირი.  
**დიყი** — დიდრონი ფოთოლი აქვს. ტკბილია. მარტო ღეროსა  
სჭამენ.

## ფ შ ა ვ ი

ფშავლების განვითარების საფეხურები, როგორც ეტყობა, ისეთივე უნდა იყოს, როგორც ხევსურეთისა, მაგრამ ფშავლები გაცილებით წინ არიან წასულნი. ცხოვრების ძველი წეს-წყობილებზე ფშავლებს უკვე დიდიხნის დავიწყებულ აქვთ. აქ აღარ არის სისხლისადების წესები, საკუთარი რჯული (სამართალი), არც მართვა-გამგეობის საკუთარი ინსტიტუტი. მათ შერჩენილი აქვთ საყოფაცხოვრებო წვრილმანები ადათები, საკუთარი დიალექტი, ძველი სარწმუნოებრივი კულტის ნაშთები.

თვით ფშავლების თქმით, მათი წინაპრები შორეულ წარსულში გამოქცევიან მონურ ცხოვრებას და თავი აქ შეუფარებიათ; მთებში, სადაც მონათმფლობელობა და ბატონყმობა ვერ მისწვდებოდა. ცხოვრობდნენ თავისუფლად, მაგრამ ამ თავისუფლების დასაცავად მათ ბევრი ბრძოლა გადაუტანიათ: არაგვის ხეობის ფეოდალები მუდამ ცდილობდნენ თავიანთი ბატონობა იქაც გაეგრძელებიათ. როგორც ხევსურეთშიც, ეს ბრძოლა, თავისუფლების შენარჩუნების ეს სურვილი, იყო იმისი მიზეზი, რომ ფშავლებს დიდ ხანს, ხევსურებს კი უფრო მეტხანს საბჭოთა ხელისუფლების დამყარებამდე შერჩათ თავიანთი ცხოვრების თავისებურებანი. ამის მიზეზია — ერთი მხრით პოლიტიკური და მეორე მხრით — ეკონომიური პირობები. ფშავი მდიდარია ალპიურე საბალახოებით, რაც ხელს უწყობს მეცხვარეობის განვითარებას. ზემოთმოხსენებულ პოლიტიკურ გარემოებას მეორეც მოჰყვა — გაიხსნა გზა ბაზრისაკენ. რუსეთმა მოითხოვა მატყლი. ამან გააძლიერა მეცხვარეობა და ფული შევიდა ფშავში. ფულმა შესცვალა ძველი ნატურალური მეურნეობა. გაჩნდა, ასე ვთქვათ, სამრეწველო მეცხვარეობა. გაჩნდნენ მდიდარი მეცხვარეები და ღარიბი მწყემსები. გაჩნდა კლასობრივი უთანხმოება. ამან კი დაარღვია ძველი გვაროვნული რეჟიმი. მეცხვარე გავიდა თავისი ხეობიდან. კუთხური კარჩაკეტილო

ბა, უეჭველად, იმანაც დაარღვია, რომ მეცხვარეები ზამთრის საძოვრების გამო დიდი ხნით შორდებოდნენ თავიანთ ქვეყანას.\*

ეს პირობები არა ჰქონდათ ხევესურებს. ხევესურეთი უფრო მიუვალი ადგილია. ფეოდალები აგრე ადვილად ვერ უდგებოდნენ მათს ქვეყანას. ხევესურებს ბრძოლა უმთავრესად გეზობელ სხვა ერებთან ჰქონდათ ხოლმე — ქისტებთან. ეს ბრძოლა, თავისი სასიათით უფრო ყაჩაღური იყო. მეცხვარეობას ხევესურები არ მისდევდნენ, რადგანაც არა აქვთ ისეთი პირობები, როგორც ფშაველებს. ხევესურული ძროსა განთქმულია კარგი ხარისხის რძით, მაგრამ კონკურენციას ვერ გაუწევდა რუსეთის მხავალრიცხოვან ძროსებს. ყაჩაღური თავდასხმები ქისტებსა და ხევესურეთს შორის ბოლოდრომდე იყო, საბჭოთა ხელისუფლების დაწყებამდე. ეს ყველაფერი ერთად ხელს უწყობდა ძველებურ, თემურ-გვაროვნულ წყობის შენახვას.

ასეთია ფშაველებსა და ხევესურებს შორის განსხვავება, თუმცა ტერიტორიალურად ისინი კარისმეზობლები არიან.

მაგრამ ფშაველებში გვაროვნული წყობილებისა და ძველი კულტის ნაშთები მაინც მთლიანად ვერ არის ამოფხვრილი. დარჩენილია, წვრილმანები, რომლებიც არ არიან ინტერესს მოკლებულნი.

## გვარები ფშავეში


გვაროვნული წყობის თვალსაზრისით ფშავეში ყველაზე საინტერესოა უკანა ფშავეში მცხოვრები სამი გვარი: **გაბილოურები** — სოფ. ხოშარაში, შეადგენენ 23 თაობას. **ქისტაურები** — ძირითადად ცხოვრობენ სოფ. შუაფხოში. რამდენიმე თაობაა. **თურმანაულები** — სოფ. გოგოლაურთაში.

ფშაველების თქმით გაბილოურები თუშის მოდგმისანი არიან, ქისტაურები — ქისტებისა; გამოსახლებულან სოფ. ღულჩხორეგოდან (ქისტეთიდან). სამნი ძმანი ყოფილან. ერთი დასახლებულა მთიულეთში, სოფ. გაიბოტეში; მეორე — ხევესურეთში, სოფ. ღულში; მესამე — ფშავეში, სოფ. შუაფხოში. ფშავეში დასახლებულს დარქმევია **ქისტაური** და ეს სახელი მერე გვარად ქცეულა. ფშავეში ქისტაურები, სოფ. შუაფხოს გარდა, ცხოვრობენ თხილიანში,

\* უმთავრესად გადიან შირაქში.


არახინჯაში, ვანხევი, სტროფაში, მათურასა და ხორხში (წინა-ფშავეშია, ჩრდილოეთის მხარეზე).

ქისტაურების გვარის თაობები გამოსახულია აქვე მოთავსებულ სქემაში.



ამ სქემაში მოხსენებული ქოჩანი ყოფილა კუქუნანის გერი. ბერიკაული კი ქოჩანის გერი. ჩარბოდანი ბერიკაობას დაკარგულა ბავშობაში. უპოვნიათ კუქუნანთ. იმათში გაზრდილა და აქვე დარჩენილა. ამაჟამად მის ჩამომავლობას ჩარბოდაშვილის გვარი აქვს, მაგრამ ქისტაურება ეკუთვნის. ამ სქემაში მოქცეულია ლუღელი ქისტაურების გვარიც. ქისტაურების განაყარნი შირაქშიც ცხოვრობენ, სოფ. ფუძნარში. ყველა ამათ შორის სისხლისაღრევა აკრძალულია. გვაროვნული წესების დამრღვევს (უმთავრესად სისხლისამღვრევს) გვარი აღკვეთს, დასწყევლის საგვარეულო ხატში და განდევნის.


მეორე მთავარი გვარია გაბიდოურის გვარი.



ამ სქემაში აღნიშნულ თითოეულ გვარში კიდევ ბევრი მამათაობა შედის. გაბილოურების საცხოვრებელი სოფ. ხოშარა, როგორც ეტყობა, მთავარი ფოკუსია. ფშავის დასახლებისა, რადგანაც, ფშავლების თქმით, შფავლების პირველ წინაპრებად ვაბილოურები უნდა ჩავთვალოთ. ნამდვილად კი, ესაა რასაკვირველია, შეუძლებელია, იმის გამოკვლევა, თუ ვინ იყო თავდაპირველი მოსახლე ფშავისა და ვისგან წარმოდგენენ ფშავლები.


ამ ორმოცდაათი წლის წინათ სოფ. ხოშარაში გაბილოურებისა 70-მდე კომლი ყოფილა. ესაა კი 3—4 კომლიაა. დანარჩენები გადასახლებულან საქართველოს სხვადასხვა კუთხეში. ამ 3—4 კომლს მომატებიან ჯალაბაურები (ამჟამად მისრიაშვილები), ცხოვრობენ სოფ. მისრიანთკარში. ჩამომავლობა ამ გვარს მეტად მცირე ჰყავს.

მესამე გვარი, თურმანაულები, შედგებიან:



ბეყონთა განაყარნი არიან ხადიანი, ნაცარანი, საფარანი, ჯანანი. ბრიყვანის განაყარნი — ნაროზანი, ჯაფუანი, გარანი, ქაჯმეფენი. ამავე სოფელში — გოგოლაურთაში სახლობს სხვადასხვა





ეს გვარები შედიან თურმანაულების ფრაქტიაში, მაგრამ არა სისხლის ნათესაობით, არამედ ერთ ხატშეფიცულობით.


მოდემის ათი გვარი, ათი განაყოფი: მახაურნი, მგელიანი, ტუნტურანი, კაკაბელნი, საყვარელანი, ჩიტუანი, ბუდურანი, ხაზონი, ჯიგრაულნი, გიგაურნი. გიგაურების განაყარნი არიან; წონწკურანი, მღვლიანი, ცქიფანი, ჯიგრაულნი იყოფიან სამად: ყაყიჩანი, ნადირუანი, ბალიურნი.

ყველა ესენი, თუმცა სხვადასხვა ჩამომავლობისანი არიან, მაგრამ ერთი ხატის ყმადშეფიცულებად ითვლებიან და ამიტომ ერთი ხატის ფრაქტრიად შეიძლება ჩავთვალოთ. ვინც ახალი მოსახლე მივა და მათ ხატში ძმობას შეჰჭიფავს, ისიც იმავე ფრაქტრიას მიეკუთვნება. მამასადაძე თურმანაულთა გვარი უძლიერესი ფრაქტრიაა ფშავში.

სოფ. გოგოლაურთაში რამდენიც ახალი, უცხო გვარის კაცია შენიხნებული და ხატს შეფიცული, იმდენი სამანია ჩაყრილი. საერთოდ, როგორც ვთქვით, ეხლა ძნელია გვაროვანი ნათესაობითი კავშირის დადგენა. ჩვენ ვეძებდით მოხუცებულებს, რომლებსაც კარგად ეცოდინებოდათ თავიანთი ეს წარსული. ასეთი ადამიანი შემხვდა, დავით თურმანაული, კითხული კაცი. მისი სიტყვით, ყოფილა სამი ძმა თურმანაული. უმცროსი — გარაი — ბეჩავი ყოფრ-


ლა. განდგომილად დადიოდა ხატის მიდამოებში და თავისთავის ლაპარაკობდა. ყველა დასცინოდა. მე ასე იმიტომ დავდივარ, რომ ვხედავ ორ ხარს, ამბობდა გარაი: ერთია წითლავი, ქვენაით (ქვემოდან) მომავალი, მეორე ნისლავი — ზენაით. (ზემოდან) მომავალი. წითლავი დასძლევს ნისლახარს და ისევ ზევით მიაშურებსო. წითელი ხარი ნიშანი იყო გარაის ბედისა; ნისლა კი ლაშარის ჯვარსა. ძმებმა განიზრახეს გარაისათვის ცოლი მოეყვანათ. მაგრამ მას ქალს არავინ აძლევდა. ძმებმა მგზავრს წაართვეს ცოლი და ძმას მიჰგვარეს. ხალხმა ეს არ იყაბულა. ლაშარია ჯვარში შეიკრიბა, გარაის ჩაქოლვა სურდა. გარაი წყალში გადახტა. ხალხს ეგონა, წყალი დაახრჩობსო. მაგრამ გარაი წყალში სამჯერ ჩავარდა, გაიბანა, მერე მივიდა და ლაშარის ჯვრის დროშა აიღო. ამით მან ხალხის პატივისცემა დაიმსახურა. შემდეგ იგი გაუძღვა ხალხს, ქისტებს დაეცა, დაამარცხა და მრავალი ნადავლით დაბრუნდა.

სოფ. მუქოში მარტო წოწკურაულები ცხოვრობენ. ესენი პატარა გვაროვნულ ფრატრიას წარმოადგენენ:



ამ ფრატრიიდან ზოგჯერ თურმანაულების შმადნაფიცობ, გოგოლაურების ხატისა. წიკლაურების განაყარნი გატასახლებულნი არიან ხევში. ისინი გვაროვნულ ურთიერთობას არ სწყვეტენ თავიანთ ფშაველ მოგვარებთან. ფშაველების თქმით ეს წიკლაურები ხევსურეთიდან, სოფ. ბლოდან გადმოსახლებული წიკლაურის ჩამომავლები არიან. ის კი კაცისმოკვლის გამო ყოფილა გამოქცეული საშობლოდან.

სოფ. ცაბაურთაში სამი მთავარი გვარია: გოგანი, ბეკი, მიგრი. ვიდაცის, შორიდან მოსულის გერის ჩამომავლები არიან. ამათ შეიძლება ვუწოდოთ ცაბაურების ფრატრია.



მიგრიაულთა გვარის წარმოშობას ასეთი გადმოცემა აქვს. სამ ძმაში ერთი ყოფილა უყმური, მიუკარებელ ჯ კაცი. ამ ხასიათის გამო მას დარქმევია მიგრი. ვერ შეგუებია თავისიანებს და გადასახლებულა სოფ. წინაკარში. შემდეგ ამ სოფელს დარქმევია მიგრიურთა. გოგა და ბეკი დარჩენილან ცაბაურთაში. მათი ჩამომავალნი ამჟამად სხვადასხვა კუთხეში არიან გადასახლებულნი. ზოგს სხვა გვარსაც ატარებს: მაგ., გოგანის ჩამომავლობა პანკისის ხეობაში ცხოვრობს — სოფ. პანკისსა და კინთაში\*.


მეშვიდე გვაროვნულ ფრატრიას შეადგენენ გულბათანი\*\*.

\* სოფ. ცაბაურთაში ერთი განსაკუთრებული ძეგლია. იქ მარხია ტაბოსტა ჭრუნიშვილი, დიდ განთქმული ვაჟკაცი.


\*\* გულბათის გვარს ჰყოლია ერთი განთქმული ვაჟკაცი — გულბათი (საერთოდ ყოველ გვარი ამჟამად, რომელიმე გმირით, რომელიც გვარში ჰყოლია ოდესღაც). გულბათზე ლექსია გამოთქმული:

ჩოლოგაურთა გულბათო,  
 ღმერთმა გიცხონოს მკვდარია!  
 თორმეტთა შუა დაბრუნდი,  
 როგ მეკალოე ხარია.  
 მარჯვენა მოგჭრეს ლეკებმა,  
 მარცხნივ იხმარე ხმალია.

აი უწინდელი ძირითადი სოფელი იყო ქიჩო. ამჟამად აქ გულბათა-  
 თანი მხოლოდ რამდენიმე კომლია. სხვები სხვადასხვა სოფელშია  
 გაფანტული, გადმოცემით, გულბათაანი მოდგმით ოსები არიან.




სოფ. უძილაურის გვარების ამბავი კარგად ვერ გავიგე, რად-  
 ვან ვერა ვნახე ამდის. მცოდნე აღამიანი. ამ სოფელში შვიდი მთა-  
 ვარი გვარია, სხვადასხვა მოდგმისა. მაგრამ, რაკი მათი ძირ-ფესვი  
 ვერ გავიგეთ, ყველა ესენი ერთ გვაროვნულ ფრაქტრიაში მოვაქ-  
 ციეთ:



ამ გვართა განაყარნი სხვადასხვა სოფელში ცხოვრობენ,  
 ავით ამ სოფელში კი ეგზოგამიური წესია.  
 აქ მოხსენებულ გვარებზე ჰყავთ თავიანთი მამათათობა, მაგრამ


არ ვიხსენიებთ, რადგანაც ამას ჩვენნი მიზნებისათვის მნიშვნელობა არა აქვს.

ვაკესოფელი სწვადასხვა გვარებისაგან შედგება, ამიტომ ამბობთ ერთ გვაროვნულ-ტერიტორიალურ ფრატრიაში მოვაქცევთ.




კარატიელების გვარის წარმომადგენელი სოფ. ვაკესოფელში ცოტანი არიან. დანარჩენნი გადასახლებულნი არიან ზემოთიანეთსა და ბანკისის ხეობაში. ბოკვერანი უძველესი განაყარნი არიან კარატიელებისა და გვარ-სისხლის კავშირი მათში დღესაც მტკიცედ დატული. ადგილობრივი გადმოცემით კარატიელები ყველაზე ძველი გვარია სოფ. ვაკესოფელში. მეტრელანი სამეგრელოდან არიან ვადმოსახლებულნი, ჯალაბაურნი ქისტეთიდანო.

სოფ. ელიაგზა ბოლოსოფელი უკანაფშავში. აქ სულ რამდენიმე კომლი სახლობს. მკვიდრი გვარია **ბობლიაშვილები**, წინადავითიანები. ესენი დღეს ოთხ თაობას შეადგენენ.




ამავე სოფელში ცხოვრობს ერთი სხვა გვარიც—**მამიაური**, ჩამოშავლობით ხევსური. მათი განაყოფნი ცხოვრობდნ სოფ. ჭიდალში.




სოფ. ჭიდალში ცხოვრობს ერთი სხვა გვარის კომლი, უძილანურების ფრაქციისა, და შვიდის კოჭლანის ძმთა თაობაში. სოფლები—ვაკესოფელი, ელიაგზა, ჭიდალი, ჩალახევი ბოლო სოფლებია უკანაფშავში. ამთი მთელი მოსახლეობა ერთი ხატის ყმად თვლება და სისხლის აღზევა აკრძალული აქვთ. სოფ. ახადაში

მთავარი გვარია გოდერძაულების გვარი. ადგილობრივი თქმით, ესენი არიან ერევნიდან გადმოსახლებული მაჰმადიანების ჩამომავალი. ამჟამად ცხრა ძმათა თაობად იყოფა.



ყოველ ამათგანს ჰყავს ახლო განაყარნი. ამ ფრატრიაში სხვა გვარის წარმომადგენლებიც ურევნიან, მაგრამ ესე არიან ერთმანეთში შერწყმულნი, რომ შათი გამოცალკავება საჭიროდ არ მიგვაჩნია. სოფ. ახადაში ცხოვრობს ერთი სხვა გვარიც დავითიანების მოდგმისა, ესლა ბოზღიაშვილების გვარს ატარებს. ყველა ესენი ერთი ხატის ყმებად ითვლებიან, როგორც საერთო წესია ფშავში, და სისხლის აღრევა ეკრძალებათ.

სოფ. მათურაში მთავარი გვარია თადიური, ცხრა ტოტად გაშლილი. რომელ ტოტში რამდენი თაობაა, ნამდვილად ვერ გავიგეთ. ამიტომ ყველანი ერთ გვაროვნულ ფრატრიაში მოვაქციეთ.




ამ ფრატრიაში შემავალი ზოგიერთი გვარი წარმოშობით უცხო ტომისაა.

სოფ. მათურის კარგა მოშორებით არის სოფ. ბახია. იქ ორი კომლია, ქისტაურების განაყარნი, სოფ. შუაფხოდან წამოსულნი. გვარად ელიზბარაშვილი. ბახიას ახლო, სადღაც მთის ძირში, სახლობს ერთი კომლი—გიორგი ხუციშვილი, განთქმული მოწაირე. გადმოსახლებულია სოფ. ქუთხიდან, სადაც მისი ძმა ცხოვრობს.

ასეთია უკანაფშავლების გვაროვნული სურათი. რაც შეეხება წინაფშავის გვაროვნულ წყობას, უნდა ვთქვათ, რომ მას ვერ ვეხებით, რადგანაც აქედან ბევრი გვარი უკანაფშავის გვაროვნულ ფრატრებში შედის და მათი გამოცალკეება ძნელია.

მთელი ფშავის ხეობა კი ერთ დიდ ფრატრიას წარმოადგენდა, რადგანაც ითვლებოდნენ ლაშარის ჯგერის ყმებად.



### სარწმუნოებრივი კულტი

სარწმუნოებრივ კულტს იგივე ხასიათი ჰქონდა, რაც ხევსურეთში მაგრამ მასში დღეს ბევრი წერილმანი დავიწყებულია.



საკულტო დისციპლინა ისეთი შკაცრი აღარ არის, როგორც ხევსურეთში. ფშავის ხატობაში დაკერაც შეიძლება, ცეკვაც, თამაშიც\*, ქალ-ვაჟთა გახუმრებაც. ყველაფერი ეს ხევსურეთში სასტიკად აკრძალულია. ხატობა ფშავში უკვე ქეიფის მიზეზად იქცა და თავისი ძველებური სამლოცველო მიზანი დაკარგული აქვს.

გვაროვნულ კავშირზე, ზოგადად, იგივე შეიძლება ითქვას, რაც ხევსურულზე ითქვა. უმთავრეს გამამტკიცებელ როლს აქაც თამაშობს სისხლით ნათესაობა და კულტი. სისხლით ნათესაობა გამოიხატება უმთავრესად სისხლისაღრევის აკრძალვაში, რაც ხშირად, სისხლის ნათესაობის გარდა, რელიგიური ელემენტიც უდევს.

კულტით შექმნილი კავშირი უმთავრესად, გამოიხატებოდა ხატობაში. როგორც ვიცით, მთელს ფშავს ერთი საერთო ხატი ჰყავდა — **ლაშარის ჯვარი**. გვარებსაც ჰყავთ თავთავიანთი, საგვარეულო ხატები, როგორც ხევსურეთშიაც. საგვარეულო ხატობას **სერობა** ჰქვია. გრძელდებოდა მთელი ზაფხულის გამაველობაში. ამ ხნის განმავლობაში ყველა გვარი ცალკე იხდიდა თავის დღეობას. გვარის წარმომადგენლები ყველა მხრიდან იყრიდნენ თავს. მოჰყავდათ საკლავი, აქ ქეიფობდნენ. ამტკიცებდნენ ნათესაობას. თითო გვარის სერობა თითო კვირას გრძელდებოდა. ერთი გვარი რომ გაათავებდა სერობას, მეორე დაიწყებდა, მეორეს მოსდევდა მესამე.

**ლაშარის ჯვარი** ფშავლების საერთო სალოცავად, ბატონად, მცველად, მეფედ ითვლებოდა. ლაშქრობაში მისი დროშა მიუძღოდნენ. შშვიდობიანობის დროს მისი გალავანი იყო სახალხო საქმეების გარჩევის ადგილი. აქ ყოველწლივ იმართებოდა დიდი დღეობა **ლაშარობა**. ყველა ფშაველი, შორს გადასახლებულებიც თავს იყრიან აქ. მოჰყავთ საკლავი. ხევსურებიც მოდიან. აქ იგივე ხდება. რაც სერობის დროს, მაგრამ უკვე შეერთებულად, მთელი ფშავის ხევის მონაწილეობით. **ლაშარობა**, **ანუ საკვირაო**, იცის აღდგომის მეორე-მესამე კვირას.

ლაშარისჯვარზე ასეთი გადმოცემაა დარჩენილი: იმ ადგილს, სადაც ამჟამად ლაშარისჯვარი ასვენია, უწინ რქმევია **ლაშარი** აქ იყრიდნენ თავს ძველი მეომრები, ფიცს სდებდნენ. ბოლალატეს სდევნიდნენ თებიდან... თამარ-მეფემ აქ მოიტანა ჯვარი, და ამის შემდეგ ამ ჯვარს დაერქვა ლაშარისჯვარი.

ლაშარის გორა უწინ რომ მართლაც საბჭო ადგილი ყოფილა, ამას ამტკიცებს ნაგებობათა ნაშთები.

ლაშარის გორა საკმაოდ მაღალია და ძნელად მისადგომი. მწვერვალი ოდნავ მოვაკებული აქვს. იგი მდებარეობს უკანა ფშავის თემში, სოფ. ახადის პირდაპირ ვაკეს ამშვენებს ბებერი იფნები. ერთგან ხელოვნურად გაკეთებული შოედანია, ყორით შემოვლებული. ყორის შიგნით ქვის გრძელი სკამებია. აქვეა ყორით აშენებული ორი-სამი დარბაზი. ერთ ბებერ იფნის ტოტზე დიდრგოლებიანი ჯაჭვია შემოხვეული. ერთგან ქვიტყირით ამოშენებული ორმოა. სასაკლავო ჰქვია. უწინ თურმე ამ ორმოს პირზე კლავდნენ ომში მოტაცებულ საქონელს, ორმო თუ გაივსებოდა ასეთი საქონლის სისხლითა ეს იმისი ნიშანი იქნებოდა, რომ ფშავლებს დიდად გაუმარჯვიათ ომში. მაგრამ მარტო ნადავლ საქონელს არ ჰკლავდნენ ამ ორმოს პირად. სალაშქროდ წასვლისასაც, მსხვერპლი აქ იკვლავდა. ლაშისჯვარობასაც.

ამ გორაზე წინათ ყოფილა ერთი დიდი მუხა. კენწერზე ოქროს შიბი ჰქონია გაკეთებული. მუხა იმდენად მაღალი ყოფილა, რომ მის კენწეროდან შორს მანძილზე ჩანდა მიდამო და მომავალი მტრის დანახვა შეიძლებოდა. ეს მუხა საყარაულო-საზვერაო იყო. ამიტომ მტრებს სურდათ ამ მუხის მოჭრა—მოესპოთ საზვერაო და ოქროს შიბიც ჩაეგდოთ ხელში. ყოფილა ვიღაც აფციაური, ფშავ-ხევსურეთის დაპყრობის მსურველი. მას მოუჭრია ეს მუხა, მაგრამ ძირვამოჭრელი ეს ხე არ წაქცეულა სანამ აფციაურს მის ძირში არ დაუკლავს შავი კატა. წაქცევისას ის ოქროს შიბი მოწყვეტილა და ცაში გაფრენილა გველის წივილით. —ასეთია გადმოცემა. ამაზე ლექსიც არის გამოთქმული:

ტიროდა ლაშარის ჯვარი  
ღეთის დაბადების პიროთა;  
ხმელ გორზე მდგა ზერამუხა  
მორიყული ოქროს შიბითა.  
სულხდღომა აფციაურმა  
ამაბარუნა ძირითა,  
უკულმ ჩაუდევს საყელო  
თავის ქალ-ქალის შვილისა.

ფშავ-ხევსურებმა აფციაური ჯარით უკან გააბრუნეს. მან მათი დაბეგრა ვერ შესძლო. ფშავ-ხევსურებს ძველი რწმენით ლაშარისჯვარი ყველა ვასაქოში შეშვილებია მათ.

ლაშარის ჯვარის ლურჯასა  
ფაფარი ასხავს გიშრისა.  
თავის ყმათ მიეშველება,  
ხან რო არ იყოს მისვლისა.

იფნზე შემოხვეული ჯაჭვის ამბავი ასეთია: თამარ მეფეს და-  
უმარცხებია ქისტები. იქ შეხვედრია ერთი მჭედელი ჯალაბაურა,  
განთქმული ხელოსანი. დასაკეც ხმლებს აკეთებდა თურმე. თამარს  
მოუსურვებია მისი წამოყვანა, მაგრამ მჭედელს უარი უთქვამს.  
მაშინ თამარს უბრძანებია მისთვის, ისეთი ჯაჭვი გამოსქედე, მისი-  
რგოლი ყველა კაცს მოერგებოდეს კისერზეო. ჯალაბაურმა ასეთი  
ჯაჭვი რომ მიაართვა თამარს, თამარმა უბრძანა: — ჯერ შენს კი-  
სერზე სცადეო. მჭედელმა ჩამოიცვა ჯაჭვი კისერზე. მაშინ ის შე-  
ბოქვს და წამოიყვანეს ფშავში. ჯალაბაურს უთხოვნია თამარი-  
სათვის სადმე მივარდნილ ადგილას დამასახლეო. თამარსაც აუსრუ-  
ლებია თხოვნა. სადაც ჯალაბაური დასახლდა იმ ადგილს დაერქვა მის-  
რიანთკარი, რადგანაც ჯალაბაური მისრეთიდან ყოფილა. მისი მო-  
დგმა ამჟამად მისრიაშვილებად იწერება. მისი ხელობა — მჭედ-  
ლობა — მის ჩამომავლობაში გადადის თაობიდან თაობაზე. დღე-  
საც არის იქ მჭედელი ბუთლა მისრიაშვილი. ამ სოფელში სხვა  
გვარის კაცი არ სცხოვრობს. ის ჯაჭვი შემდეგ ლაშარის ჯვარში  
აუტანიათ.

ლაშარის ჯვრის ძლიერებაზე, იმის წინამძღოლობაზე ომში  
ასეთი ლექსია:

ვინა თქვა, ენამც გახმება, მითხოს გაბეგრდა ცხვარია!  
გაიგო ლაშარის ჯვარმა, წელზე შეირტყა ხმალია,  
უბრძანა ფშავლის შვილებსა—მთლად შემომავლეთ თვალია.  
დალაღდნენ ფშავლის შვილები, ყველამ დაღესა ხმალია.  
ვინც არ გაღესა,—გადაჰკრა, ძაგის ნაცემი მწარეა.  
გაქანდა ფშავლის ლაშქარი, როგორც ნაგუბარ წყალია.  
გადავლენ ბოროლაზედა, მათზე გაბერტყეს ნამია.  
ქვახიდის ჭალას ჩაგროვდნენ, არ წყდებან წვიმის ცვარია.  
აფიცხეს პირისწამალი, თოფებს უპირეს ტაღია.  
დეერჩევიან თარესში ლამაზ-ლამაზი ყძანია,  
საგათენებოს ჩავიდეს ტერელოშია შველნია,  
დაგლიჯეს უიხის კარები — აქ შეგვიყარეს ცხვარია.  
აქედან ცხვარი გაერეკოთ, რო ვასახელოთ ფშავია.  
წამოვლენ ნასახელარნი, მოუყობიან გზანია,

თან ქისტებ გამოჰყვებიან, ნარჩენი მეომარნია.  
 აყრიან სეტყვასავითა ტყვიას, არ მიაქვს ძალია,  
 გღრს იქ-აქად გადადის ტერელოლების მკვდარიც,  
 თან ძალებს ჩააყოლებენ, ჩაკენიტეთ ქისტის ძვალა.  
 შამოდგა ლაშარისგორზე ქისტების ძროხა-ცხვარია,  
 ორმოცი ქისტის მარჯვენა, ფარ-ხმალი ნადავლარია.  
 ევ მაგ ლექსაის მოთქომი ალიანს თუშის ქალია,  
 ქებით გავლექსე ფშავლები, არ დამეხოცნენ ძმანია.  
 თავ კი ნუ მოგეწონებათ, ეს ლაშარის ჯვრისა ძალია,  
 გვერდს გიდგათ ლაშარის ჯვარი, გიქრით დავლათის ქარია,  
 ცოტა მეც გამომიგზავნეთ, ერთ-ორ შიშავი \* ცხვარია,  
 ან ორი საყურ-ბეჭედი, მიზრიალებდეს ქარია.

ლაშარის ჯვრის გმირად ითვლება შვიდი ფშაველი ვაჟკაცი-  
 ერთხელ, ოდესღაც ქისტებთან ბრძოლაში დახოცილი, ამ შვიდ  
 ვაჟკაცს ლაშარისჯვრის პიროფლიანები ეწოდება, ფშავეში არ იქნე-  
 ბა ისეთი ქორწილი, ან მიცვალებულის მოსახსენებელი ორმოცი,  
 რომ ამათი შესანდობარი არ დალიონ.

უკანაფშავეში სახელგანთქმული ხატი იყო—**დამასტეს ხატი**. იმ-  
 ყოფება მათურის ხევში, მაგრამ მთავარი დამასტე კახეთშია სოფ-  
 ჩაფართაში (ახმეტის თემი). ეს იყო **დარ-ავდრის მოურავი**. გვალ-  
 ვის დროს მას ევედრებოდნენ წვიმას, ავდრის დროს—**დარს**. უკ-  
 ლავდნენ **საკლავს**. უნთებდნენ **სანთელს**. ეს იყო ხევსურების სამე-  
 ბის ხატის მაგიერი.

ხევსურული ძენგლისდების მაგვარი რამ ფშავლებსაც ჰქონდათ  
**დანადები**. დანადები არის ერთგვარი ნაკისრი ვალდებულება ხატს-  
 შესწირონ მსხვერპლი, 1—2 წლის კურეტი\*\*\*, ლუდი, არაყი. ეს  
 არის იგივე სამლო, მხოლოდ საშვილისშვილო ვალდებულება.  
 დანადებს დაიდებენ ვაჟიშვილის ყოლის ან ავადმყოფი ვაჟიშვი-  
 ლის გადარჩენის შიზნით. ამ სამლოობას, ანუ დანადებს, იხდის  
 მთელი გვარი რიგრიგობით. მოილაპარაკებენ, თუ როდის გადისა-  
 დონ დანადები და ვინ გამოხადოს არაყი, ზოხარშოს ლუდი\*\*\*, და-  
 კლას მსხვერპლი. (დანადები შეიძლება თვით ხატმაც დაადოს).  
 იმართება სუფრა. იგონებენ იმ წინაპარს, რომელმაც თავს იღვა-  
 დანადები. ლუდი და არაყი იქვე უნდა დაილიოს მთლად. შინ წა-

\* ცხვარი 1—2 წლისა.

\*\* ახალგაზრდა დაუტოდავი ხარი (ბულა).

\*\*\* ფშავეში ლუდს ხარშავენ მხოლოდ ამაღლეს და ვიორგობას.

ლება არ შეიძლება. ხორაგს კი, რაც დარჩება, ინაწილებენ ხევსბერი, მედროშე და დასტურები.

გადმოცემით დანადები ასეთი მიზეზით დაწესებულა: სოფ. ცაბაურთიდან სოფ. შუაფხოში გათხოვილი ყოფილა ერთი ქალი. ეს ქალი გამხდარა ავად მძიმედ. მისი მამა ხევსბერი ყოფილა. შეუთვლია მამისათვის, საშველად მანდაურე ხატი გადმოახედო. მამამ აუსრულა თხოვნა. მაგრამ ხატი ხელიდან გაუსხლტა, გაფრინდა და ავადმყოფის სახლში ჩაეარდა საკვამურიდან, ცეცხლპირას დაეცა, სადაც ავადმყოფი იწუა. ქალი განიკურნა, ეს ხატი შუაფხოში დასვენეს. ამის შემდეგ ამ ოჯახს დანადები, დაევალებულა საშვილისშიღოლდ. ამ ხატმა აკრძალა ქალის გათხოვება ცაბაურთიდან შუაფხოში.

კულტის მსახურნი არიან **ხევსბერი, მედროშე და დასტურები**. ამათი მოვალეობა, ზოგადად, იგივეა, რაც ხევსურების ხუცების, შედროშეების და დასტურებისა. უწინ ხევსბერის მოვალეობა ყოფილა ხალხის წინამძღვრობა, რჩევა-დარიგების მიცემა, ხატის ქონების მოვლა-პატრონობა, მსხვერპლის დაკვლა, ბავშვთა მონათვლა. ყველაფერი ეს წარსულში იყო. ეხლა, თუ სადმეა ხევსბერი, მას მხოლოდ საკლავის ათავსება, ტყავსა და ერბო-კარაქზე უჭირავს ხარბი თვალი. დასტურების მოვალეობაა შეწირული საკლავის გატყავება, დაკემსვა (დაჭრა), მოხარშვა და მიტანა მლოცველებთან, შეშისა და წყლის ზიდვა და მისთ.

უწინდელი მედროშეების მოვალეობა ჩანს ხოშარელ ხახა გაბილოურის ლექსში:

მენატრი დაბადებასა, ხოშარის ხახაისასა,  
აისხამს იარაღებსა, ანგელოსსა ჰგავს ცისასა.  
მხარზე გაიდებს დროშასა, ლალი ლაშარისჯვრისასა.  
თერეთეგოზე გაივლის, ქვიშას არ დასძრავს შთისასა,  
თარესში წამოაყენებს ნაჩევეებს ფშავლის შვილებსა.

მედროშეების ასეთი უწინდელი მნიშვნელობა და მოვალეობა დიდი ხანია დაკარგულია.

ხევსბერს ვითომდა ხატის დაევალებით. ასახელებდა ქადაგი ხევსბერს ირჩევდნ უვადოდ, შემდეგ ეს თანამდებობა შემკვიდრებით გადადიოდა მედროშეს ირჩევდნ კენჭის ყრით, დასტურებს (რამდენიმე კაცს) ერთი წლით თვით მლოცველნი.

ქადაგი ფშავ-ხევსურეთში ღმერთის მიერ მოვლინებულ ადამიანად ითვლებოდა. ქადაგს ნიშნავდა ხატი. ქადაგი ხატის სახელით

ლაპარაკობდა, ხალხს აძლევდა ვითომც რჩევა-დარიგებას, წინასწარმეტყველობდა. ხშირად ქადაგად დაცემა ხდებოდა ქადაგის მახლობელის რამე ცოდვის მოსანანიებლად. ქადაგი ხატის დავალებით ისეთ სიტყვებს ლაპარაკობდა, რომლებითაც ცოდვილს ცოდვები ეპატიებოდა.

## გვაროვნული წყობა

ფშავლების ყოველი გვარი განცალკევებული მოვლენა იყო. ე. ი. ერთგვარად შეუვალი. თუ ნათელმძირონობა არა ჰქონდათ ისე სხვა გვარის კაცი გვარის საქმეებში არ ჩაერევოდა, თითსაც არ გაანძრევდა. გვარში კი ერთმანეთის დახმარება, ყოველმხრივი და ყოველნაირი, აუცილებლად სავალდებულო იყო. ამისათვის ყოველ გვარს თავისებური საკუთარი საიდუმლოება, ხერხი და ეშმაკობა ჰქონდა გამოუმუშავებული.

ძველ დროს, ლაშქრობა, ქვეყნის საერთო მტრის დახდომა, ყველა საგვარეულოს შეერთებული ძალით ხდებოდა. საერთო საქვეყნო საქმეებსაც ერთპიროვნულად სწყვეტდნენ. ამჟამად კი, გვაროვნული სიმტკიცე უკვე დარღვეულია.

როგორც ვთქვით, ყოველ გვარს საკუთარი ხატი ჰყავდა. ჰქონდა საკუთარი სასაფლაო, საერთო სახნავი, საბალახო. სათიბი, სახმარი ტყე. კერძო საკუთრებად მხოლოდ კარმიდამო იყო. ამ მხრივ ფშავლები განირჩევიან ხევსურებისაგან. საერთო სასაფლაოზე ყოველ ახლო მონათესავე ჯგუფს საკუთარი კუთხე აქვს. თუ ვინმე სხვაგან მოკვდება, გვარი ვალდებულია ითავოს მისი გადასვენება ფშავში და საკუთარ სასაფლაოზე დასაფლავება. გვარის სასაფლაოზე სხვა გვარის კაცი არ დასაფლავდება, თუ რაიმე განსაკუთრებული შემთხვევა არაა. ფშავშიც, როგორც ხევსურეთში, გვარს ჰყავს თავისი კითხული კაცი, მაგრამ მას იმოდენა როლი არა აქვს, რამოდენიც ხევსურეთში.

გვარი აუცილებლად მამით მომდინარეობს, მაგრამ გვარის წევრთა ურთიერთ კავშირის სიმტკიცის იდეოლოგიური სარჩული, როგორც ხევსურეთში, აქაც ისევ საერთო საგვარეულო ხატია (მაგრამ საერთო ხატი მთელ სოფელსაც ჰყავს, რამდენიმე გვარს ერთად. ესენი ამ ხატის ყმებად ითვლებიან, როგორც მთელი ფშავი ლაშარისჯვრის ყმებად).

უშვილო ადამიანი შვილად აიყვანს ძმისწულს, ბიძაშვილს, შამის მხრივ, მაგრამ დედის ჯილაგის შვილებს, ან დის ჩამომავ-

ლებს კი არ იშვილებს. ასეთი იყო ძველი წესი. ახლა ეს წესიც დარღვეულია, როგორც საერთოდ ყველაფერი ძველი.

თუ ვაჟი არა ჰყავს, ის ზედსიძედ მიიყვანს რომელიმე სხვა გვარის კარგს ვაჟს. ამით გვარი არაფერს იძენს, მაგრამ ოჯახი მაინც მთლიანად რჩება.

ფშავში დიდი ხანია აღარ არის ადგილობრივი რჯული და კუთხური სამართალი. იქ საერთო საბჭოთა სახელმწიფო კანონები მოქმედობენ.

უწინდელ დროში გვართა შორის მტრობაც ყოფილა. ამას ადასტურებს ქვემოთმოყვანილი ლექსი:

იყურეთ ფშავლის შვილებო:  
სავინა გიორგწმინდელმა  
ლუდი ადულა სვიანი,  
იწივნა ჯალაბაურნი,  
მამისშვილამდი მტრიანი.  
საგათენებოდ წამოვლენ  
სამოცდასამი ხმლიანი,  
ჯარს წინ უდგანან ტეროსნი,  
დროშას გააქვის შრიალი,  
უკან მოსდევენ ქალ-რძალნი  
ლამაზ-ლამაზი, ჰკვიანი  
ნეტავ სულ ყველა რამა ქნა-  
სულ ყველა დავლათიანი?  
ჯერ ღვინო დაალევინა,  
ღვინო სდის დედისრძიანი,  
მერმ ლუდი დაალევინა  
ლუდი აქვს შარბათიანი.  
ნუ იწყენთ ცოლეულებო,  
სიტყვა რო გითხრათ გზიანი.  
მოდით, ხატს მადლი მოსთხოვეთ,  
მიწა მაკბიჩეთ\* მტერიანი.  
გაიგეს ფშავლის შვილებმა,  
იარაღს მიაქვს შრიალი.  
მუქოში კაცი გაგზავნეს —  
მანდით ვინა ხართ ხმლიანი.  
მუქოთ სუმელჯი წამოვა

\* მოკბიჩეთ.

სუმელჯი სუროღიანი.  
ქურდოთ მიჰქონდათ ისრები,  
ლალი არწივის ფრთიანი.  
საგინათ შაატყობინეთ —  
დღე გავითენდათ მზიანი.  
სამოცში ერთი ვაუშვეს,  
ეგეც მებეგრე არიო.  
ფშავში წამოდი საგინა,  
ხარი იქაც ჰხნავს რქიანი.  
დასახლდი ჯიგრაულთასა,  
ქერი სდის, ჩარექიანი.

ხევსურების ამანათების მსგავსი ადამიანები ფშავშიც მოიპოვებიან. სხვა გვარის ფშაველი მეორე გვარის სოფელში ვერ ჩასახლდება. ეს საერთო წესია, მაგრამ თუ ასეთი რამ მოხდა, მაშინ იწყება დიდი შეხლა-შემოხლა ამ ორ გვართა შორის. ერთმანეთს უგზავნიან ამორჩეულ კაცებს იმის გადასაწყვეტად, დარჩეს ეს ჩასახლებული ამ სოფელში თუ არა. თუ გადაწყდა, რომ დარჩეს, მაშინ ის ითვლება იმ სოფლის ხატის ყმად, როგორც მთელი სოფელიც, ითვლება ამ სოფლის ძმადმეფიცულად და ამ ორ სოფელს შორის ქალის გათხოვბაც აკრძალული სდება.

ფშაველებმა იციან დაზარალებულ მეზობლის დახმარება. მეზობლები ერთმანეთში მოილაპარაკებენ, — ვინ როგორ დაეხმაროს. მიუტანენ ერთ ხელადა • სასმელს, ერთ ქადას ან ხმიაღს, ჩარექ ყველს, ერთ კელაპტარს და სხვა.

წინათ ქორწილში დიდი ძღვენით მიდიოდნენ — მიართმევდნ უღელ ხარს, შეკმაზუჯ ცხენს.

თუ მეზობელს მიცვალებული ჰყავს, მის დამარხვამდე მეზობლები დიდ საქმეს არ ისაქმებენ. ეს წესი ხევსურებშიაც არის.

## ოჯახი

ფშავურ ოჯახში მამაკაცის მოვალეობა გარეთ მუშაობა, ხვნა, თესვა, საქონლის ძოვება, ცხვარში სიარული და მისთანა. დედაკაცები ოჯახში მუშაობენ და მთელი ოჯახის საქმე მათ აწვეთ კისრად — რთვა, დღვება, ქსოვა, კერვა და სხვ. სათემო საქმეებში კი დედაკაცს ხმა არა ჰქონდა. იშვიათად, თუ ქმარი ან მოსწრებული ვაჟიშვილი არა ჰყავდა, დედაკაცს შეეძლო მონა-



წილეობა მიეღო სოფლის საქმეში. ცოლი ქმრის სიტყვას ვერ გადავიდოდა. საბჭოთა ხელისუფლების დამყარების შემდეგ, რასაკვირველია, ეს წესებიც მოისპო. დედაკაცი ეხლა სრულუფლებიანია.

ოჯახის შვილები, უფროსები — ქალებიცა და ჯაჟებიც, — მსხვილფეხა საქონელში დადიან, უმცროსები კი — ხბოში. საერთოდ კი, ოჯახის მოწესრიგებაში, წვრილმანში, ავეჯის შეძენაში, ყიდვა-გაყიდვაში, ცოლ-ქმარი თანხმობით მოქმედობს. მაგრამ უპირატესობა მაინც ქმარსა ჰქონდა.

ოჯახში უფროსი ძმის უფლება იმაში გამოიხატება, რომ ჯერ მამა ითვლება ოჯახის უფროსად და მერე უფროსი ვაჟი, უმცროსი ძმა და რძალი, მის დაუკითხავად, არას გააკეთებენ. გაყრისას უფროსი ძმა მიიღებს საუფროსოს, ერთ მეტ ცხენს, ხარს ან ოც ცხვარს. ვისაც ძირეული სახლი ერგება ნაწილად, იმან დანარჩენ ძმებს უნდა მისცეს საქცევი (სამაგიერო) — 100 — 200 მანეთი. დანარჩენ ქონებას — ეზოს, კარმიდამოს, — იყოფენ თანაბრად. მხოლოდ კი უფროს ძმას, უძრავ ქონებაში საუფროსოს მაგიერად ეძლევა რამე ნივთი — სპილენძის თულუხი\*, ქვაბი.

ქალი ქმრის გვარს ატარებს, მის საგვარეულოს ეკუთვნის და მის ინტერესებს იცავს. ხევსურეთში რომ იციან ქალის გაჩენის გლოვა. ფშავში ეს ადათი არ არის. შვილების რიცხვი შეზღუდული არ არის, მაგრამ უვაჟობა კი ძალიან აწუხებს ცოლ-ქმარს და ყოველ ზომას ხმარობენ, რომ ვაჟი ეყოლოთ. ერთ ასეთ ზომად ითვლებოდა მწევრის საფლავი (იხ. ზემოთ „ხევსურეთი“).

თვითრის დროს, ფშაველი ქალიც, როგორც ხევსურიც, ერთ კვირას ბოსელში ატარებდა, მშობიარობის დროს კი 5—7 კვირას, საქონელთან ერთად. მთელ ამ ხნის განმავლობაში მებობლე ქალი მოკლებული იყო ყოველგვარ მზრუნველობას, ალერსს. ასეთ მდგომარეობაში მყოფ ქალს ახალგაზრდები დასცინოდნენ: „უნ, ქალავ, სახუთუგოში\*\* ხარო.

ბინები — სახლები — ყველას ერთნაირი აქვს, მაგრამ ეკონომიურად, როგორც უკვე ვთქვით დიფერენციაცია დიდი იყო საბჭოთა ხელისუფლების დამყარებამდე. კოლექტივიზაციამ ეს მოსპო.

\* კოკა.

\*\* სულის შემხუთავი საბურთილი.

აი, ამ უთანასწორობის გამომხატველი ლექსი, ღარიბისა:

გადმოიარა პავლემა  
პიროფლიანმა დილითა,  
გამოაღვიძა წისქვილი  
დიდხანს ნატანჯი ძილითა,  
გააძლო ქუთხარახიჯა  
შენი დაფქვილი ფქვილითა,  
ჩაგიდგა ახალ-ღარ-კოდი,  
წყალ მოჰყავ სიბის მილითა,  
დაგადგა საკოდელაი,  
ბასრია ფოლადივითა,  
დაგაფქვევინა სიმინდი,  
ალაზნის დოლაბივითა.  
ერთ კოდ ხალ მენაც დაფქვია  
სადილობამდი დილითა  
დათირდით, ჩემო ბალღებო,  
ახლა ნულარა სტირითა,  
პური მოგვშივდა, მამაო,  
თქვენ ამბობამდი ჭირითა.  
ეს პავლეს ცოლიც მოვიდა,  
მანათობელი პირითა,  
სახინკლე წმინდა მოაქვის  
თავის საფერხე ვირითა,  
ამბობენ არაყსა სწურავს,  
სულ მუღამ შაბათ-კვირითა.  
პავლეს ქერ დასძველებია  
სიმინდ სხვას მიაქვს ჭირითა,  
ახლა კი გული ჩაგივდავ;  
იბრუნე ერთი კვირითა,  
საბუდარ გადაგილეწავ  
გადაბრუნვილხარ ძირითა,  
სიმინდი წყალში ჩაგიშვა  
ნაზიდი ცოდვა-ჭირითა.

ეს ლექსი ახასიათებს არა მარტო ფშაური ოჯახის ჭირ-ვარამს, არამედ სხარტულად აშუქებს ფშაელების ძველ ყოფა-ცხოვრებას.

რაკი ფულადი კაპიტალის ძალა ნელ-ნელა შევიდა ფშაელების ცხოვრებაში, ცხადია, მან პირველად ძველ გვაროვნულ წყო-

ბას დაუწყო ხერა და საგრძნობლად შეარყია იგი. ფშავლებში გამოერია თითო-ოროლა მდიდარი მეცხვარე, და ფშავიც ნელ-ნელა დაუკავშირდა ქალაქის ბაზარს. ფშავლები ცხვარს, ყველს, კარაქს, და მატყლს ჰყიდდნენ.

ვისაც ასზე მეტი სული ცხვარი ჰყავდა, ის მთელი ზამთარი შირაქში იყო, ცხვარს აძოვებდა. სოფელში თითქმის მარტო დედაკაცები რჩებოდნენ.

ახალდაბადებულ ვაჟს ხატის ყმადა ხდიდნენ ხოლმე, დალოცავდნენ ხატთან. ასწავლიდნენ სამეურნეო საქმეებს, გვარის ერთგულებას. ქალებს ასწავლიდნენ საოჯახო საქმეს.

ფშავურ ოჯახში შეთაური ის არის, ვინც წლოვანებით სხვებზე უფროსია. მას ერქვა მამასახლისი. დედაკაცი მხოლოდ იმ შემთხვევაში გახდებოდა ოჯახის უფროსი, თუ ოჯახში მამაკაცი არ იყო.

ოჯახის უფროსი განაგებდა ოჯახს: ანაწილებდა საოჯახო საქმეს ოჯახის წევრთა შორის. მათი ცოდნა-უნარის მიხედვით. იმ საქმის გარდა, რაც მიჩენილი ჰქონდა ოჯახის წევრს, ის სხვა საქმეში ვერ ჩაერეოდა, თუ ამაზე არ ექნებოდა მამასახლისის ნებართვა. ვერც საერთო სათემო საქმეში ჩაერეოდა. აგრეთვე, ოჯახის უფროსის ნებადაურთველად ოჯახის წევრი ვერ წავიდოდა, თუნდაც ერთი საათით. მეზობლებში — ქორწილში, საფეხნოდ, საქეიფოდ, ხატში, სამხთოში, ან რაიმე საქმეზე.

მამასახლისის სიკვდილის შემდეგ ოჯახის უფროსად ხდებოდა უფროსი ვაჟიშვილი. ეს ვაჟი მცირეწლოვანიც რომ ყოფილიყო — 14 წლისა, უფროსობა მაინც მასზე გადადიოდა. უფროს-უმცროსობა ბავშვებშიც კი იყო — უმცროსი ბავშვი უფროსს ბავშვს ემორჩილებოდა. ამასთანავე უფროსს ბავშვს ოჯახურ საქმიანობაში მეტი მონაწილეობა მოეთხოვებოდა. საოჯახო საქმეს ოჯახის წევრთა შორის თუმცა ოჯახის უფროსი ანაწილებდა, მაგრამ ოჯახის წევრს საქმიანობა მაინც შეეძლო. თავისი სურვილის მიხედვით ამოერჩია — უფროსთან შეთანხმებით. რამდენადაც მრავალწევრიანი იყო ოჯახი, იმდენად მეტი იყო საოჯახო საქმე, მეტი იყო სამეურნეო დარგები: მეცხვარეობა, მეძროხეობა, მიწისდამუშავება. თითოეულ ასეთ დარგზე ოჯახის ერთი რომელიმე ან რამდენიმე წევრი იყო მიმაგრებული. ამ საშეურნეო მრავალდარგიანობის გა-

\* იხ. „ხუთი წელი ფშავ-ხევსურეთში“, წიგ. I.

ჰო, ხშირი იყო შემთხვევა, რომ ოჯახს რამდენიმე ბინა ჰქონდა—  
ცხვარში, ძროხაში, სოფელში.

სადედაკაცო საქმე ოჯახში თავისებურად იყო განაწილებული.  
ქალები (რძლები) საერთო საოჯახო საქმეს მორიგეობით აკე-  
თებდნენ და ამაზე მუშაობდნენ მთელ დღეს. თავიანთი საკუთარი  
ოჯახის, ე. ი. ქმარ-შვილის მოვლის, საქმეს ღამით ასრულებდნენ—  
შეკერვა, გარეცხა, მოქსოვა და მისთ. ეს ხშირად ქალს მთელ  
ღამეებს ატეხინებდა. ამ საფუძველზე ხშირი იყო რძლებს შორის  
უთანხმოება. — ზოგი რძალი თავის საკუთარი ოჯახის საქმეს უფ-  
რო ეძალეობდა, ეიდრე საერთო-საოჯახოს.

ბავშვებსაც — გოგოსა თუ ბიჭს, — ჰქონდათ თავიანთი ძალ-  
ღონის შესაფერი საქმე — ზოგი ხბოს უვლიდა, ზოგი ძროხას, ზო-  
ვიც მეხრედ იყო.

ფშავში ოჯახის გაყრა დიდ სირცხვილად ითვლებოდა და  
დიდადაც ერიდებოდნენ. ამიტომ ფშაურ ოჯახს მრავალწევრიანო-  
ბა ახასიათებდა. ასეთი ოჯახი, თავისთავად ცხადია, ღონიერი იყო,  
შეძლებული.

რადგანაც ოჯახის გაყრა თითქმის შეუძლებელი იყო, ამი-  
ტომ ერთ ოჯახში, ხშირად, რამდენიმე თაობა იყო ხოლმე თავ-  
მოყრილი — ძმები, ძმისწულები, ბიძაშვილები და სხ. — გაყრილებს  
ლექსს გამოუთქვამდნენ ხოლმე, დასაციხად მაგ.,

გაიყარენით კოხალნი,  
გაჰყავით ორან ძროხანი.  
სხვა ყველა სწორად გაგერგოთ,  
მამას დაგირჩათ ჩოხანი.

უფროსი კაცების ანდერძი იყო: ნუ გაიყრებით, ნუ გაახარებთ  
მტერს, განაყოფ ქონებას ბარაქა არა აქვსო. თუ მტერი არა გყავს,  
ძმას გაეყარეო და მტერი გეყოლებათ — ფშავლებს სჯერათ, რომ  
გაყრილ ძმებში უეჭველად ჩამოვარდება მტრობა.

გაყრის მიზეზად, უმთავრესად, ოჯახურ უთანხმოებას ასახე-  
ლებდნენ ხოლმე და ბრალს რძლებსა სდებდნენ — ერთი რძალი მხო-  
ლოდ თავის სათაენო (თავის საკუთარი ქმარ-შვილის) საქმეს აკეთებ-  
სო. გაყრა მხოლოდ შინაურული მორიგეობით, გარეშე ადამიანის ჩაუ-  
რევლად უნდა მომხდარიყო. ეს დიდი სატრაბახო იყო. გაყრის საკითხს  
არც გაახმაურებდნენ ხოლმე. მხოლოდ უკიდურეს შემთხვევაში  
თითო ძმა შუაკაცად მოიწვევდა თითო უცხო ვინმეს.

გაყრისას ჯერ დედ-მამას მისცემდნენ კუთვნილს, სამარხს, ე. ი.

იმას, რაც მათ დასამარხად იქნებოდა საჭირო: ორი ძროხა, ან სახლი, ან მისი საფასური. დედ-მამას მეტი არაფერი ეძლეოდა, მაგრამ ისინი ცალკე კი არ გადიოდნენ, არამედ შეუერთდებოდნენ ერთ-ერთ შვილს. ოჯახის უფროს ვაჟს, თუ გამრჯე იყო, ეძლეოდა საუფროსო—ვერცხლის ქამარი, სახლი. ქალებს ეძლეოდათ სათაფრო—რაც მათ შეძენილი ჰქონდათ ზედმეტი მუშაობით, ან მიღებული საჩუქრად. ეს ნივთები ოჯახის ქონების საერთო სიაში არ შედიოდა. ქონება სულადობის კვალობაზე კი არ იყოფოდა, არამედ ოჯახების მიხედვით.—ტანისამოსიც არ შედიოდა გასაყოფი ქონების სიაში. გაყრაში თუ შუაკაცები მონაწილეობდნენ, მათ აძლევდნენ თითო ცხვარს ან მის საფასურს.

ფშაველი, ქალი ან ვაჟი, თავის მომავალ მეუღლეს ხატობაში დაათვალიერებდა, მაგრამ საკითხს ასეთი პრინციპით სწყვეტდნენ:

ქალი ხატში ნუ მოგეწონება—  
იქნებ სხვისად წათხოვარ აცვია.  
ქალი მაშინ მოგეწონებოდეს  
რო ნახო ყანის მკაშია.

რასაკვირველია ცდილობდნენ ქალი და ვაჟი კარგი ოჯახის შვილი, ჯანმრთელი ჩამომავლობისა აერჩიათ.

წინათ, გათხოვილი ქალი მამის ოჯახში რჩებოდა სამი წლის განმავლობაში. ამ ხნის განმავლობაში ცოლ-ქმარი ერთმანეთს ვერ დაელაპარაკებოდნენ, ვერ გაეკარებოდნენ. ეს დიდი სირცხვილი იყო. ჩუმ-ჩუმად კი ხვდებოდნენ ერთმანეთს.

ამ მოვლენას ფშაველები ასეთი რამით ხსნიდნენ: ამ სამი წლის განმავლობაში ქალს უნდა დაემზადებია თავისი მზითევი 4—5 ჯუბა (საცვალი) 3—4 ფაფანაგი (ზემოდან გადასაცმელი), 1—2 ხელი ქვეშეასაშლელი ნაბადი. მშობლები აძლევდნენ 1—2 ძროხას: მაგრამ, ამ ჩვეულების მიზეზი, რასაკვირველია, ეს არ იყო. არამედ იყო სურვილი უფრო გვიან გაეშვათ ოჯახიდან მუშახელი.

გათხოვების გამო ხშირად ასე ეხუმრებოდნენ ერთმანეთს:

ბუჩუკურის ქალთმიანო,  
თეთრ ფაფანაგ გაცვიანო.  
შუაფხოს ჩაგაბრძანებენ,  
ფარდაგებს გაგიშლიანო.  
მაგ შენებს ფაფანაგებსა  
ოროლობითა სთვლიანო.

თეთრი ფაფანაგი სირცხვილია და ამიტომ ამ ლექსში დაცინ-  
ფით არის მოხსენებული თეთრი ფაფანაგი.  
ან კიდევ:

—რა კარგი ქალა მოგეცით,  
მაგრამ მოგიკლავთ სიმშილსა.

ჩვენც ვაჭმევთ ქერის პურასა,  
არც თქვენ გაგიზრდავთ ბრინჯითა.

—რო ნახოთ ჩვენებ გოდრებრ  
ასახლომია კიბითა.

—მეც ვიცი თქვენი გოდრები,  
სავსეა ქათმის სკლინტიითა.

—ცხენებს დასწყვიტეთ წელები  
კახეთს ნახვეწის ზიდვითა.

—თასურეების პარვასა  
ხვეწა სჯობს, ჩემის ფიქრითა.

—ასეთი საქმე არ მიყვა,  
გამაგზავნიხო ციმბირსა.

—შენ ციმბირ ჯოჯობხეთია  
თავად იციან ხვთისშვილთა.

ახლად მოყვანილი პატარძალი თავის დედამთილსა და მამამ-  
თილს ერთი წლის განმავლობაში ვერ გასცემდა ხმას. დიდი მოხათ-  
რება უნდა ჰქონდეს უფროსებისა. უნდა ცდილიყო წინდაწინვე  
უთქმელად მიხვედრილიყო მამამთილ-დედამთილის სურვილს, უნ-  
და ყოფილიყო მათდამი ყურადღებიანი. ერთი წლის შემდეგ მამამ-  
თილი აღძრახდებოდა თავის რძალს კარგი საჩუქრის მირთმევით.  
რძალსაც ეძლეოდა უფლება დალაპარაკებოდა მას, დიდის მოწიწე-  
ბით, მაგრამ მის სახელს მაინც ვერ ახსენებდა. თუ აუცილებელი  
იყო მისი სახელის ხსენება, რძალი მაგ, მაზლის სახელს მიიშვე-  
ლებდა და ასე ეტყოდა მამამთილს: გამიხარდის მამაე!...

ფშაური კერა ორად იყო გაყოფილი—სამამაკაცო—შუაეცეცხ-  
ლის მარჯვნივ, აქ იდგა ხის სკამი, და სადედაკაცო—მარცხნივ. აქ  
სკამი არ იყო. კერის ზემო მხარეზე, მარჯვნივ, იდგა საუფროსო  
საჯდომი. მას მოსდევდა სკამი დანარჩენ სამაკაცოთავის. საუფრო-  
სო სკამზე სხვა ვერაფერ დაჯდებოდა, გარდა საპატიო სტუმრისა.  
ქვის კერასთან გადებული იყო ფიცარი—დასაჯომად და დასაწო-  
ლად,—წებოდნენ უფროსი და ძვირფასი სტუმრები. სამამაკაცო  
განყოფილებაში გადასვლა ქალს, მეტადრე ახალგაზრდას, სასტი-

კად ეკრძალებოდა. თვითრეწვეტილ ქალებს ქონდათ უფლება იქით გადასვლისა, მაგრამ მხოლოდ მაშინ, თუ იქ მამაკაცები არ იყვნენ. მამაკაცისათვის დიდი სირცხვილი იყო საღიაყო სკამზე დაჯდომა. რამე სილაჩრის ჩამდენ მამაკაცზე იტყვიან:—ეგ საღია-ყო კერაზე უნდა იჯდესო.

შვილს, თუნდაც სულ პატარას, მამა არამც თუ ხელს არ მოჰკიდებს არ მოუალერსებს, არამედ არც კი მიხვდავს. ეს სირცხვილია. ამ მხრივ მამის მაგივრობას ბავშვს სხვა ვინმე უწევს,— მამა, ბიძა.

მახლობელ ნათესავებად ითვლებიან: ძმა, ძმისწული, ბიძაშვილი, ბიძაშვილიშვილი, ნათლია, სიძე და შემდეგ ძმადნაფიცო. ერთმანეთის დახმარებაც ამ მიმდევრობით ხდება.

ფშავლებმა იციან ერთმანეთის დახმარება ქორწილსა და გასაჭირშიც, რომ დაზარალებულ ოჯახს ფეხზე წამოდგომა უშველონ. ქალის ქორწილში (ქალის დედმამის ოჯახში გამართული ქორწილი ქალის წაყვანამდე) ვაჟის დედამა მოართმევს ქალის მამის ოჯახს საჩუქრებს—სანაწიოს. მერე ქალის დედმამა—ვაჟის ოჯახს, შემდეგ ვაჟის ძმები, ბიძაშვილები. დაზარალებულიც დახმარება იციან საკლავით. შორეულმა ნათესავეებმა—არყით.

მეორე რიგის ნათესაობას შეადგენენ დედის მომდევრები — დეიდები, ბიძები და აგრეთვე დისწულები და სხვ.

სიძედ ირჩევდნენ არა ლამაზს, არამედ კარგ ვაჟკაცს, გამრჯეს, მხნეს. ქალსაც მოეთხოვებოდა კარგი ოჯახიშვილობა, გამრჯეობა, ხელააქმიანობა. სილამაზე მეორე ხარისხის საქმე იყო.

სისხლის აღრევა აკრძალულია, მაგრამ არა მარტო ნათესაობით ან ერთ ხატს შეფიცულობით, არამედ თვით ხატის აკრძალვითაც. გოდერძაულებსა და ქისტაურებს (უკანა ფშავლები არიან ორივენი) ურთიერთ შორის ქალის გათხოვება აკრძალული აქვთ. ამ ამბავს გადმოცემა ასე მოგვითხრობს: გოდერძაულებს (სოფ. ახადი) ჰყავთ ხატი „პირქუში“. ქისტაურებს (სოფ. შუაფხო)—იახსარი. უწინ, როცა პირქუშიც და იახსარიც „ხორციელნი“ ყოფილან, იახსარი სტუმრებია პირქუშს. პირქუში ოქრომჭედელი ყოფილა. მასპინძელს იახსარისათვის ოქროს თასით მიუროშვეია ღვინო. იახსარს უთხოვია, ეგ თასი მაჩუქეო. პირქუშს უარი უთქვამს. იახსარს ის თასი მოუპარნია. პირქუში გაჯავრებულა და დაუწყევლია თავისი საყმოს ის ოჯახი, რომელიც იახსარის საყმოში

ქალს გაათხოვებდა ამის შემდეგ აკრძალულია ამ ორ გვართა შორის ქალის გათხოვებაც, ამბობენ ფშავლები.

მდიდარი და ღარიბი ოჯახი გარეგნულად არაფრით განირჩეოდა. სიმდიდრედ ითვლებოდა—ბევრი ცხვარი (ზოგს ათასობით ჰყავდა), ცხენის ჯოგი, ძროხეული, ფული, სპილენძეული, ტყავეულობა, მარილი. ასეთი თქმაა დარჩენილი—სახლი მედვას ფანჯატური, მაგრამ ფასაკულიო (სპილენძის ნივთები, მარილის ყორე).

წაწლობა, მეტად გავრცელებული ჩვეულება, ფარული სიყვარულის გამოხატულება აწერილი გვაქვს I წიგნში. ვიტყვით მხოლოდ, რომ ეს ფარული სიყვარული ორნაირი იყო: 1) მხოლოდ ალერსი და ლამაზი ტრფობა—ნადომობა და 2) გადამეტებული—წაწლობა.

წაწალი ძევიანდა, ვენაცვალე  
განა ნადომი გულითა?  
სამ წელს წაწლისთვის ვაგროვე  
შიბისთვის\* საყიდ ფულია,  
თუვად მშიერა ვიყოდი,  
კინალამ გამძვრა სულია.  
მე მარტო ნადობს ვენაცვალე  
წაწალიმ დამწვა გულია.

უწინდელ დროში ნადობა—ქალ-ვაჟთა ერთად დაწოლა—თუნდაც ახლო ნათესავთა შორის, სირცხვილი არ იყო. შემდეგ და შემდეგ კი მან მიიღო წაწლობის ხასიათი, უფრო უხეში და უფრო უზნეო.

პურის ჭამადაც ფშავლები, ისევე როგორც ხევსურები, ჯერ მამაკაცები სხდებოდნენ. რაც მათ მორჩებოდათ იმას სკამდნენ ქალები და ბავშვები. თუ არაფერი დარჩებოდათ (ამ დანარჩომს ჯერისთავი ჰქვია), ქალები და ბავშვები ყველსა და პურსა სკამდნენ.

ფშავლებს უყვართ სტუმარი, მეტადრე უცხო კაცი. უცხო-კაცს სოფელში ყველა თავისკენ ეპატიჟება. მიაართმევენ ხინკალს. ვიდრე ხინკალი მოიხარშებოდეს, მიაართმევენ ხმიადს და არაყს. შინაურ ხშირ სტუმარს უმასპინძლდებიან ხაჭო-ერბოთი. ჩვეულებრივი საჭმელია დაშაშხული ხორცი ძროხისა ან ცხვრისა. თუ ოჯახში უცხო სტუმარია, მეზობელი დაუპატიჟებლად არ მივაიქ. ქალი სულ ვერ გაეკარება ასეთ ოჯახს.

\* საჩუქარია.



ფშაველი კაციც ხევსურსავით, ჯერ იმუშავებს და შერე სჭამს.

სადილობამდე შაჩლისთავს  
შეიდნი თივანი დაშეთიბნენ.  
დილით საქმეზე გასული  
ფშაველი წაიკაფივებს.

\*ამრიგად შორმა ფშაველებში მეტად არის დაფასებულნი.

საქმელთა შორის უნდა მოვიხსენიოთ ხალი ეს არის მოხალული ქერი, შემდეგ დაფქვილი. წყალში აურევენ და ისე სჭამენ. ზოგჯერ თაფლსაც უხამენ. ეს საქმელი, როგორც იოლი გასაკეთებელი, ხშირია მწყემსებში, საძოვრებზე.

### მიწის საკითხი

მიწა მწირია და ცოტაა ფშავეში. ყოველ ნაკვეთს ერთი წლის დათესვის შემდეგ ერთი წლით ასვენებენ.

როგორც ვთქვით, მიწა საერთო-საგვარეულო იყო. ინაწილებდნენ რამდენიმე წლით. ერთ ფართობს გვარის ერთი ნაწილი რომ ხმარობდა, მეორედ ის ფართობი გვარის მეორე ნაწილზე გადადიოდა. იშვიათი იყო მიწის გამო უთანხმოება და ჩხუბი. მაგრამ გვარებს შორის კი ასეთი დავა ხშირი იყო. გაუთავებელი დავა ჰქონდათ — გოგოლაურებსა და შუაფხოველებს, შუაფხოველებსა და უძილაურებს. უფრო ძლიერი იყო დავა ფშაველებსა და ხევსურებს შორის. ეს დავა ათეული წლობით გრძელდებოდა. განსაკუთრებით განწვევებული იყო ბრძოლა როშკიონებსა და შუაფხოველებს შორის. ეს ბრძოლა ხევსურული რჯულის ჩარევით გადაწყდა შუაფხოველების სასარგებლოდ, მაგრამ როშკიონები არ ისვენებდნენ. საბჭოთა ხელისუფლების აგრარულმა პოლიტიკამ ეს ბრძოლა მოსპო.

ფშავეში კერძო საკუთრებად ითვლებოდა მხოლოდ სახლი, კარმიდამო, წისქვილი, საქონელი, მოძრავი ქონება.

ხატის მიწებს კი გვარი კოლექტიურად ამუშავებდა და მოსავალს საერთოდ ხმარობდნენ საერთო საგვარეულო დღეობაში, ისე როგორც ხევსურეთში. ამ მოსავლის კერძოდ მოხმარება შეუძლებელი იყო.

## მკურნალობა

აქაც იგივეა რაც ხევსურეთში—შელოცვა, ბალახებით მკურნალობა. ხევსურული გამოჩენილი დასტოქრობა აქ არ იცან. ამჟამად საბჭოთა ხელისუფლების მეოხებით, ექიმბაშობა გადაჯარდა. იქ ეხლა ნამდვილი ექიმები არიან.

ფშავში, როგორც მესაქონლეობის ქვეყანაში, ძალიან იყო გავრცელებული ავადმყოფობა ბედნიერი (ციმბირის წყლული). ბედნიერის სიმპტომებს ასე აღწერენ ფშავლები: ავადმყოფს ჯერ შეაცივებს, სიცხეს მისცემს, მერე ოფლს დაასხამს. მეორე უქველი ნიშანი ბედნიერისა არის პატარა მუწუცი, რომელსაც არგვლივ ფენებად მოეწერება ჯერ წითლად, მერე ლურჯად და შემდეგ შავდაო.

ბედნიერს, რომელიც საბჭოთა ხელისუფლების მიერ მიღებული ზომებით ამჟამად უკვე მოსპობილია, უწინ მკურნალობდნენ შელოცვითა და წამლებით.

### ბედნიერის ლოცვა

სახელმწიფენიერო. შენ თქვი შენის პირითა, რა არის შენი წამალი—წითელი ბალახი, წითელი ფურის რძე, ქუმლის ფაფა, გოგრის ყოილი, შალბა, ბოსტანთი ბალახი, თეთრი აბაზი, შაქარი. ის არის ჩემი დამთავლავი, ჩემი დამშაქრავი. მოვიდოდა ქრისტეს დედა მარიამი, გაშლიდა თმასა გიშრისასა, მიაბრჯენდა ყავარჯენსა, შაჰკრავდა წამალს ყველაფრისასა შენს დასათავლავად, შენს დასაშაქრავად. მითაფლდი. მიშაქრდი.

ბედნიერის მოსარჩენად თამბაქოს ფოთოლსაც ხმარობენ. ლოცვაში მოხსენებულ ბალახ-წამლებს ხმარობდნენ მხოლოდ მაშინ, როცა წყლული აშკარად ბედნიერია. ეს წამლობა ფშავლების სიტყვით, ერთ კვირაში ჰკურნავს.

ავი თვალთ მოხიბლულის—უეცრად ავადგამხდარის—ნიშნებად თვლიან ტანში ჟრჟოლასა და ცრემლისდენას. მკურნალობდნენ შელოცვით.

### ავი თვალის ლოცვა

შაგილოცავ თვალისასა და შურისასა, ორშაბათისასა, სამშაბათისას, ოთხშაბათისას, ხუთშაბათისას, პა-

რასკვევისას და შაბათისას. გაიშალა შავი კლდე, გამოვიდა შავი კაცი ჩაუდგა შავსა გზასა, მოჰკლა შავი გველი, გადაუგდო შავსა ქალსა. შავმა ქალმა ქადას ჩასცხო, აჰმია შენს მევთვალგულეს. შენს მევთვალგულეს თვალს ნაცარი, გულს ლახვარი, ბანით მეხი; ჩაიაროს ქარივით, გაიაროს წყალივით. შენს მევთვალგულეს ჯვარიმც ნუ დაეწერება, გულიც ნუ მავსვენება. ჯვარი გეწეროს.

### შეშინებულის ლოცვა

გულო გულის ალაგასა! რა იყო, რამე შეგაშინა? უცის ჭექამა, თოფის ხმამა, საქონლის ხმამა, კაცის კრვილმა, ცეცხლმა, წყალმა, კაცის სიკვდილმა, საქონლის სიკვდილმა, ნადირის ღმუილმა? გულო გულის ალაგასა! წყალი მიდგება-მოდგება, თავის ალაგას ჩადგება, გულო მიდგება-მოდგება თავის ალაგას ჩაჯდება.

სამკურნალო ბალახი ბევრნაირია. მათ გავეცნოთ გზადაგზა, თითოეულის ცალკე აღწერისას.

ბოსტანთია—მსუყე ადგილას იცის. მიწაზე გართხმულია. წვრილი ფოთოლი აქვს. იხმარება სიცხისაგან წარმომდგარ მსივან (ხავიან) ორგანოზე. ბალახს გლეჯენ ძირ-ფესვიანად, დანაყავენ, დაასველებენ დოში და დაადებენ. თუ ჭრილობაცაა, ჭრილობას ზედ არ დაადებენ, არამედ გარშემო შემოადებენ და შეახვევენ თიკვით (ჩვრით). ტუხტი—ბარში მოდის; ერთი ადლის სიმაღლისაა, მრგვალი ფოთოლი აქვს. ყვავის ყვითლად. ამ მცენარეს დანაყავენ ქორფას, მთლად ღეროიან-ფოთოლ-ყვავილ-ძირიანად; მოხარშავენ, გასწურავენ. წვენში დაასველებენ ტალახს და დაადებენ ტანზე, სიცხიან ადგილას. წვენს ასმევენ კიდეც ავადმყოფს. სიცხის გამომწელებელია. სვინტრი—იცის კლდიან ადგილას. გრძელია, მოთეთრო ფერისა. სქელი ფოთოლი აქვს. მოტეხილის წამალია. დანაყავენ და ისე ადებენ. მოტეხილს წინასწარ მაგრად შეკრავენ ტილოთი, რამდენჯერმე შემოხვევით, მერე ამ წამალს ადებენ და ისევ შეკრავენ. ოთხ კვირაში მორჩება მოტეხილი—ანბობენ ფშავლები.

ჩაღანდრი—ფშაში\*) მოდის. წყალმცენარეა. წყალს ზემოდ არ ამოდის. წვრილი ფოთოლი აქვს. დანაყილი, თიხის ნატეხზე გა-

\* ფშა—მდინარის ნაპირას რიყეში, ჭვიშაში, მდინარის ამონაყონი წყაროა.

ფიცებულნი, დამწრალის წამალია. **შალარი**—ნესტიან, ჯონჯიან, ადგილებსა და ნასახლარებში იზრდება, მეტრზე, ცოტა მეტი სიმაღლისა; მსხვილი ძირი აქვს და მსუსხავი ფოთოლი. ფაფასავით მოხარშული, ჩირქგამომწოვი წამალია. **ღუღგულა**—მის ყვავილს, გამხმარს, სვამენ ჩაისავით, ოფლსადენად. **ძაღლისენა**—მართლაც ძაღლის ენას ჰგავს. მისი ფოთოლი სიმსივნის წამალია. გაპოხავენ რძეში ან შრატში და დაადებენ მსივან ადგილას. უცვლიან ყოველდღე. **მელისკუდა**—იცის, უფრო ხშირად, მთიან ადგილებში. მელისკუდასა ჰგავს. ხმარობენ ახალი წყლულის განსაკურნავად. ხელისგულზე გაჭყლეთავენ და ისე დაადებენ წყლულს. **ცხრაძარღვა**—მინდვრის ბალახია. მზიანი ადგილი უყვარს. მიწას არა სცილდება. ფორმით გულს წააგავს. ჭრილობის წამალია. უცვლიან ღლეში ერთხელ. **ხოხნუტა**—ჭალის მცენარეა. გრძელი ფოთოლი აქვს. ღეროიანი ბალახია. მისი ფოთოლი მოწამლულის წამალია. ან წვენს გამოსწურავენ, და დაწვეთებენ გველის ნაკბენს, ან ფოთოლსა და ღეროს დანაყავენ და ისე დაადებენ. **რძიანა**—უფრო ხშირად ნამკალში მოდის. მოთეთრო ფოთოლი აქვს. მეტად ნაზი მცენარეა. უღერ-უყვავილო. რძე უდგა ძარღვებში. ჭრილობის წამალია—პირდაპირ ადებენ. **წებოვანა**—მთის ყვავილია. ერთი ადლის ოდენაა. სამყურა ფოთოლი აქვს. ხმარობენ მის ფოთოლს, რომ ჭრილობაში ხავი (ინფექცია) არ შეიპაროს. **შავბალახა**—დანაყილი, ჭრილობის მალამოა. **ვარდუცა**—ცხვრის სასუქის ჯოყარია (ბალახი), დამწვრისა და სირსველას წამალი. **ღუცი**—მთის ბალახია, დიდი ფართო ფოთოლი აქვს. მისი ღერო ციებ-ციხელების წამლად იხმარება.

**საქმელი ბალახები.** როგორც ხევსურეთში, ფშავშიც, გარეული ხილი და ბალახია ბარის კულტურული ხილ-ბოსტნეულის შემცველი. განსაკუთრებით საყვარელია მთის ნაზი, სურნელოვანი **ჟოლი**. **კერძალი**, ანუ **კენკეშა**, მთის ბალახია. იკმევა მარტო ღერო. ტკბილია. ბრტყელი ფოთოლი აქვს. თეთრი ყვავილი. ხშირად იცის აყვავება სიბერეშიც. უწინდელ დროში ერბოს გასაწურავად ხმარობდნენ პურისფქვილის მაგივრად.

**ძიძუაი**—მთის ბალახია, კაცის სიმაღლე იზრდება. ამასაც როგორც კენკეშასაც, ხშირად პურის მაგივრად ხმარობენ. ტკბილია. **შიბო**—მთის ბალახია. მომწარო გემო აქვს. იზრდება ერთი მტკაველი, ბრტყელი ფოთოლი აქვს. სვამენ ღეროსა და ფოთოლს. მწნილადაც სდებენ. **ხიფხოლა**—ტკბილი გემო აქვს, ფოთლები დაქუწული. თეთრად ყვავის. სიმაღლით ერთი მეტრისაა. სვამენ ღეროიან-ფოთლიანად, მწნილადაც სდებენ. ქორფას სვამენ რძესა

და დოში. შუბჯა—მთაშიაც იცის და ბარშიც. სჭამენ მარტო ღეროს. დიყი—ფართო ფოთლიანი და ღრუიანი ღერო აქვს, ლუგუმი გემო. ჩადუნა—ბარის ბალახია. რძეში მოხარშულსა სჭამენ. არძეკელი—ტყის მცენარეა. მრგვალი ფოთოლი აქვს. ერთი მეტრი იზრდება. ტკბილი გემოსია. გაზაფხულზე მოდის. აკეთებენ მხალს რძით და ერბოთი. დუცი—მთაში მოდის. ფართო ფოთოლი აქვს. მარტო ღეროს სჭამენ, გაფცქენილსა (ნახ. ზემოთ) ნაცარქათამა—მხალია. ჩიტისფალა—წითელი მარცვალი. გემო ბროწეულისა აქვს. ხოდუა—ხიფხოლასა ჰგავს. ხოხნუტა—მხოლოდ ღეროსა და ძირსა სჭამენ. (ნახ. ზემოთ). თიკნისყურა, თეთრმხალა, კრავისყურა—მხალია სამივე. ვაცისწვერა—მთაში იცის, ქინძსა ჰგავს. რძიანი ბალახია, ტკბილი. ნიჩიკა—ხიფხოლასა ჰგავს. ძირს სჭამენ ნედლად, ყვავილს კი გამხმარს. ტკბილია. ყაჭიორა—მიწაზე გართხმული ბალახია. ქინძისმაგვარი ფოთოლი აქვს. ნედლად იჭმევა.

უწინ წამლათ იხმარებოდა ანწლიც. ანწლი ხევსურეთშიაც იხმარებო (იხ.). ფშავში, უწინ ანწლით ჰკურნალობდნენ, როგორც ეტყობა, სიცხიან, გაცივებულ ავადმყოფებს. ამოთხრიდნენ ორმოს. შიგ ჩადიოდა ავადმყოფი. მას ზემოდან აყრიდნენ მოხარშულ ცხელ-ცხელ ანწლს და ხურავდენ ფარდაგს. რამდენიმე ხანს რჩებოდა ავადმყოფი. ალბათ, ამას ის მნიშვნელობა ჰქონდა, რომ იწვევდა გაძლიერებულ ოფლისდენას.

## ზოგიერთი ალათი

საწაღმართო და სადილე. ფშავური ქორწილი თავდება ორი-სამი დღის ქეიფის შემდეგ, მესამე დღეს. ამ დღეს უკანასკნელად ჰკლავენ საკლავს. ჰკლავს ხევისბერი, ანთებს სანთლებს და ლოცავს ნეფე-დედოფალს. შემდეგ დაილოცებიან ეჯიბი და დედოფლის ძმა. ამ ბოლო დალოცვას ჰქვია საწაღმართო. ამის შემდეგ, ეჯიბი ხანჯალს დაიჭერს ხელში, მიუახლოვდება ნეფე-დედოფალს და ხანჯლის წვერებით აუწევს გვირგვინის ტოტებს\*, შემდეგ მოხდის გვირგვინს და თავზე შემოავლებს.... ამით თავდება მათი ნეფე-დედოფლობა, ნეფე აღარ არის ნეფე. ამიტომ ქალის მაყრები ცდილობენ სცემონ მას. ნეფე ცდილობს გაექცეს მათ და შინ შე-

\* აღმოსავლეთ საქართველოში საქორწილო გვირგვინს გვერდებზე, საფე-თქლებთან, ჩამოკიდებული აქვს ტოტები. ნეფე-დედოფალი გვირგვინს არ მოიხდის ქორწილის გათავებამდე.

უსწროს (ცერემონია ეზოში ხდება), ან საჩქაროდ მიაწოდოს წინ-  
წანაქარი\*\* არაყი, რომ ამით დაიხსნას თავი. თუ ნეფემ შეასწრო-  
შინ—ციხეს შეაფარა თავი—გაბარჩა. ამის შემდეგ ხდება ქალის  
მოყვრების გაცილება. მართმევენ ტაგანით (ჭურჭელია) არაყს ან  
ლუდს, ვაჟის მოყვრებიც მონაწილეობენ ამ სასმელის სმაში. ისეც  
ილოცება ხევისბერი. ამდროს ქალის მოყვრები ათვალეირებენ სო-  
ფელში ვინმე ახალგაზრდა, გაუთხოვარ ქალს. წასვლისას მას მოი-  
ტაცებენ და წაიყვანენ. ამ ქალს საღილე ჰქვია. ქორწილის მასპინ-  
ძელი ერთი ხელადა არაყით დაედევნება და გამოისყიდის ქალს.

**საღილე** სამაგიეროა იმისი, რომ ქალის მაყრიონის ქალს ნეფემ  
ღილი გაუხსნა, ანუ საბადლოა ამ ქალისა (პატარძლისა), რომელიც  
ნეფემ წამოიყვანა. მისი სოფლიდან.

ამ სახუმრო და ერთი შეხედვით გაუგებარ ჩვეულებაში ნათ-  
ლად ჩანს იმ ეპოქის ნაშთი, როცა ქორწინების ფორმა ქალის მრ-  
ტაცება იყო.

**კაფიობა.** ფშავლები, უსათუოდ, ნიჭიერი პოეტები არიან. მათ,  
ქალსაც და კაცსაც, ძალიან ეხერხებათ ლექსის თქმა. ამ ნიჭს ფშა-  
ვლები ამჟღავნებენ კაფიობით. ეს არის ორი ფშავლის ერთმანეთში  
გალექსება. ერთი სოფლის ვინმე მცხოვრები მეორე სოფლის მცხოვ-  
რებს გამოუთქვამს ლექსს და შეუთვლის. ლექსში იტყვის იმ კაცის  
ყოველდღიური ცხოვრების ან თვით მისი პიროვნების ავს ან კარგს,  
დაცინვით ან ქებით. მოდის შესაფერძასუხიანი ლექსი გალექსილი-  
საგან. ასეთი პაექრობა, ზოგჯერ წლობით გრძელდება და წერილე-  
ბით ხდება. ასეთ ლექსს ქვია დანაბარები. მაგრამ მარტო ამით  
არ ამოიწურება კაფიობა. ქორწილში, ლხინში, ხატობაში, მუმბო-  
ბაში, ყველგან ისმის გაჯიბრებული მოშიაობა. ხუთი წლის გან-  
მავლობაში ხშირად დავსწრებივარ ფშაურ ქორწილს და მოწმე-  
ვარ ამისთანა შაირებისა ნეფისა და დედოფლის მაყრიონს შორის.  
შეჯიბრება ზოგჯერ ისე გამწვავებულა, რომ ჩხუბად გადაქცეუ-  
ლა. ცხადია, ერთ-ერთი მოშიაირე დამარცხდება, მაგრამ მას მაშინ-  
ვე წამრეშველება ამხანაგი და დაეჯიბრება მოპირდაპირეს. ძნე-  
ლია სხაპასხუპით ნათქვამი ლექსების ჩაწერვა, თორემ ბევრი საინ-  
ტერესო მასალის შეგროვება შეიძლებოდა.

აი, ნიმუშები:

**გაგოლაური შეფე:** ზე და ხევსურ ჩამოვსხედით

\*\* არაყი რომელიც გამოხდის დროს პირველად გადმოვა ქვაბიდან. წინწანა-  
ქარი — საწნახელიდან პირველად გადმოსულ ყურძნის კბილსაცა ჰქვია.

ვიუბენით ბებრულადა.

თხუთმეტ თხაში ხუბი მივეც,  
კიდევ რაბა მემდურავსა,  
მე გულიც მეთანაღრება,  
ბევრიც მივეც ჩემ გულადა.

**უძილაური ხევსურა:** ულექსებივარ შეთესა  
გამიხდა ხახასავითა,  
ეგ ჩემი ვაცის ტყავები  
უხდება ჩოხასავითა,  
ზედ არტყავ ვერცხლის ქამარი,  
თვალ უტემს დროშასავითა.  
ის კი არ იცის ბეჩავმა,  
რა ავნებს ცოდვასავითა.  
სასახლე გაუმართავის,  
ქალაქის სკოლასავითა.  
რა დააშავენს ვაჟკაცსა  
ქვა-მიწის ბრძოლასავითა.


**პოვნიელა.** იმისათვის, რომ<sup>1</sup> გაიგონ, თუ ვინ იქნება საბედო, გასათხოვარი ქალი ან დასანიშნი ვაჟი, ასრულებენ პოვნიელას. დიდმარხვის ორშაბათს (დიდმარხვა იწყება ორშაბათით), არაფერსა სჭამენ. გამოაცხოზენ ძლაზე კვერს (სამი კოვზის პირი მარილი, იმდენსავე ფქვილში). კვერი უნდა გამოაცხოზოს ვინმე სიყმის შვილმა. ძილის წინ, მწყურვალნი შესჭამენ ამ კვერს. ამის შემდეგ, ვინც სიზმარში წყალს დააღვინებებს ის იქნება მომავალი საბედო, ე. ი. ცოლი ან ქმარი. სიზმარში თუ ხელი ჰკრეს ერთმანეთს, ეს იმას ნიშნავს, რომ, ნამდვილად საყვარელიც რომ იყვნენ ერთმანეთისანი, მაინც ვერ შეუღლდებიან\*).

**მთვარის დაჭერა.** იმავე მიზნით, მომავალი საბედოს სიზმარში ნახვის მიზნით, იციან აგრეთვე მთვარის დაჭერა. ვაჟი ან ქალი, ახალმთვარის პირველ დანახვაზე დააშტერდება მას, თვალს გააყოლებს და ისე შემოტრიალდება, რომ თვალს არ მოაშორებს, მერე მიწიდან აიღებს რამეს, რაც მოხვდება. ასე მოიქცევა სამჯერ. მიწიდან ალებულს შეახვევს თიკვში და თავქვეშ დაიდებს. ვისაც სიზმარში ნახავს ის იქნება მისი საბედო.

\* ასეთი რამ საქართველოში სხვაგანაც იციან. აღმოსავლეთ საქართველოში და თბილესში ამას „წუმი“ ჰქვია, სონხური სიტყვაა.

ჩვენ ვთქვით და კბღევ ვიმეორებთ, რაც აქ გვაქვს აწერილი, ის არის ძველი; უკვე წასული და ნაწილობრივად ეხლაც მიმავალი წარსული ფშავისა და ხევსურეთისა, რაც ჩვენ ვნახეთ. დღევანდელი ფშავ-ხევსურეთი უკვე გამოცვლილია—სოციალისტურმა წყობილებამ, კოლექტივიზაციამ, უკვე დაარღვია პრიმიტიული, ჩამორჩენილი ცხოვრება და ახალ, კეთილდღეობის გზაზე დააყენა ჩვენი ქვეყნის ეს წინად მიყრუებული ყუთხე.





სოფ. ახიელი (არხოტის თემში) სადაც, ხალხის ვადმოცემით, დაიბადა  
და აღიზარდა ხოჯაის მინდია.

## ხეხსურელი ფოლკლორი

ხოგაის მინდია \*

ამ თქმულებაზე აქვს აგებული დიდ პოეტს ვაჟა-ფშაველას თავისი ერთი საუკეთესო პოემათაგანი, — „გველის მჭამელი“. ჩვენ მიერ აქ მოთხრობილი თქმულება აღმოვაჩინეთ ხევსურეთში. დიდ ლიტერატურულ ინტერესს წარმოადგენს ვაჟას პოემისა და ხალხური ვარიანტის შედარება.

არხვატში არხვატინებო,  
მინდი სადა გყავთ ხმლიანო,  
ომის კარგ-მაგრა მჭერელი,  
თემს თავმდაბალი, ჭკვიანი,  
სამტროდ და სამაკეთოდ  
ყველასად იმედიანი,

\*) ეს თქმულება ჩვენ დავამუშავეთ და გადავაკეთეთ იმდენად, რომ ფოლკლორის კანონ-ზომიერებას არ გაცვილებოდა. მასში ხალხურია — გუგულების ამბავი. ლექსები, მინდიას ტყეობა ნადირთ მწყემსთან, მისი დაავადება ტილით, თეთრი გველის ჭამა, განკურნება, მისნად გადაქცევა, ქისტეთს წასვლა საომრად, ძმობილ აღლისძვის ბინაზე მისვლის მაგივრად მტრის სახლში მისვლა, ციხეში მომწყვდევა და სიკვდილი. მაგრამ, იმ მიზნით, რომ მინდიას სიბრძნე უფრო ძლიერად გამოგვეხატა, ჩვენ ამ ხალხურ თქმულებას დაუმატეთ — მასკილიას სიკვდილის, ჭიანჭველების, თეთრი თიკნის, ფუტკრების, ბებერასი, ვერხვის მოჭრის, შურთხ-ჯიხვების ამბები და ხადიშასთან შეხვედრის ამბავი.

დასასრულ, არ შეგვიძლია არ აღვნიშნოთ ერთი გარემოება. „ხოგაის მინდიას“ ხელნაწერი ჩვენ მეგობრულად, წასაკითხად ვათხოვეთ მწერალ კონსტანტინე გამსახურდიას. მან ეს ხელნაწერი მთლიანად დასწერა თითონ, თავისი ენით და გამოაქვეყნა თავისი სახელით, ჟურ. „მნათობში“. მართალია ჟურნალში მან ამ ლეგენდას გაუკეთა სხოლიო და თქვა, რომ წერის დროს ხელთ ჰქონდა ჩვენი ნაშრომი, მაგრამ არ მოიხსენა, თუ რამდენად ისარგებლა ამითი. ნამდვილად კი მას აღებული აქვს მთელი ჩვენი მასალა. ამას გარდა ის სხოლიო, რომელიც ჟურნალში გაუკეთა ლეგენდას, არ გაიმეორა ცალკე წიგნად გამოსულ კრებულში, სადაც ხოგაის მინდიას ლეგენდაც გადაბეჭდა „მნათობიდან“.

თემსოფლის დამრიგებელი,  
პირტკბილი, სიტყვაგზიანი.  
სიბრძნისად ცოდნით ნათქვამი,  
გულდინჯი, ფოლადიანი  
ალარ გიგვლევსა სწორფერი,  
ან ქალი ზალი თმიანი.

ერთ დღეს, როცა დარავდრის ხატი ცუდ ტაროსს ებრძოდა და ცაზე ცისარტყელა გამოჩნდა, დაიბადა ხოგაის მინდია. მას ორი წინა კიჭი დაჰყვა. რომ გაიზარდა, ისეთი მხარბეჭი ჰქონდა, რომ ჭიმლის კლდეს ეჯიბრებოდა. მინდია მალე გაიზარდა და სახელოვანი მონადირე ვაჟკაცი დადგა. იგი დაუძმობილდა ერთ ნადირთა მწყემსს, ეშმაკის მოციქულს. მაგრამ მინდიას ერთი ჭირი სჭირდა: კბენარი ეხვია იმდენი, რომ სიარული უძიმდა.

ერთხელ მზემ მოიწყინა, მინდია სანადიროდ წავიდა. თან თავისი დისწული საღირა წაიყვანა. შეხვდათ ჯიხვების ჯოგი. მინდიამ თითონ არ ესროლა, საღირას ასროლინა. საღირამ მოარტყა და ერთი ჯიხვი მოჰკლა. დაღამდა კიდევ. ბიძა-დისწული ერთ გამოქვაბულში შევიდა ღამის გასათევად; ერთმანეთის გვერდი-გვერდ დაწვნენ და დაიძინეს.

შუალამისას უცბად ატყდა ქექა-ქუხილი, ელვა ღურბლებს სჭრიდა. ქარიშხალი გრიალებდა. საღირას გამოეღვიძა და ბიძას გადახედა. შეამჩნია მინდია რალაც საშინელ სიზმარში უნდა ყოფილიყო, ძილში კრთოდა. საღირამ გააღვიძა ბიძა და ჰკითხა, რა გემართებო. მინდიამ არა უპასუხა რა, დაჯდა და თავჩალუნული რალაცას ფიქრობდა. არ გაუმხილა დისწულს თავისი სიზმარი. სიზმარში მინდიამ ნახა თავისი ძმობილი, ნადირთ მწყემსი, ეშმაკის მოციქული, ნადირთ მწყემსს სურდა მკბენარისაგან გაენთავისუფლებია მინდია, ამიტომ უთხრა: „კბენარს მოგაშორებ, თუ საიდუმლოდ შეინახავ, რაც გადაგხდებო. მინდიამ შეჰფიცა. ერთ ადგილს წაგიყვან, საზღვარგარეთ\*). მინდიამ უპასუხა: სადაც მეტყვი, ყველგან წამოგყვები, რასაც მეტყვი ყველაფერს ავასრულებო. ეს ნახა სიზმრად მინდიამ და ამაზე იყო დაფიქრებული. საღირას არაფერი უთხრა, რადგანაც ნადირთ მწყემსს სიტყვა მისცა, ყველაფერი საიდუმლოდ შეენახნა.

\* საზღვარგარეთ — ზევსურეთს იქით.

რომ გათენდა, ნადირთ მწყემსმა მინდიასა და მის დისწულს თითო ჯიხვი მოაკვლევინა—ერთი სალდგომო, ე. ი. თავისი სამწყოსი და მეორე არგოხული, ე. ი. სხვა ნადირთ მწყემსის სამწყოსი. ამის შემდეგ ნადირთ მწყემსმა მინდია გააპარა, საზღვარგარეთ გაიყვანა და გუგულების სოფელში მიიყვანა. სწორედ ამ დროს გუგულები საზღვარგარეთიდან დაბრუნებას აპირებდნენ. გუგულები მზადებაში რომ იყვნენ, მათ სხვა ფრინველთ ჯარი დაესხა და გუგულები დიდ საფრთხეში ჩაცვივდნენ. მინდია ჯობით დარჩა თავდამსხმელთ, დახოცა ისინი და გუგულები გადაარჩინა. გუგულებს გაუხარდათ და თანაც გაუკვირდათ. თქვეს: ეს რა აღამიანია, რა კაცია, რომ ასეთ განსაცდელს გადაგვარჩინაო, და კითხეს ნადირთ მწყემსს, ეშმაკის სხეულს, მაგ კაცს რა ვასიამოვნოთო. მან უპასუხა: მაგას კბენარი ახვევია და ის მოაშორეთ, თორემ სიარული უმძიძსო. გუგულებმა უპასუხეს: მაგის წამალი ვიცით, ისე ვავხდით, სულ ჩვენსავით ფრინავდესო.

ეს რომ გაიგო მინდიამ, სიხარულით ცასა სწვდებოდა.

გუგულებმა კი უთხრეს ნადირთ მწყემსს: ჰკითხე მაგ კაცს, რა საჭმელსაც ჩვენა ვჭამთ საზღვარგარეთ გაფრენის წინ, იმ საჭმელს თუ სჭამსო. ნადირთა მწყემსმა ჰკითხა მინდიას და მინდიამ ასე უპასუხა: მე შენ გენდობი, რასაც შენ მეტყვი მეც იმას ავასრულებო.

გუგულებმა მოხარშეს თეთრი გველი, თითონაცა ჭამეს და მინდიასაც აჭამეს. მინდია ცუდად გახდა, გულს ეყრებოდა, კნენსოდა. გუგულებმა ლოგინი დაუგეს და დააწვინეს, მაგრამ მინდიამ ვერ მოისვენა. დაუგეს მეორე ლოგინი, მაინც ვერ მოისვენა. დაუგეს მესამე. მაშინ კი დაეძინა.

დილით რომ გამოეღვიძა, ნახა ორივე ილიაში ცხერის ფაშვის ოდენა რაღაც ეკილა ტომრებივით. ამან მინდია შეაშინა, მაგრამ გუგულებმა ის ტომრები გასჭრეს და იქიდან იმდენი ტოლი გადმოცვივდა, რომ სამი ფუთი გამოვიდოდა. ამის შემდეგ მინდია ისე დამჩატდა, ლამის გაფრინდეს. მთლად გაჭაბუკდა, გონება გაუახლდა. ისეთი სიარული დაიწყო, რომ ბალახსაც კი არ არხევდა.

ნადირთ მწყემსმა ჰკითხა: მინდიავე, ახლა როგორა ხარო?

მინდიამ უპასუხა: ჩემი საქმე ახლა ისეა, რომ თუ აქამდის აი იმ მთაზე უსვენებლივ ვერ ავიდოდი, ეხლა ცხრა მთას გადავირბენ, ჯიხვს ფეხდაფეხ დავეწევი; აქამდის ქისტის მოკვლისა მეშინოდა, ვფიქრობდი დამეწევიან და მეც მომკლავენ მეთქი. ეხლა კი

ქისტის სოფელში კაცი რომ მოვკლა, ისე გამოვიქცევი: ქორიც ვე მომეწევაო.

ამის შემდეგ მინდია შინ წავიდა, დიდი ხნის მიტოვებულ ოჯახს დაუბრუნდა. ოჯახი კი სწუხდა მინდიას დაკარგვას, თუმცა იმედი ჰქონდა დაბრუნდება და ნანადირევს ბევრს მოიტანსო. საღ იყავიო, რომ ჰკითხეს, არაფერი უპასუხა. მინდია გრძნობდა, რომ მას რაღაც დაემართა, მთლად გამოიცვალა, ფიქრი შეუყვარდა, ყველანი და ყველაფერი შეუყვარდა.

დედამ ახლადმოსულ შვილს ხორცი შესთავაზა. მინდიას გული არ მიუვიდა ხორცზე, არ მიეკარა. არ მინდაო, უთხრა დედას. მაშინ დედამ რძე მიაწოდა, თან უთხრა:

— რაი მაგდის მინდია, გონს მოდო, გონს.

მინდიამ დედას რძე ჩამოართვა და ასე უთხრა:

— ემას კი შავხვრებ დედავ, კი. იმაად, რომ ემაში ცოცხლის სისხლი არ ურევავ.

დედას, სამძიმარს, ძალიან გაუკვირდა შვილის ნათქვამი.

როცა დაღამდა და ყველა დასაძინებლად წავიდა — ძმები უთურგა და ბერდია ქერხოში ავიდნენ. ცოლი აშექალა საკვამში მიწვა ცეცხლაპირად. სამძიმარამ კარაქის დღვება დაიწყო. მინდია ცეცხლთან იჯდა და ფიქრობდა. დედა წამდაუწუმ ეკითხებოდა შვილს: მინდია, რა მოგდის, რამ დაგაღონაო.

ერთბაშად, ბაგაში ძროხამ დაიბლავლა. ყველანი მისცივიდნენ და ნახეს, რომ ძროხა ზასკვლია კვდებოდა. მინდიას ძმამ ბერდიამ ხანჯალი იძრო ძროხის დასაკლავად. მინდიამ ხანჯალი წაართვი და დაიყვირა:

— ცოცხალის დახკვლა არ იქნების, ცოდოი ას, ცოდოი.

მაშ მკვდარს ვინ ხკლავსო. — გაუკვირდა ბერდიას. ეს უეცრივია, ყველა სულდგმული თავისით უნდა მაკვდეს. ჩვენ ნება არა გვაქვს სიცოცხლე მოვუსპოთ ცოცხალსაო — უპასუხა მინდიამ.

— შენ, მინდია, როს გახე ასე ბრძენ, როს? — დაუყვირა ბერდიამ. ძროხა მოკვდა.

ოჯახს არ მოსწონდა მინდიას საქციელი. დედა სულ იმას ეკითხებოდა, რა მოგდისო, ძმები კი — როდის გახდი ეგრეთი ბრძენიო. ცოლი სთხოვდა ნანადირევსა და შეშას.

ერთხელ მინდიამ თოფი აიღო და სანადიროდ წავიდა, უნდოდა ცოლის საყვედურიდან ამოსულიყო.

ერთ კლდეზე ჯიხვი შეხვდა. მინდიამ ჯიხვს თოფი დაუმიზნა.

ჯიხვი ახლოს იყო, მაგრამ არ გაიქცა. მინდია, ხედავდა ჯიხვის გულისცემას. მინდიამ თოფი ძირს დაუშვა. ეს ღინჯი ნადირი ვის რას უშლის, რათ მოვკლავო. ავიდა მწვერვალზე და იქ ერთ კლდეზე ჩამოჯდა. მის წინ შურთხი დაჯდა. მინდიამ იმასაც დაუმიზნა თოფი, მაგრამ არც ის მოკლა. კენჭი ესროლა და გააფრთხო. შერე დაიწყო იმის ფიქრი, თუ რამდენი ქისტი ჰყავდა მოკლული.

ჯარის ბელადი, იმედი,  
როგორაც რკინის კარია,  
წინ მინდი მიუძღვებოდა  
საც გავიდოდა ჯარია,  
ლილღოს, მითხოს და ტერელოს\*  
ბევრგან გახურნა ცანია,  
ბევრჯერ იღება სისხლითა  
მინდის ფოლადი ხმალია.  
ბევრს მტერს ახვია თავზედა.  
შაქარმა ცეცხლის ალია,  
ხევსურეთ მასულ მესალეს  
ბევრჯერ შასდვა ზარია.  
გადადიოდა, ღვედრავდა  
ხოვაის მინდი ვარია  
მუდამ თან ჰქონდა წამლები  
ყვაველთა ნაჩუქარია.

შინისაკენ დაბრუნდა მინდია, იფიქრა შინ ხელცარიელი როგორ მივიდევო, და ერთი ლამაზი ვერხვის მოჭრა მოისურვა. ცულღო რომ დაჰკრა, ხეს ქრილობიდან ცრემლები გადმოუვიდა. ხე შეეხვეწა მინდიას, ნუ მჭრი, მეც სიცოცხლე მწადაიაო.

მინდია მიხვდა, რომ ყოველი მცენარე, ყოველი ცხოველი, ცოცხალი არსებაა, რომ ყველას სურს სიცოცხლე. გული აუტრემლდა მინდიას. ხეს ქრილობაზე გრილი მიწა დაადო, თავისი პატივებით შეუხვია, თოფი და ცული გადაყარა და შინ წავიდა.

ძმები დაცინვით დაზვდნენ. ე, აგერ, აი, მავიდ ბრძენ კაც, მავიდ. სად იყავ, მინდიავე, თოფი, ცულ სად წაილი, რამდენ ჯიხვ მახკალ. რა მაილი შინ?

მინდიამ ძმებს ხმა არ გასცა. დედამ ჰკითხა, პური არა გშიაო. მინდიამ უპასუხა — ზისცვარი\* მამილი, დედავ, ზისცვარი! დედამ

\* სოფლებია ქისტეთში

\* რძე.

რძე მიუტანა. დედას აწუხებდა მინდიას საქციელი. მთელს არხო-  
ტის თემში ხმა გავარდნილიყო მინდიაზე, მინდია ხალხის პირში  
იყო ჩავარდნილი. ყველგან იმას ამბობდნენ, მინდია მთლად გა-  
მოიცვალა, რაღაც დასჩემდა, მას ზაცილ ეშმაკი დასდევს და მინ-  
დია მიგრით გახდაო. ზოგი კი მინდიას ბრძენ კაცად სახავდა.

მინდიას ასის ხეობისაკენ უყვარდა სიარული, რადგანაც წი-  
ნათ, როცა ქისტებს ესმოდა თავს, ხშირად უხდებოდა ამ ხეო-  
ბაზე გავლა.

ერთხელ ამ ხეობაში სიარულის დროს, მინდიას შეხვდა ქისტი-  
ქალი — ხადიშათი. ხადიშათი მინდიას ძმათნაფიცი ქისტის აღდის-  
ძის და იყო და მინდიას უყვარდა. ერთხანს ისაუბრეს და მერე  
გაშორდნენ ერთმანეთს.

მინდიამ ერთხელ ყვავილების მოკრეფა მოისურვა, რომელსაც  
კი ხელი წაატანა, ყველამ უთხრა: ნუ მომწყვეტ მინდიავე. მე გუ-  
ლის ტკივილის წამალი ვარ, მე ღვიძლის სწეულებისა, მე უსი-  
ნათლობისა, მე დაჭრილისა, მე მოტეხილს ვარჩენო და სხ. მინდიამ  
იცოდა მცენარეების და ცხოველების ენა. მინდიამ, ამრიგად,  
მკურნალობაც ისწავლა, და ყოველივე ცოცხალს იცავდა და იფა-  
რავდა ყოველი ბოროტის ხელისაგან. პირაქეთ ხევსურეთში მინ-  
დიამ ჭიანჭველების სოფელი ნახა. დიდ მინდორზე ჭიანჭველებს  
მრავლად ჰქონდათ გამართული თავიანთი ბუდეები. ამ ადგილს  
გავლა აკრძალა მინდიამ, არც კაცს, არც საქონელს აქ არ გააჭაჭა-  
ნებდა ხოლმე. ერთხელ მედლოეებმა ჭიანჭველების რამდენიმე ბუ-  
დე დაანგრიეს. მინდიამ ეს დაინახა, ცხენები წაართვა და ცარი-  
ელნი გაისტუმრა შინ.

ბრძენი კაცის სახელი გაუვარდა მინდიას. ყველასი მრჩეველი  
და დამრიგებელი იყო. ყველა იმას ეკითხებოდა ჭკუასა და დარი-  
გებას, ყველა იმასთან მიდიოდა თავისი გაჭირვებითა თუ დალხი-  
ნებით.

ვინაღ დაუწყას ბალახთა  
საამო საუბარია,  
ვისაღ დავედრებს მამკასა  
ყანაი მასამკალია.  
სუყველა ესალმებოდა  
ბალახ-ტყენი და კლდენია,  
სიმავრეებში ნადირი  
მადლობის იყო მოქმელია,

ერთად იძახდა სულყველა  
იყვას მინდია მთელია,  
გახარებულებს მწიფლებსა  
ცას მიუბჯენავ წვერია.  
ნადირისა და ხეტყისა  
იყვა ერთგული მცველია,  
საც გაჭირვებას იძახდეს  
წინ აბჯრის გადამცმელია  
ვინალ გყავთ დაჭრილებისად  
აქიმი მინდის ცალია  
ან ვინალ იცის წამლები  
ბალახი უებარია,  
ვინ აძლევს დარიგებასა,  
როსაც დაჯდება ჯარია,  
ტყვიისად დაენანება  
ედგას ცულისა ძალია.

ვერც ერთი ხევსური მას წინააღმდეგობას ვერ უწევდა, რად-  
ვანაც ყველამ იცოდა მისი სიბრძნე და დიდი ძალღონე.

ხანმატის ხატობაში, მარიაშობას, მინდიამ დაინახა, რომ მთვრა-  
ლები ერთმანეთს დაერივნენ ხმლითა და შუბით და ერთმანეთს  
ხოცვა დაუწყეს. ქალების მანდილმაც ვერ გააშველა მოჩხუბრები.  
მინდია ჩაერია მოჩხუბრებში, ყველა გაჰფანტა და დაამშვიდა. აქ  
მინდიამ ნახა მრავალი საკლავი დაეხოცნათ და ხუტები და დასტუ-  
რები და ხალხიც ხორცითა ძღებოდა. მინდია გაწყრა, მაგრამ ხა-  
ტის პატივით არაფერი თქვა, მხოლოდ ერთი თიკანი მოიპარა, და-  
საკლავად გამზადებული, ჩუმად წაიყვანა იქიდან შორს და ველ-  
კეთილის მინდორზე ფარას გაურია, თითონ კი შინისაკენ წავიდა.  
ლებისკარის გრძელ ბილიკზე მინდიამ თავისი ლანდი დაკარგა.

ერთხელ მინდია და მისი ძმები ბანზე ისხდნენ. დაინახეს,  
ფუტკრის სკას ახალნაყარი ფუტკარი დაესია. გაიშართა სამკვედრო-  
სასიცოცხლო ბრძოლა. მერე დაინახეს, ერთ კურატს ბუზი შეეჯდო-  
ბოდა, ჰკბენდა. და აწუხებდა. კურეტი კუდს იქნევდა, ხტოდა, დარ-  
ბოდა, მაგრამ ბუზი ვერ მოიშორა. მერე მდინარეში ჩავარდა. ბუზი  
მდინარემ წაიღო და კურეტი დამშვიდდა.

ამ დროს მინდიას ხელზე მწარედ უკბინა ბებერამ. მინდიას  
ნაკბენი ალაგი დაუსივდა, მინდია ყველაფერმა ამან ჩააფიქრა.

— მინდიაე! აი ეგეთ ას წუთისოფლის წესი, — უთხრა ბერ-  
დიამ, — ეგეთ. შენ კი ვითომც ბრძენ იყვა, უბრალო ბალახი გებ-



რალეზიანა, ის ქვე არ იცი რაისად. გირჩევ გონს მახვიდ, გონს, თორემ ბალახთ სიბრაღული არას ჩამაგაყრის.

— მერმ რა ას მაგით, რომ ფუტკრები ერთმანეთს იხოცან. ზაგათ განა ჩვენსავით ჭკუა აქვ? კაცთ უნდა ვიცოდეთ, რა კაი ასა, რა ავი.

— შენ იქავ შენსას მიჰყივ, კიდე! — უპასუხა ძმამ—ყველა პირუტყვი, ყველა ფრინველი, ყველანაირი მწერი, ქვემძრომი, ნეხვის ქიანი, იმათთან ყველა მხრის კაცნი იბრძვიან ურთერთში. შენ კი რას ღბოდავ, რას როშავ, რას?

მინდია დაფიქრდა. მას მოაგონდა, რომ ზოგი ბალახი მავნეც არის: საწამლაგია საქონელისათვის. მისი ძროხა მასკვლია რაღაცა ბალახმა მოკლა. მის შინ არ ყოფნის დროს, ქისტები დასცემოდენ სოფელს და აეკლოთ.

მინდიამ აიღო თოფი და სანადიროდ წავიდა. სადამოთი მინდიამ მოკლული, ჯიხვი მოიტანა შინ. ამის შემდეგ მინდიამ წინანდებურად დაუწყო ხოცვა ქისტებს. მინდიას ძალიან ჰყავდა ისინი დაშინებული.

ბერდიამ რომ დაინახა, გაუხარდა და უთხრა მინდიას:

„მაგრამ ეს წუთისოფელი  
როსნამდე მოსახმარია!  
კარგი ვაჟკაცის სიკვდილი,  
ცუდის — სიცოცხლე ბრალია.  
ხევსურეთს ვილა გაზრდიდა  
შენ ფერს ხევსურის ქალია,  
თემ-სოფლის საიმედო  
მტერთან კლდე იდგას სალია.  
საც გაჭირვება იძახან,  
გადაიხუროს რვალია,  
ომში წინ გადაიტანის  
დასაბლუჯველი ხმალია“.  
გაბედა მითხოსაკედა,  
გადაიტანა კვალია,  
ბევრჯელ ულახავ უწინაც  
მაღალ ქისტეთის მთანია,  
მაგრამ სრუ მუდამ დავლათი  
რა ძვირად საშოვარია.  
მითხოში უნდა ჩავიდას,

სახელ აქვს მოსატანია.  
თუ კი მტრის ხელებს მაიღებს,  
არ უნდა ძროხა-ცხვარია,  
მინდის უყვარდა სახელი  
არ უნდა ნადავლარია.

მაგრამ მინდია აღდისძის ძმობას არა კარგავდა და ყოველ-  
თვის მიდიოდა მასთან.

ერთხელ ძმებმა და მეზობლებმა უთხრეს მინდიას: ერთხელ  
ჩვენც წაგვიყვანე ქისტების სახოცავად. მინდიამ თან გაიყოლია  
ძმა ბერდია და ორი მეზობელი—კვირიკა ჯაბუშანურ და აპარეკა.  
გზაში ქარიშხალი ამოუვარდათ. თავის შესაფარებლად მინდია,  
ამხანაგებით ძმობილის აღდისძის ციხისაკენ წავიდა სოფ.  
მითხოსაკენ. მიადგნენ კარს. დააკაკუნეს. მაგრამ, მინდია ქარიშ-  
ხალსა და სიბნელეში მოტყუვდა. მეგობრის კარის მაგივრად, მტრის  
კარს მიადგა.

დააკაკუნა კარი. გამოეგება სახლისპატრონის ქალი აღაჩა და  
მიესალმა მინდიას და მის ამხანაგებს. მინდიამ ძმობილი იკითხა.  
აღაჩამ უპასუხა, შინ არ არის, სოფელშიაო. მოითმინეთ, ამ სა-  
ათში დავუძახებო. ქალი შებრუნდა შინ და თავის მამას უთხრა:—  
ხოგაის მინდია მოგვადგა კარს, აღდისძეს კითხულობსო. მამამ  
ქალს მისცა თავისი დიდი ტყავი და უთხრა: ეს გაუტანე, ციხეში  
წაიყვანე, უთხარი ცეცხლს დაგინთებთქო, იარაღი მოიხსენით,  
ვიღრე აღდისძე შოვათქო. აღაჩამ ხევესურები ციხეში შეიყვანა და  
ციხის კარები ურდულით დაუკეტა გარედან. მიხვდა მინდია, რომ  
მოტყუვდა.

მითხოს ჩავიდა მინდია,  
ხანია შულამისაო.  
ზედ შავი ღამე დაეცა  
მთვარე არ იჩენს პირსაო.  
აღბათ დაბრუნდა უკულმა  
დავლათი ვაეკაცისაო.  
ცრემლით ატირდეს ნისლები  
ნამსა ნელ-ნელა სცრისაო.  
ჩამაწვა შავი ღრუბელი  
შავად დაეცა ჩრდილსაო,  
გადაერია სავალი,  
მინდის ბილიკი მთისაო.

ქალმ გარეთ გაზააგება  
ქემრით ნაკერი ტყავიო.  
ახყარეს იარაღები  
მინდიას საომარიო,  
შეჰყარნეს სიმაგრეშია  
მაგრად ჩაკეტეს კარიო.  
მინდი ძმას ეუბნებოდა:  
ძმავ, რად გატეხით ხარიო,  
აკასთან აკურასთანა  
მედშენაც დავსთმოთ თავიო,  
მე თერთევო შეგონა  
შიგა აღდისძე არიო  
აქც მიზუ ტიალებულა  
ალაჩა, ქისტის ქალიო.

ალაჩას მამამ სოფელს შეატყობინა, მინდია ჩავიგდე ხელშიო.  
ციხეს ქისტები შემოეხვივნენ.

კვირიკა ჯაბუშანურმა უთხრა ამხანაგებს, ფანჯრიდან გადაეხ-  
ტეთო, მაგრამ მას არავინ გაჰყვა, მარტო ის გადახტა და გაიქცა.

ბათაკაისა ლურჯამა  
მალლად მაილა თავიო,  
გათენებისას აავსა  
ქავის და ქავის კარიო,  
გაგვაცნობიეთ მინდიი  
მითხოვლთ ნიაღვარიო,  
კვირიკამ ჯაბუშანურმა  
ციხეს გაბანდა ჯღანო,  
ჩარდახით გამაუფრინდა  
ირემ დახივა ჯარიო.  
კვირიკავ ჯაბუშანურო  
დიდხანს ცოცხალი ხარო  
წაედ, წაილი ამბავი,  
მინდის ადგია ძალიო.

ქისტები შეცვივდნენ ციხეში, უნდოდათ მინდია ცოცხალი ჩა-  
ეგდოთ ხელში და ეწამებიათ, მაგრამ მინდია არ დანებდათ. სამი  
კაცი მოკლა და მერე თვითონ მოიკლა თავი. ბერდია და აპარეკა  
კი ხელჩართულ ბრძოლაში დაიხოცნენ.

კვირიკა ჯაბუშანური დილით მივიდა არხოტში და ხოგაის მინდიას სიკვდილის ამბავი ზიიტანა.

მზე წითლდებოდა, წყრებოდა,  
რო ხიგაის მინდი კვდებოდა,  
ჩამოდიოდა ვარსკლავი  
მთვარე უკულმა დგებოდა,  
ცაზე მდინარი ფრინველი,  
თბებოლოს იხოშებოდა,  
ხოგაის მინდის დედასა  
მზე ედგა, აღარ სთბებოდა.

### ხევსურული ლექსები

ელოს ატირდენ დედანი,  
მტერნ მარხედ შეგვაშინაო,  
კარზედ მოგვიდეს სტუმრულად  
ძალათ შემოვალთ შინაო.  
თავს გაგჭირთ ჯიელებს  
ქალებო წაგიყვანთ შინაო,  
შაყრილნი ფშაველ-ხევსურნი,  
აღასამც შამოსიენაო,  
დიჩინებს ხევსურის შვილებსა  
თოფები დაუმდღვინაო,  
ფშაველებ ლეგ-ლუგეები  
თოფებსა ჩაშეწვინაო,  
მიქელაის სვილის გაზრდილი  
რად არვინ დაიჭირაო

### ღისაგან გლოვა ძმისა

ძნელია გულის ბრძოლაი  
და რომ ფიქრობდას ძმასაო,  
ფიქრობდას ლოგინ არ უდგას,  
უქერავ მიწას მყარსაო.  
გველებ სადილობს ლეშითა.  
ასაბუდრებენ თმასაო,  
უღნების სხეულობაი,

\* ლექსი გამოთქვა თამარ (კინტო) დავითას ასულმა არაბულმა სოფ. ჯუთაში.

ვაჟკაცს აკლდების ძალო.  
ბრალია სუხუმიაო,  
მიწა გიდნობდას ჯანსაო,  
არ ესხას იარაღები  
შენს ციხესავით ტანსაო.  
გული იიოად არ უდგებოდას  
შენს მაუზერა ხმალსაო,  
ენა არ ლაპარაკობდას  
სიტყვა ხეთქავდეს ქვასაო  
ბაბუა არ ედგ გვერდითა,  
მტერ არ აძლევდასთ ზარსაო,  
ლომ გულო შეუდრეკელო,  
დედულთ მოგასწრეს მთვრალსაო.  
იარად ჩამაყრეულსა  
თან გაყოლებენ თვალსაო,  
ახალიზებენ მაცილსა,  
სუხუმავე, გრევენ ძალსაო  
არა — კი ნუ დაღონდები,  
ტყულა ვერ იგდებს ყმასაო,  
შენაც ბევრ მახკალ ბევრ, განა  
ღმერთმ თუ გახთემდა ვალსაო,  
ნუმც გაიყოლებ გულითა  
შენთა დედის ძმად ჯავრსაო,  
არ მიაგხკლეს სირცხვილიანი  
ქალს არ უდევდი ზალსაო,  
არცა რა გვექნეს სახელი,  
აეგათ დაზღვეს თავსაო  
ხევსურს არავენ მაუხკლავს  
მამიდაშვილი სხვასაო  
ჯიში აქვთ ჩამამავეალი  
არას ვინ იტყვის კასაო.  
თავი ცოცხალ დაღმარხეს,  
მიწა ვერ უძლებს ბრალსაო,  
შენ სიკვდილ შენსა მამკვლავსა,  
აღარას ჩავსთვლი სხვასაო.  
გავთვალე ბოროტიანმა  
ვასვენებ გულის ჯავრსაო.

აღბათ გაუჩნდა წერასა,  
ჯერე ძმაი ხკლავს ძმასაო  
ბევრ წუნენა შამანარცხე,  
არხვატ ციმბირის ცალსაო,  
ჩაგიწყდა გულის სიმები,  
ფიქრ დასვენე ძლიერი  
გიმტყუნა ბედის წერამა,  
გულ დაგიშვიდა კლდიერი  
ფოლადო არხოტიონო,  
სამუდმო ლოგინს მიელი,  
ბაბომ უმცროსად გაკუთნა,  
შენ დედის ძმიშვილ მთიელი.

\*\*\*

ქალნი ჩახოცნა თავისნი,  
სულეთი წაიხთინაო,  
რად ვინ გაუშვა მიქელა  
რად არვინ დაიჭირაო,  
ყველასამც ევრე ზაუა  
ვინც მიქელს გაუცინაო.

\*\*\*

ეშკაითი ჯარსა ჰყრიდა  
ქვევით უნდა წავიდესო,  
წავიდეს თუ არ წავიდეს.  
პატარძელს გავიდესო.  
ვინც რო კაი ვაჟკაცია,  
ორ დღეს უკენ მავიდესო,  
ეგ გაიგა მართებელმ  
მუხლზე გაიდევდა ხელსო,  
აქ მამიედ სოლომანო,  
მე გამიჯედ მუხლთა ქვეშო,  
განა მისდიხარ სოლომანო  
ვინლა მომიკრებდა ცხვრებსო.  
სოლომან ბუთულაშვილი  
რა კარგად ყურბდა ცხენსო,  
დილითა და საღამოთა  
თითო ლიტრას აჭმევს ქერსო,  
თბილი წყლით ძუას გადაბანს.  
გრბით გადუპოხდა წელსო,

შენი ჭირიმე ლურჯავო,  
გამომადგები ერთ დღესო,  
ჩადიან ჩამდინარაზე,  
სოლომან სჯობს თავადებსო,  
გაქცეული ქორსა ჰგავდა,  
გამოექცა შევარდენსო,  
ეგრე ოსმალოს აიღებს,  
როგორც მიმინო მწყერსაო,  
საჩქაროზე მოუტანა,  
ხუთის თავი მართებელსო  
კარგი, იკმავე სოლომან,  
გეყო მამიშენის მზესო,  
სოლომან არ დაიჯერა  
კიდევ მოუმატებ ბევრსო!  
ერთი კიდევ გარდაეტივა  
წინ თათრები გადუდგესო.  
ორი ტყვია ლურჯას უკრეს,  
სოლომანსაც მიარტყესო,  
ვა, დედას სოლომონისას  
ჩა ჭრელადა ხედავ მზესო,  
გული გულად აღარ გაქვს,  
გულის ალაგს მოგარტყესო,  
ბიძა ტატუა გვერდს უდგა,  
ცხენის გავას გადისვამსო,  
ნუ გეშინიან სოლომან,  
მე გაჩვენებ მამაშენსო,  
ყმაწვილურად რად მეტყოდი,  
ვინლა ნახავს მამაჩემსო.  
ეგ პასუხი დაათავა,  
სოლომანს კი სული ხთესო,  
გადმაიღეს სოლომანი,  
გზის პირებში დაღმარხესო,  
მარმარილოს ქვა დათაღეს;  
დათაღეს და დაადგესო,  
ყარაულებ დააყენეს,  
ეს არავინ ამაგდესო,  
ცოდვაი სოლომანისა,

საურჯულოს დარჩესო,  
 მაუძახეს მედროშკესა,  
 ორქაფები შააბესო,  
 ჩქარა დროშკა მაიყვანეთ  
 თორე ცხენებს გასჭრის ყელსო  
 მაიყვანეს დროშკეები,  
 სოლომანი შააგდესო,  
 ქალაქში შამაიყვანეს,  
 სიონის ზარი რეკესო,  
 იმტენი დღეგრძელობა მაქვს  
 რამდენი ცრემლი ღვარესო,  
 მაროს ნუ გააგებინებთ,  
 დანით მაიჭრიდა ყელსო,  
 სამჯერ მარო გამოვარდა  
 ხელი ჰკრეს და შააგდესო,  
 იმ ღამეს ძეობა იქნა,  
 მაროს ბიჭი აყოლესო,  
 მესამე დილას მონათლეს  
 სოლომანი შაარქვესო  
 ა მაგის მოლექსესა.  
 ერთი ჩოხა ჩამაცვესო,  
 სააზალუხეს დამპირდეს,  
 ის კი ისრევ დამაკლესო.

\*\*\*

ვერ გაიგითა ქართველნო,  
 შეგეხსნათ რკინის კარიო,  
 ნეფე აღარ გყავთ ერეკლე,  
 ბაგრატიონთა გვარიო.  
 დამდგარა ბაირახები  
 აღარ ჰქვს ზარბაზანიო,  
 მანამდი ვიყავ ცხენს ვიჯექ  
 მიეძრენ და მოეძრენ ზღვანიო,  
 ახლა თქვენ შაინახებით  
 ქალაქის შეედანიო  
 შვილს გაუწირე ანდერძი  
 ჭხა-სისხლიანი ხმალიო.  
 სათათრედ ნუ გახდიდით



იმერეთ ნეფის ქალიო.  
სახალხოდ ნუ გახდიდით  
ევ ჩემი სამალქანიო \*  
ამა ქართულის მათქვამი  
თავად ერეკლე ვარიო.  
დაესწერე კამალაზედა  
ჩემი სიტყვანი სამნიო.

\* \* \*

ლულის კლდით ლულელ შეიღებსა,  
სიმღერა გამოდიოდა,  
ქონ უდგა ლუდით სავსენი  
აისხლ-ფერად მოუდიოდა.  
ქორწილ აქვთ ჭრელაის შეილსა,  
უწევრად მოუდიოდა,  
ლულელ შეიღების ნახოცნი  
მკვდარნი კლდეთ გადმოდიოდა.  
ლულის ძირს წყალი დაწურნა  
ორ წყალში აღარ დიოდა,  
იდუაომით იძახდა  
წყალ-წყური არ მოდიოდა  
იდუას მამაი არ ცოლის  
ხელ ხმალზე მიუდიოდა,  
წინ ლეკი წამოუგდავის  
ხვედრება ამოდიოდა  
აბშინა სადაც იქნების.  
აბშინას ყურს მისდიოდა,  
სულეთში ლულელ შეიღები  
ჩივილით ამოდიოდა.  
მხარ არ გვიჭირეს ხევსურთა  
მარტოთა არ გადიოდა.

\* \* \*

ეთის კარზედ შევიყარენით სამოცდა სამი ჯვარია,  
ჩამოდგეს საწონ-ჩარეკი კვირავ დაუგო თვალია,  
ოც ლიტრიანსა სინასა ვერ შაუყარნეს კარია,  
ბოლოსკე მე დაემჯდარიყავ ყველას ჩემზედ აქვ თვალია.  
ორი მორიგეს მოვთხოვე გარმომიმეტა სამია,

\* სამალქანი—ჯაჭვის ჭერანგი.

ვიარე, ავსწიე, ქვეშ გაულიე ქარია,  
 ბს ხქონია ქორწილი, უჩქეფავ სისხლის წყალია,  
 იგეს ხეთის ნაბადებთა წაღლულუ იახსარია,  
 თა თავი ხყვანია დედაი — ცხრად დამზდელი ქალია..  
 საკმისას ლახტი ვესრიე, ზედ გამდოხურე ბანია,  
 თი სადამ იქ დამეშალა, რომელიც თავი არია,  
 აგას ლახტი გამოვაცოლე, კლდეს მომიფარა თავია,  
 კლდე ორათ გაახეთქიე, დევს დამოვთხარეს თვალაი.  
 კარგად სცოდნია ოხერსა, ამუდელაურ ტბანია,  
 ცალთვალა ჩავიდა ტბაშიდა, თან ჩავეყე იახსარია.  
 ჩავედ და ველარ ამოველ, სისხლმა გამიბნა მხარნია,  
 კარგა იკვლიეთ ჩემ ყმათა ,ოთხ-რქა, ოთხყურაი ცხვარია,  
 მაიყვანეს და დამაკლეს ღმერთო დასწერე ჯვარია.  
 შამოდე ბროლის ქვაზედა შამოვიბერტყენ მხარნია,  
 ჩავხედე ჩემთა ნაჯდომთა, ჭრელ მომრჩალიყვენეს ქვანია,  
 ღმერთო თუ მამე შეძლება შენავ გამიხსენ მხარნია.



ხევსურეთს ნურას წამოხვალ, ვერცრახარ დავლათიანი,  
 თოფი ბევრია ხევსურეთს სიათა პირკომლიანი,  
 ხმალი ბევრია ხევსურეთს ფრანგული ფხა-სისხლიანი,  
 ობოლიც გაიზრდებოდა მტრისავე გულ-ჯავრიანი.  
 იქა ფშავისკე წახვიდი საქონიანი-ცხვრიანი,  
 ჯოჯინის ღელეს გახვიდი იქ გზა მოვა საყელიანი,  
 იქ მოვა ცექიაური სახელად თორღვანი,  
 ხმალი მას სთხოვე შენ მაგცა დანა დამალა ფხიანი,  
 მარჯვნივით შამაგარა გიყვა მარცხივით ზიანი,  
 ხელ დამცა საყელოშივა მკლავთითას იმედიანი,  
 ვაჟუსძევე წამოგაქცია მიწა გაჭამა მტერიანი,  
 თავით ყვარნები დაგისხა გალო გახარით წვნიანი,  
 ძვალზე თუ სჭირდეს ნაჭრევი, ხელდაღლოცვილი ხმლიანი.  
 გნალოვნის ჩრდილში გამწირა, ნაშად გახურა ცვრიანი.  
 წავიდა, მთა ვარდიარა, ირემას ტანზადიანი,  
 მიცუს ხკითხავდეს დედაი,—სად იყავ მკლავ-სისხლიანი,  
 რას მეუბნებით დედაო, მე მოვალ გულ-ჯავრიანი.  
 ხმალ ვაჟუსძიამ წალმართვა, შინ მოვე სირცხვილიანი,  
 გეტყობის ლაპარაკშივა, თორღვაო ვიქნავ ზიანი,

ხმალ თუ ვაჟუსძემ წაგართვა დანა ხო დაგრჩა ფხიანი.  
ვაჟუსძის გარდამღებლო თორღვავ რა ჰქონდა ფარადა  
სამკლავნი გიტარებიან — ბაბურაულო ფარადა.

\*\*\*

ხუთშაბათ გათენებადა, თოლიან იქნა დილაო,  
გარმოვიტანე ფანდური ლარს გიღებ საყიჟინაო,  
საგონში გახერებულსა დავჯედ და დამაძინაო,  
მე ვთქვი თუ ცხადათ გამოვე ხმა რაიმ მამადინაო.  
უბრალოდ მომჩვენებიყო მამგონდა გამაცინაო,  
სოფელჩი დამიპატივეს ჩვენ შენგმეტ გვინდა ვინაო,  
ჯერ ხალხთ დაუწყო კვლევაი, იქ ყოფაც მამეწყინაო,  
იქ არვინ იბადებოდა, ავდე წამოვე შინაო.

ქვან დავისრიე უკულმა, იმას მიტყობდა ვინაო,  
გზაში შამომხდა ხევსური ძაღლივით დამიღრინაო,  
შენ სახარ ჩემო ძმობილო, ხმაც შენი მამადინაო,  
შენ აქით გარდაითხიე, თავის სამშობლოს სწირაო,  
სიცოცხლე მეც მამეწყინა თემთ-წყალი გამიწირაო,  
მე არვინ მინდა შენგმეტი, გინდა გულ დამაცინაო,  
ვერავენ ჰამდის ჰკუაშიგა ზოგენ გულ შამიშინაო,  
ნეტავი შენთა ღუშმანთა სისხა ქვე გააჩინაო,  
მანამდი სხვა რას იტყოდა შენ აგტეხიან წინაო,  
შენაც ძალიან გშურობენ ქალო ხევსურის თინაო,  
რათ შამიგინე ძმობილი მეხევეთ ხაბიძგინაო.

\*\*\*

ჩამოველ კოტოხის ძირა, იყვა შუადღის ხანია.  
გავიდა ბნელეთისადა. ღურბელი საწვიმარია,  
სმაი აქვთ გუდამაყრელთა, ღვინოს სმენ როგორც წყალია.  
მეაც იქ დამიპატივეს დამიშალითეს მთვრალია,  
ჩამარტყეს მაგარ-მაგარი წამამაკეტეს ძალია,  
ველად რო გამოუარდი, იხულებს როგორც ცხვარია,  
ახლოს ხქონიყო დუქანი, მაგრად მახარეს კარია,  
თოფს ვერ წაიღებთ, ძაღლებო, წელსა მწყევტს გილლის ჯარია.  
გავარდა ვანკისეული კიტორს შეხყარნა ხმანია,  
გამსვლელად ბატარიამა მაგრა მიჭირა მხარია,  
თორელათამა გიგოლამ დაქროლა როგორც ქარია,  
ჩამომყოლიყო გვერდზედა არწივი მეომარია,  
საწყალო წიწაიშვილო, ტყესა მთავლო თვალია,

ზახნის ძირს შამომავალსა ამხვიე თოფის ალია.  
ვინც მყავდა ამხანიკები, კლდეთ გადახყარენ ჰკვდარია,  
ერთი მეც გამეგხროლე, ქვიშა გაწითლდა მშრალია,  
ხოზელ მამუკა ვინ იყავ, ვალად მემართა შენია,  
წამოსვლა მინდა ერთხანა უნდა მოგავლო თვალია,  
უნდა აგყარო მენდალი მოგაკრა სისხლის ჯვარია,  
ოხერსა ოსაის წვერსა, თოვა სკოდნიყო, ქარია.

### კუნძულელის ლექსი.

ნეზირ-ვაზირ სოლომან ბრძენი კალმახობას წავიდეს,  
ერთი თევზი დაიჭირეს, ერთ ტაფაში მოხარშეს.  
რომელიც რომ მტყუანია იმის თევზი გაცოცხლდეს  
ერთი კაცი დაეინახე, შენს ლოგინში ბნელ ღამეს.  
მემართლები მართებელო მე რომ თავი მომჭრა დღეს.  
თავს არ მოგჭრი დედუფალო, ხოლო მოგვიკიდე მტერი,  
შვიდი წელ-და წელიწადი ჰყვარობ კულნძულ ხელმწიფეს.  
ნეზირ-ვეზირ დაიძახა ვინა ჰფიცავს ჩემსა მზეს.  
გაუხარდა კუნძულელს, რას დავესწარ საკვირველს.  
ჩაქმა-ჩუქმა დაიყარა, თოვლში ფეხშიშველა ხტეს.  
ერთი სპილენძის კოკა გვაქ გვიბარია მემარნეს.  
შენი სიყრმით თუ აგვიბსებ დედუფალი შენ დაგრჩეს,  
შვიდ დღესა და შვიდ ღამეს, კოკით ყელში იდინეს  
შინ კი ნულარვის გასწირავთ, ნურც ყმაწვილსა, ნურცა ზერს.  
ეს რა იქნა მეუფეო, კოკის ყელს რო დააკლდეს.  
მიიწიეთ-მაიწიეთ — კუნძულელი ჩამოჯდეს.  
მიიწიეს-მაიწიეს — ჩაიტყუეს კუნძულელი  
დედუფალს კი ხელი ახკრეს, ზეზარფეშა გადახუხეს  
დაკუბეს და დარაზეს.  
გაუყარეს ხომალდები, მდინარ წყალში გადუშვეს  
მეთევზეს და მეკალმახეს მეუფე ღმერთ გაუწყრეს.  
წყალში ბადე გადუტიეს — კოკის ყელსა გააბეს,  
გასწიეს და გამოსწიეს, ნაპირად კი გააგდეს.  
ერთმანეთს ეუბნებიან, ათას თუმან ფული ძევს.  
გადახადეს ზარფეშაი ქაჯით სავსე კი ამოჩნდეს  
ზოგი მოჰკლეს, ზოგი დაჭრეს კუნძულ კი აკაფეს.

ერთი კლდეში შაურდა, — ეშმაკი იმისა გაჩნდეს  
ერთი წყალში შაურდა — წყლის ქაჯი კი იმისა გაჩნდეს.

\*\*\*

მე არ მოვშლი ლექსობასა, ქალებ მირგვილ დენასაო.  
მე იმას გირჩევთ, ქალებო, მოაკარით ენასაო.  
შინ დასხედით ჭკვიანადა, თავის მამის კერასაო.  
თავის საქმე დაგეკარგათ, საიდუმლოს კერვასაო.  
თქვენ ხო წუთისოფელს ეძახით, საჩვევაზე დენასაო,  
გზანი მუხლად ჩახარენით, ხათვანგებზე დენასაო.  
ძლივ მაელით გაზაფხულსა, ჭალებზე დენასაო,  
მგზავრსა შემდინ-გამდინარსა, გააჩერებთ ყველასაო,  
ძალათ ფეხზე დააყენებთ, ვისაც ნახავთ ქერასაო,  
ქება ისითასა უნდა, ტანშიგ გვანდეს ჯერანსაო.  
ხალხში დევერია ხქონდეს, შულლში გვანდეს ელვასაო,  
არ იწყინოთ ქალებო, ნუ დამიწყებთ სენვასაო,  
მე კი ყველას მართალს გეტყვიო, ჩემის თავის შველასაო,  
რო იწყინოთ გავჯარდები, დაგიცხადებთ ყველასაო.

### აბრამის ლექსი.

აბრამს კარგი ღონე ხქონდა, უშვილობა აღონებდა.  
— ღმერთო მომეც ერთი შვილი, შენი თვალი დამიტკბება.  
აბრამს შვილი გაუჩნდა, ღვთის ბრძანება ეგ იქნება,  
აბრამი ცოლს ეუბნება. ეგ ყმაწვილი სად კეთდება.  
სამი წლისა როცა იქნა, ცხენზე შაჯდა, შეეძლება,  
შვიდი წლისა როცა იქნა, სწორიც აღარ შეედრება.  
— შვიდის წლისას საღეთოდ მითქვამს, მოტყუება არ იქნება,  
— თუ კი გითქვამს კიდევცა ხქენ, ორბირობა არ იქნება.  
აბრამ ილესავეს დანასა, დანას ფხა არ უდგება,  
— ახა ღმერთი, მამაჩემო, შენი საქმე მიკვირდება.  
ქვაბი დულდა წყალი შრება, სამსახურ აღარსად ჩნდება,  
— ვაი, შვილო, შენი ბრალი! მე შენდა თქმა მიკვირდება,  
ღვთის საქმეა შენს თავზედა დღეს შენი დღე გათავდება.  
— ღვთის გულისთვინ მამაჩემო ოშკას ბევრი გადახდება.  
ჩქარა დამკალ მამაჩემო, რბილი ძვალზე აღარ დგება.  
აბრამ ყელში დანას უსომს, საწყალს ხელი უხელდება.  
— მაგრად შემკარ, მამაჩემო, შვილი მამას ეუბნება.

მალლა შემდე მამაჩემო, სისხლის ღვარი წამოდგება.  
კაბის კალთები გადიკვათენ თორ ეგ სისხლისცვარ გეწევა,  
თუ ეგ სისხლის ცვარ გეწევა საიქიო დაგელევა.

გადმოხედეს მოწათეთა ნეტავ აბრამ რაღას შერება,  
გადმოუგდეს თეთრი კრავი, აბრამის წინ დაეცემა.

— ეგე დახკალ საღვთო იქენ, შვილიც იქავ ავიდგება,  
ეგ რო დახკლა საღვთო იქნა, შვილიც იქავ აუღდგება,  
ვაჟკაცობა რაცა ხქონდა კიდევ გაუჯობინდება,  
აბრამი ტივით მოვიდა, წინ გლახა შეეყრებოდა,

— პური მაჭამე, გამვლელო, შიმშილით სული ჰბდებოდა.

— წელს გერტყა ოქროს სარტყელი, შიმშილ რას გეკადრებოდა.  
მოდო მანყიდე სარტყელი სადილ რა დაგიჩევედა.

— შენ რომ მაგყიდა სარტყელი, მე რაღა სარფა მრჩებოდა.  
გაბრუნდა უკულმ დასწყივა, ქრისტე ღმერთ დაუხდებოდა,  
ამანდით გამაბრუნვილი გამვლელსა მიუდგებოდა.

— პური მაჭამე, გამვლელო, შიმშილ სული მხდებოდა.

— მოდი მიირთვი სადილი, შიმშილ რას გეკადრებოდა.

— ურძეთო პურს ვერა ვსჭამ, თუ კი რძე არ იქნებოდა.

ეფიცებოდა გამვლელი, — მე რძე კი არ მექნებოდა.

— ამაგოდენა ცხვარშია, ერთა როგორ არ ღებოდა,

კიდევ შეჭფიცა გამვლელმა, ერთა ბერწაი ღებოდა,

გამაიყვანეს მოწველეს, კოდსაც გადაურჩებოდა.

გადაუტიეს ბერწაი, თან ბატკან გადახყებოდა.

— ერთი გყოლია გამვლელო არაღამც გაგინდებოდა,

ხელთა მისცა ხმელი ჯოხი, — გაჭირდას გამოდგებოდა.

შვიდი წლის გვალვა დადგაო, მინდორ დაიწვა, დაცხაო,

გლახაი მემცხვარიი სულ საჩრდილობელს დასცხრაო.

მინდორს დასცხა, ხმელი ჯოხი სულ ფურცლის ხეთ გადიქცევაო,

რაიც გამვლელის საკერძო, ჩრდილოში შემოდგებაო,

რაიც აბრამის საკერძო — იწობა იღაგებაო,

კაცი მოუა აბრამსა, — შენ ცხვარი ილუპებაო,

რო შამობრუნდა აბრამი, ეგ ცხვარი უჭრელდებაო.

— ჩემი ცხვარი თეთრი იყვა შავად რამ გადაგალაო,

ეფიცებოდა მემცხვარე, — ჩრდილში არცა მღვარაო,

შაწუხებული აბრამი თავით ქვად დეედლებოა,

საათიც აღარ დალია აბრამს სული ამოხდებოა.

## თამარის ლექსი

ქალმა თქვა, თამარ მეფემა,  
ქართველთა ვერა გავიგო,  
შუა ზღვას ჩავდგი სამანი,  
ზმელეთი ჩემკენ დავიდგო,  
ქაჯავეთს დავდი იჯარა,  
ისპანის ხარჯიც ავილიო,  
ზღვას იქით წემსათ გავედო,  
ამოდენ მოვიმოქმედე,  
ცხრა ადლი ტილო წავილიო.

## ხევსურული სადღეგრძელო

ხევსურეთში საერთოდ თამალობა არ იყო მიღებული. ხევსურული ღრეობის დროს (ქეიფის დროს) ვისაც რა სადღეგრძელო სურდა, იმას იტყოდა. სანიმუშოდ მოვიყვანთ ერთ სადღეგრძელოს, თქმულს ჟნცრუა ჯაბუშანურის მიერ:

სმენა იყოს, გაგონება, დაკვრა იყოს-გაგორება!  
ეს რა იყოს? შენი მტრის გული შუა გაიყოს.  
რაც იმან შენთანით მაიგოს, სააქიმოში გაიღოს!  
მტერი რომ გზაში შემოხდის, კისერს გაავლი ხელი,  
გადიბრუნე, დაარტყი, ზურგზე ადინე მტვერი.  
გაგიმარჯოს, გაცოცხლოს, მოგცნეს ადამის დღენი,  
სანამ იცოცხლე: ბიძიავ, სანამ ცასა ზრდის ნამია,  
სანამ შთაში სჩქეფს წყაროი, სანამ ყანას ხნავს ხარია,  
სანამდე ბრუნავს წისქვილი, სანამ გვინათებს მთვარეა,  
სანამ ჯინჭველას ქალაქით არ გაეტენონ ქვანია,  
გაგიმარჯოსთ, გაცოცხლასთ, დაგაბერასთ, დაგხოცნასთ.

კ ა უ ი ა

უ შ ა ფ ხ რ ე ლ    ლ ე ა ვ ა ს .

მათურელ ხევისბერისას თქვეს,  
ადიდებს ხატის სახელსა.  
დააწყობს ქადა-პურებსა  
ქებას დაუწყებს სანთელსა.  
დარიცრიცდება დამთვრალი  
ფენი ქობსაით დაცდება.  
ძალიან დამწვარს ამბობენ  
ლოგინში იწვა სამ თვესა,  
საქონის საქმელ გაუწყდა,  
მაგის ცოლი წთის საბძელსა.  
რას იქამს თითოთითოსა  
თავის მოკეთის სახსნელსა.  
მაუდის მათურელებსა  
ვინ იქამს ემაგ საქნელსა  
ერთხელ კი ლუდ ჩაეკრა  
ში კუდყავარა ვავრძელდა.

\*\*\*

ფშავ-ხევსურეთის შესახებ  
უნდა დავიწყო კაფია,  
გზა კი აქამდის მოიდა,  
მაგრამ სკოლები გვაკლია.  
ჩვენ ისევ სიბნელეში ვართ,  
სწავლა არ არი ხალხშია,  
ჩანგრეულ სკოლები გვაქვს  
სულ ძველი ხე-ქვით სავსეა.  
ისეთი თამჯდომარე გვყავს.



როგორც ნამდვილი დათვია,  
ჩვენ რა განათლებას მოგვცემს  
თავისათვისაც აკლია.  
ფშავ უპატრონოდ დამრჩალა,  
ალარა ჩნდება კაცია,  
ხევსურეთს სკოლებ დაიხსნა  
ფშავს კიდენა აქვს ნაკლია.  
მთავრობამ ეგრე დასტოვა  
რო ყური არ მიაქცია  
მთავრობის შადლობელნი ვართ  
რომ დიდი შრომა გაწია.  
ფშავ-ხევსურეთის მიდამო  
ახტომოპილით საესეა,  
სინათლე გამააშუქა,  
ხევსურეთში და ფშავშია.

\* \* \*

ხმა გატყდა უკანაფშავსა,  
ლეკებ წაიღეს ცხვარია,  
ახადლებს შეგვიტყობინეთ,  
ეგენიც ჩვენი ძმანია,  
წითელაურებს უთხარით, —  
ბევრსა სჭირს მტრისა ჯავრია,  
უკანა ფშაველები მოდიან;  
შიგ დარჩეულნი ყმანია;  
ჩავიდეს ივრის წყალზედა,  
ღმერთო, დასწერე ჯვარია,  
საქისტოს ჩამომდინარებს  
აუტყდა ნიავ-ქარია;  
მარჯვნივ მაჰყვება გიორგი,  
ფშაველთ ლაშარის ჯვარია,  
მარცხნივ მაჰყვება თამარი,  
თამარი დედოფალია;  
გადაიბრუნა ლეჩაქი,  
დაელნა დაღესტანია.  
ხადორით კაცმა იძახა,  
გალმით გავიდა კვალია.  
ბერიძემ მამუკაათთა,

არ დაანება თავია,  
 ლობოტაში გადმეწივნეს,  
 იყო შუადღის ხანია,  
 წინ მაუარა ქერებსა,  
 შამააბრუნა ცხვარია,  
 მე ნუ გგონივართ მარტუა,  
 შვიდნი მტანია სხენია,  
 ზურაბო, დედის ერთაო;  
 ღმერთმა გაცხონა მკედარიო,  
 ომი გეწადა ძლიერი,  
 ჯყვიამ არ მოგცა ძალია;  
 დედა შაერთოს ცოლადა,  
 ვინც ეგ გაწიროს მკედარია.  
 ცხვარიც მაუდის ვაჟკაცსა,  
 მკედარიც მათქვის ძმანია,  
 ყველამ უთხარის შანდობა,  
 რო დაჯარდების სმაშია

### თუშებისა და ფშაველების აგზავნი.

თუშეთს ყავდა ერთი სახელოვანი მეთაური, რომელსაც ერქვა თილისძე. ერთ დროს გამოილაშქრა ფშაველებზე და ააოხრა სოფ. ხოშარა. ამ დროს გაიგეს ფშაველებმა და მამაკაც-დედაკაცებით ერთსულოვნად გავიდნენ მტრის წინააღმდეგ. ლაშქრობის დროს მეტი გმირობა გაძოაჩინა სუმელჯი წოწყურაულმა სოფ. შუქოში მცხოვრებმა. სუმელჯის ცოლი ჯორით უზიდავდა შვილდ-ისრებს და ომობდა. თუშები ისე დაამარცხეს ფშაველებმა, რომ მარტო თილისძე გადარჩა; ამ ომში თუშები იმდენი დახოცილა რომ მათი ჩითანი (წინდები) გოდრით გაუყვიათ ფშაველებს. როცა გაქცეული თილისძე მივიდა შინ, მას რძალი მიეგება კარებზე და უთხრა სიტყვა:

რა უყავ მამამთილაო,  
 თინიბეგ ჩემი ქმარია?  
 გავწირე მუჭის ღელესა,  
 წითლის ბადავით მთვრალია,  
 გვერდით დავუბი ლურჯაი,  
 ტიროდა როგორც ქალია.

თავით დაუდგი დროშია  
აფრიალებდა ქარია,  
განა მარტოკა ის იყო?  
ბევრი სხვა იყო მკვდარია.

როდესაც დამარცხებული თილისძე გაიქცა, მაშინ შეეხვეწა ლაშარის ჯვარს, ოღონდ შინ ცოცხალი დაებრუნდე და დაპპირდა საძლთო, რომ მას აწი ფშაველებზე არ გამოელაშქრებია. აი ახლა საძლთოს იზამს თილისძე და მოვა ფშაველებში ლაშარობაზე, სადაც ფშაველები დღესასწაულობენ. დამარცხებულ თილისძეს ფშაველები სიტყვას ეტყვიან დამუქრების კილოთი:

ლაშარს მოიდა თილისძე,  
დიდგულად დაჯდა ხარია,  
შამეფებრუნეს ფშაველები,  
როგორც ბატონსა ყმანია.  
შენ აქ აქ მოგვევალე  
დიდი ჰქენ ცოდვა-ბრალია.  
თავ მასქერ დიაც ყმაწვილსა,  
კალოდ გალენე მკვდარია,  
დასწვი, დასდაგე ხოშორა  
კამდი აუშვი ალია  
ნაკვეთაურის ქერხოსა,  
შენ შახსენ რკინის კარია,  
დაიცად-აცა ფშაველებსა,  
მალოცეთ თქვენი ჯვართა,  
სახვეწრად მომიყვანავის  
თეთრი ქორაა ხარია,  
ეგ მაშინ ვავარიგოდეთ,  
როცა გამოვლენ მთანრა,  
უბის თავს დაგებდებიან,  
რომლისა კრიდეს ფრანგული  
თილისძეს ცხენის ნალია  
რომლისა სქექდეს თოფია,  
ვისი იქუნებს თოფები,  
უბის თავს დანათდებიან,  
ვისი იქუნებს თოფები,  
თილისძის ცხენის ნალია.

აშის შემდეგ ფშაველები და იუშები ძმად გაიფიცნენ. მერე ისინი ერთად ილაშქრებდნენ საერთო მტრებზე.

\*\*\*

წინად ფშაველებს ბევრ ხალხთან ჰქონდათ ლაშქრობა როგორც მაგალითად ქისტებთან, ლეკებთან. ფშაველები ყოველთვის მოგერიებით იცავდნენ თავს. მაგრამ მტერი თუ გაკადნიერდებოდა. მას საშინლად ამარცხებდნენ. განსაკუთრებით ფშაველებს ქისტებთან ჰქონდათ შუღლი. ერთხელ ფშაველს ისე დაუმარცხებია ქისტები, რომ შვიდი წლის განშავლობაში მათ ხარები არაყოლიათ, ვირებით უხნავეთ ყანებო. ფშაველებს ქისტებთან ლაშქრობის დროს ყოველთვის მეთაურობდა — ლაშარის ჯვრის ხევის ბერო. ეხლა ახსოვეთ ხევის ბერი ხახაი გაბიძოური (სოფ. ხოშარიდან), რომელიც სახელოვანი იყო ვაჟკაცობით. ამ ხახაის შესახებ არის ლექსი:

მიენატრი დაბადებასა,  
ხოშარას ხახაისასა.  
აიხამს იარაღებსა  
ანგელოზსა ჰგავს ცისასა,  
მხარზე გაიდებს დროშასა  
ლალის ლაშარის ჯვრისასა,  
თერეთეგოზე გაივლის  
ქვიშას არ დასძრავს მთისასა,  
თარეში წამოაყენებს  
ნარჩევებს ფშაველის შვილებსა.

ხახაიზე არსებობს მგორე ლექსიც:  
მუცუს აჭირდა ბებერი  
ჯარით სად მიხვალ ხახაო  
მითხოს მივდივარ ბებერო,  
ვარდანამ დამიბარაო.  
მედ იმან უნდა ვიომოთ  
უნდა იქეხოს ცაშაო,  
ცრემლით პირ უნდა იბანოს  
შუქო ვარდანის ქალშაო.

\*\*\*

ნუმც იხდიო ხევსურთ შვილებო,  
ნახადსა ბადაისასა,  
სამჯერ გაყიდეს ყირიმში  
სახსარს ვინ იტყვის ტყვისასა,  
სამჯერაჲ გამოეპარა

გულს დაზევ კაი ყმისასა,  
შიმშილით დაღონებული,  
ქუჩს მასძოვს მადლის მთისასა,  
წყურვილით შაღონებული  
ნამსა ლოკვს ბალახისასა.  
წინ კაცი შამოეყარა  
ფულს აბნევს ბუსრიბნისასა.  
კაცო შენ მითხარ დღეა თუ ღამე,  
შენ მითხარ ღვთის მადლსა.  
გურჯო დღეც არას, მზეც არის  
ძალს უქნავ შიმშილისასა.  
დაჯდა და პური აკმია  
დაწვდომას დახე მტრისასა,  
მემრედ გზად ჩამაასწავლა  
ჩანაველს ჩაპყე მზისასა.

\*\*\*

ღედა ცხონდება ვაფისი  
ბაქოში დავითისაო.  
სხვის ტანზე იცნო ხანჯარი,  
ხანჯარი თავის ძმისაო,  
ხანჯარ ვისია რჯულ ძაღლო,  
ხანჯარი ჩემის ძმისაო.  
თუშისი არის თავად რჯულძაღლო,  
თუშისი სულძაღლისაო.  
ლეკსა ააძრო ხანჯარი,  
დასცა იმ ძუძუს ძირსაო,  
მამლის ყივილის ხანია,  
იმის ცოლ გამოსკყივდაო,  
აქამედის მოდის ბაადი  
ახლა რამ დაიჭირაო.

\*\*\*

მე კი მოგივე დედაო,  
ბევრი სხვა ვერ მოდიოდა,  
დაგვლივნა ხოშარის გორმა  
წყალი არ გამოიდიდა,  
სულმელჯის ისარი  
უფროოდ ამოდიოდა,

წაურვილის შაღონებული  
ცხენტ-ხედრათ ჩამოდირდა,  
ჩაგეყარა ანჭილოშია,  
ცუდმა ნიავმა ქარმაო,  
მიხრით გამოზრდილ საყმობა  
გადმოგვეწივა დავგხოცნა,  
ცუდ დავგიყენა ჟამნია,  
თილისძეც გამოგვეპარა  
გადაიარა მთანია,  
ის რო თუშეთში ჩავიდა  
შამოეგება რძალია,  
რა უყავ მამამთილაო,  
თინიბეგ იემი ქმარია,  
გავსწირე მუჟის ლელესა  
წითლის არაყით მთერალია,  
თავით დაურქვე დროშია  
აფრიალეზდა ქარია,  
გვერდით დაუბი ლურჯაი  
დასტირის როგორც ქალია,  
ტოტით აყრიდა მიწასა  
ბრუნავდა ცოდვა-ბრალია,  
რად მიყავ მამამთილაო,  
ღალატი ჩემის ქმრისია.  
ქალი ციხეში შავიდა  
მაგრა დაწელნა კარია  
რად მიღალატე ნეტარა  
რაზედ მაჰკალით ჩემი ქმარია,  
უნდოთა ფშავლის შვილებმა  
ზალვით გამოსქრეს ყელია,  
მიშველე მამამთილაო,  
შამაბი შენი ხმალია,  
უნდა თინიბეგ ვეძებნო  
ლელაიც ნულარც ვარია,  
საპარავს გადმუეწია,  
დაუხვთა ფშაველთ ჯარია,  
სად მიხვალ ბოზავ დიაცო,  
რაზედ გიჭერავ ზავია?

უნდა ცაბატრთს ჩავიდე  
ცდაზე მიჭერავ თვალია.  
კიბულთ არ ჩავაცილებენ  
ლომხუზამანი ძმანია.  
არ დაიშალა ლელემა  
გადმიარა მთანია.  
მივიდა კიბულთ გზაშია,  
შამახედენ ორნივ ძმანია.  
სადაური ხარ ქალო,  
სისხლის რომ მოგდევს კვალია?  
თინიბევი მყავ დამრჩალი  
უნდა მოვნახო მკვდარია.  
შენ გირჩევ ქალო შინ წადი.  
თორე აქ დარჩი კვდარია.  
არა ვერ წავალ ქალაი  
თინიბევის უნდა ვენახო თვალ-წარბია  
არ დაიჯერებ შე ძაღლო,  
ცხვრებილად მოსჭრეს თავია,  
ზელი მარჯვენას არ ჯობდეს  
რათ შევირცხვინე თავია,  
მაგრამ შენ ქმარ-მამამთილ  
დიდი ქნეს ცოდვა-ბრალია.



ხევსურეთს არი ამბავი  
ლომი დაზეზდა მთისაო,  
ჩამოვა ჩამოზოინობს  
ლალი არწივი მთისაო.  
არავინ დაგაზიანოს  
არავინ დაგგლიჯოთ მწკლითაო.  
დედას გიტირებთ რუსებო,  
ლომი დაზეზდა მთისაო,  
ის კი ვერ იცის ბეჩავმა  
ბალთას ჩაუსმენ გზირსაო,  
ომია ბალთის ქალასა,  
სისხლსა წვიმს მალლა დარია,  
შამახვთა ვუდამაყრელი  
ნაცნობი დიდის ხნისაო,

დანდობით ჰკითხა ამბავი  
სალამ ზიართვა პირსაო,  
უნდა გეხუროს ლეჩაქი  
იმ თავის დიაცისაო,  
უნდ გეცვეს ჭრელი კაბათ  
თავზე ნაჭაპნი თმისაო.  
დაიძრა თავის შავხალი  
უთავა ძუძუს ძირსაო.  
ბოლონავ ამოსაწყვეტო  
გზაში რად მისვამ გზირსაო,  
გამაწირვინეთ სამშობლო  
აი დედაჩემს მტრისაო,  
მგელს კიდევ დარჩა ლეკვებო.  
მოძებნა უნდა გზირსაო,  
არც შენ შავრჩება, ბოლონავ,  
ლალატი თავის ძმისაო.

\*\*\*

მოხვედ და მელიციენელო  
რა ამბავ მოგიტანია?  
მოველ, რა მოველ  
ქისტებ არ მოგვეცეს ზავია,  
დაგვიკრეს ხოშურაულსა  
დაგებრუნდა ცოდვა-ბრალთ  
დაწირნა ჯარემაშია  
უგშერებელნი მხარია,  
ბევრნ გვეყვანან ამხანაგია  
თუშნი, ხევსურნი ძმანია,  
გაიგო სულხანაურმა.  
მალლა შაირტყა ხმალია,  
კი თუ მომიკლეს გიგია,  
კი თუ დამუნეს ცანია.  
შაკაზმა თავის ლურჯად,  
ზედ თავად შეჯდა ქორია.  
დედას გიტირებთ ქისტებო,  
უნდა მოგიხტეთ კარზედა,  
გადინოთ სისხლის ღვარია.  
გამოფრენილმა ყორანმა



გადმიაჩრა მთანია,  
 თავ მსკრა ქისტის მოლასა  
 გამაყოლა მარჯვე მხარია.  
 ეს რო გაიგეს ქისტებმა,  
 შაქნეს დიდ ცოდვა ბრალია,  
 დაიცა ძაღლის ჯიშებო,  
 მალე გიკლიოთ კვალია.  
 უნდა გიგეას შამწირეთ  
 ათი თორმეტი მკვდარია.  
 გაჰკვირდენ ქისტის შვილები  
 აღარცა მოგვცა ზავია,  
 მაგის ნახოცი მკვდრებითა  
 ავაესეთ გალავანია,  
 სახვეწრად გამოვუგზავნეთ  
 თეთრი ქორაი ხარია,  
 შატილს ჩაუსხდენ გზირადა.  
 ზემოთი სულხანაური,  
 ღურბინდით იქვრიტებაო,  
 ესროლა ქისტის მოლასა  
 ხანჯრის ტარებზე ხედებოდა.



თოვლი სთოვს საგურამოსა,  
 ხიჩლაი, თათულიკაი  
 იქ კი შაყრილან გზაზედა.  
 ჩამავარდნია ამბავი  
 უწინდელს მტრობაზედა  
 ხირჩლამ უთხრა თათულსა:  
 სასმელ დავლიოთ ჭკუაზედა  
 ეგ მაშინ გავარიგოდეთ  
 როცა შავხედებით მთაზედა.  
 ჩემი პატარა ფრანგული  
 შოგპრიალობდეს თავზედა,  
 სხვას კი ვერ უტრიალებავ  
 ხმალ თათულიკაის ტანზედა,  
 დაჯარდნენ შავნი ღრუბელნი  
 დაბლა დაყარეს ნამია,  
 თათულიკასა—ხიჩლასა  
 ხანჯლებით ერთმანეთს ჩხვერავდინა,

თოფებ არ ექნა ხელშია,  
წინ სისხლი უდგა გუბედა,  
რად მამკალ უთხრა თათულიკამა  
რად გადამაგდე გზაზედა,  
გაიგეს ხევსურთ შვილებმა  
ხელი დაიდვეს ხმალზედა,  
ჩამაეტივნეს ხიჩლასა  
თათულიკაის ჯავრზედა.  
დაკაფეს ხიჩლავი მზრემდი  
ცრემლები ჩამოსდის თვალზედა,  
შავინდნეს თათულიკაო  
ჯღანნი გაბანდეს გზაზედა,  
როგორ იქშერე ლამაზი  
თავი რა მასჭრე ტანზედა,  
არ შავარჩენენ ხიჩლაო  
თათულიკაის ტანზედა.

\* \* \*

ყუჯით გიორგის უთხარით  
თათართ ხევსურის ნათქვამი,  
ჩობანს არ ვამაადგება  
თეოზე კაი საწოლი.  
გათენდა მეორე დილა,  
ნახეთ თხების და მგლების ნაბრძოლი,  
ახლა კი გაგისწორდებათ  
ეგ კოლექტივის სასწორი,  
იახსარ მოგქცეს წყალობა  
გადაუნათლე მთა-გორი.

\* \* \*

მაშინაც საით შავხედები,  
ღმერთმა დაგწყევლოს საბელო,  
შენ ჩემო გაძცრუებელო  
თავზევით ქუდის მამხთელო.  
ბოზ-ქურდობაზე შამარცხვენო  
მე მამრალეებენ შენს თავსა,  
ტანტრეო სად რა წახველო,  
თუ მე შენ მოგკალ ტანტრეო.  
ჩემი ცხენ-ბარგი რა ვქენი

თუ მე შენ გილატებდი,  
შენ გაქრი ჩემო სანთელო,  
ცოცხალი ნულა მოგივალ  
თამარო ჩემო გამზრდელო  
თუ ტყვილადა მწამებდენ  
პასუხ შენ გეუც გამჩენო.  
ბევრს კი ეტყოდო ტანტრიავ  
თათრების ენა იცოდო  
მაგრამ თავ მომჭრეს რჯულძაღთა  
დამჭირდა შენი თავია,  
მიშველე ლაშარის ჯვარო  
დამჭირდა შენი თავიო,  
ჩამოგვეშველე ისივა  
არწივო მეომარია,  
შენი ფრანგულით მაკურთხე  
ტანტრია მეომარია,  
დაგვიკრა თათრის შეილებსა  
დააგლეჯინა ყმანია.

\*\*\*

ჩიტი ჩამოჯდა ღობესა  
იძახის გიშლიშორასა.  
ბევრსა დახედება ამ დროსა  
წელიწადს ქრისტიშობასა,  
შენსა შემ მოჰკლა შენს მტერსა,  
გაუწევ მავივრობასა,  
გზანიც კი აყოვდებიან  
შენი მისეღისი-მოსეღისი  
შენ გაიმარჯვე მტერზედა  
ჩემო ფრანგულო ხმალო,  
წინ-წინ მე მომაკვლევინე  
ჩემზე მოსული მტერია,  
ჩემი ლურჯაი ჩეზვინა  
ნაკურთხალოა ცხენია,  
ეგებ ფშავუთში მიმიშვან  
არწივი მეომარია,  
თავ ვასკერ დიაც-ყმაწვილსა,  
თათრების ნაომარია,

ქალებს ხმარობენ ცოლურა  
არა ჩანს მეომრებია.  
სადა ხარ ზეზავ ნეტარა  
ლუხუმი სადღა არია,  
ღმერთო და ჩვენი გამჩენო  
ხატებო ფშავეთისაო,  
შენ გაუმარჯვე ჩვენს ჯარსა  
დავლათო ახმეტისაო,  
აგებ ავხოსოთ ძვლებითა  
ველები კახეთისაო.

\*\*\*

საგინა გიორგწმინდელმა  
ლუდი აღულა სვანთ,  
დაითვრენ ჯალაბაურნი,  
დადგა ხაჯრების ტრიალნი.  
რად ეგრე ჩემო საგინავ,  
რისად გვიყავ ზიანი,  
დაგვათვრენ დაგვალალატენ  
ლუდ გვასვი იფლის წვნიანი.

\*\*\*

წაწლობა რალაც იციან  
დავსწვი ფშაველების „ზაკონი“  
მეც მთაზე ბევრჯერ გავსწირე  
თავ-განებებულ საქონი,  
ბევრგან ბოსლის კარ ვაეაღე  
ბევრგან ავხადე საკომი.  
ბევრ ქალა გამოვალვიძე  
ტყავის ძველაში ნაწოლი.

\*\*\*

რა ქვეყნის ციხე ავაგე,  
ჯავრი შავები კარადა,  
შიგა ვზივარ და ვიძახი  
თავი ღურბელსა მიბია,  
წინ მიდგა სუფრა სკავდისა  
ბრინჯაოს ტარი ავია,  
ზედა დევს დანა ჯავარი

ზედ კვიცის ხორცი აწყვია,  
მშინ და ვერ მიჭამია  
რჯულ ვერ გადამიგდია.

\*\*\*

შვიდ წელს ტყვედ ვიყავ, დედაო,  
არ მილახიან ქვიშანი,  
საკმისას ჩამოშვებულნი  
შუქნი ენახოდი მზისანი,  
კუტი ვეგონე ლეკებსა,  
კარსა ვერ გამავდიოდო,  
გამომიყვანეს გამშინჯეს  
ქალ-რძალი მიდგა მრავალი,  
პირდაპირ ჩამომიცვტრინეს  
თვალ-მარგალიტი მრავალი,  
ზოგი ვსთქი უბერ ვიამე  
რაც იყო თვალით მრავალი,  
ისევ გადმოუტრინდი.

\*\*\*

ძმობილო, კარატიელო,  
ე მა ხოწს გაუხახუნე,  
გუშინაც დალეულიყო  
სულ კბილ დაკრეჭილმ ვაბრუნე.  
თუ არა მე კი შინ წავალ,  
ახლა სხვა მაიმსახურე.  
შენმა მზემ თუ კი შინ წახველ  
სავსე დაგხედება საპურე.\*

39

0399

\*) ფშაური ლექსების მეტი ნაწილი ჩაწერილი მაქვს ლეკვა მთვარელა-  
შვილისაგან სოფელ შუაფხოში

3360 - 256.

39  
07 399

$$25 + 27 = 52$$

$$35 + 19 =$$

$$45 + 38 = 83$$

$$30 - 7 =$$

$$50 - 31 =$$

1234 (500)



Д-р ГЕОРГИЙ ТЕДОРДЗЕ

Пять лет в Пшави и Хевсуретии

КН. II